

大司馬周衛

陽先生全集

本衙藏板

大司馬周衛陽先生全集

序

余束髮受書從一二先達側  
聞當代名卿鉅公恨不能進  
履圮橋而昇柴桑之輿也燕



趙士風沈厚發爲人材磊砢  
而雄杰遠不具論卽慶曆間  
長垣李霖寰司馬南樂魏見  
泉舅弟高邑趙儕鶴太宰皆  
領天下之望其經濟節義文  
章可以薄三光流萬禩故城  
周衛陽司馬名亞焉而司馬  
故非尋常人也

莊皇帝時新鄭稷政是材相也  
而愎且忮報復恩怨無已有



宵輩出其門者伺領之所向  
張弧四射華亭已去位苛索  
無已幾坐以覆宗之禍公爲  
新鄭門人居掖垣新鄭將有  
所用之授以袖中彈文而公  
弗應也遂以閏察逐公去人  
多傳此事余未敢深信近讀  
其祭新鄭文曰愧我愚戇碌  
碌硜硜不體至訓奮袂長行  
隱顯參商頓隔幽明以此語



相質於九原洵不誣矣遊新  
鄭之門者盡若八公採剛而濟  
柔化褊而用大相業庚有光  
而其後當無好還之禍此一  
事也可以定生平焉後先在  
垣中諫草十數上嘗勸

莊皇帝慎起居戒馳騁幾犯

霆威迨

顯皇帝講武禁中

宸極清嚴時聞轟天裂地聲於



法爲不祥且啓觀軍容之漸  
公一疏得

嘉納歷官長留樞輻驕諄世臣  
寘之理鎬京肅清石司馬暗  
於籌國公憐其愚欲明不孥  
之法公遇事慨慷而宅懷平  
恕類如此於德爲中於心爲  
愛敬於聲則直以廉和以柔  
發爲詩文猶此物此志也古  
者聽琴瑟而思志義之臣聽



竽笙簫管而思畜聚之臣皆  
盛世逸響否則激亢太過而  
爲丁寧饒鐸或繁碎已甚而  
爲羗笛胡笳總非清明廣大  
所宜有而於大人之巍巍郊  
廟鏗鉦金石者尤不類公大  
者爲

國家留渾灑之元氣終和且平  
用感神人之聽次則以朱絃  
疏越立雲英之祖而不使美



序  
盡者難乎繼公之心與聲於  
此集闕一班而

景運之昭爍家風之丕熾謂非  
其所留貯而默醅不可公有  
文孫承芳蔚起爲後來秀而  
能讐編其遺文以垂播永久  
則公之所留而有待者曄乎  
旭之華於若木也瀾瀾乎汜  
泉之始波也在文章乎有在  
文章先者乎無念爾祖聿脩



歟德孫也勉乎哉

吳郡姚希孟撰



南大司馬衛陽周公傳

故城周公諱世選字文賢衛陽其別號致政後  
築室娛晚額曰存敬復自稱存敬道人先世本  
太平府當塗縣采石鎮人國初始祖貴奉例徙  
河間占籍故城四傳至公之高祖廩生源振起  
爲邑望族生三子仲曰稼稼生珍珍生良佐娶  
於李以嘉靖壬辰十一月五日戌時生公生之  
夕紅光燭天望者以爲不戒於火殆異徵云性  
敏質端幼卽異於儕偶攻苦力學暑寒不輟弱



冠游黌序負笈從師於百里外文譽日起會父  
祖相繼淪謝罄竭心力以襄大事服闋試於督  
學馬松里公亟爲擊節拔食餼廩戊午舉京闈  
春試不利歸益礪節奮志一切奔趨營殖不移  
其操壬戌成進士觀刑部政卽精研爰書明習  
吏事甲第名次宜授行人乃徂常州府推官當  
事以公端敏不凡特爲改授爲地方振積弊云  
蒞罷廉平慈愼剖斷若流手自裁決老吏不得  
肆爲姦利旁聽豈有訟不得其平者咸奪愆願  
就聽理焉大獄多所平反民咸稱其無冤直指  
巡海上適聞倭警亟欲趨別罷公力請傳檄修  
備禦之海洋勿使登岸屠毒生民果大破之島  
中俘獲甚衆直指受上賞特疏薦公才可大受  
署宜興篆大得士民心裁革糧里例金給批自  
解民尤便之耿天台督學試士宜興時與公談  
理學稱其真率篤實爲載道之器未滿考以薦  
剡二十餘上被內召去圖書衣裝外無一長物  
入都授禮科給事中條陳時務七事侃直無所



忌避止

莊皇帝馳馬禁中疏留四日不下衆慮不測竟得  
俞旨咸嘆服危言動

上聽納焉復論列少宗伯某大司空某疏奪中貴  
侵占禁地直聲愈振新鄭相國公之鄉試座師  
也與華亭相國構授疏于公使劾一臂公以華  
亭夙望謝弗從命新鄭啣之奉

命冊封瀋府悉却餽遺沁水王高其誼終身聞問  
不絕歸乃移疾里居新鄭當國特行考察科道  
落公職比新鄭罷相五十餘人多復進用公獨  
與魏公時亮張公櫛周公希旦六七人久滄泉  
石公貧食指日衆稱貸以置田於遠村稍足自  
給峻絕請託日惟讀書課子淡然世外江陵物  
故南北臺省交薦乃與向六七人者相繼而起  
補公戶科右給事公以里居十七年朝貴鮮識  
面公推赤秉誠人咸悅服嘗疏舉遺逸諫止  
內廷操練條革京營弊蠹種種石畫時論躡之擢  
南尚寶卿晉南右通政載晉南太僕卿禱雨以



濟滌陽旱魃四境沾足民咸頌德改光祿寺卿  
上疏崇儉德清浮冗時苦費煩歲額不繼商人  
供應浪費猶重公嚴覈力裁歲所省公私各以  
數萬計扈

駕往山陵受金幣之

賜尋擢僉都御史巡撫河南時饑荒之後公嚴約  
守令節費恤民發鏹開田數十萬頃民漸復業  
潞邸初就國公極力裁省不貲封延諸邑接壤畿  
輔多盜易匿公嚴行保甲緝獲渠魁遂以寧輯  
礦賊屯聚盧氏諸邑官兵莫敢誰何公親往刈  
制聞風解散修築河防潛消潰決之患處給宗  
祿復禁制其不檢者闢大梁書院羣諸耄俊髦  
肄習其中士被識拔多奮跡而起許忠節之後  
不振公厚恤之省會衛士以放糧改期一日遂  
羣起而譁公召其兩人責治傳諭餘不復究衆  
遂帖然復謂開封守期不可易惟速給之度無  
所藉口定亂倉卒公之猷略素裕矣晉左僉都  
御史協理院事旋晉左副都行李蕭然羣屬嘆



衛陽先生傳  
服入都尋擢工部右侍郎復轉左奉

勅督理九門工工成辭廕僅受二品服俸膺

封典及祖父云倭患孔亟議舉大臣往督餉公被  
命會倭解去不果往改兵部左侍郎協理京營戎  
政條議營務七事切中機宜會寧夏功成再蒙  
金幣之

賜擢戶部右侍郎總督倉場公率屬嚴出納積弊  
頓除尋擢南戶部尚書未抵任改兵部叅贊機  
務時倭警未息公五疏條上八目十議爲防周  
毖先聲奪人東南半壁終恃公以無恐誠意伯  
劉縱恣借募兵以異狂逞公疏其悖謬召變狀  
得

旨逮問人咸快之偵隱圖報了不可得丙申滿二  
品考

恩贈三代廕孫入胄監以目疾六疏乞休丁酉冬  
始得

旨回籍待痊起用未半載起公原官五疏不赴後  
屢會推吏戶刑工戎政各尚書公竟終于里第



未竟其用世共惜之公生平口無謔言身無戲動以嚴肅治家以勤儉率下與人交不設城府而是非得失毫無阿比詭隨不立講學名而于格言要語力行匪懈嘗謂佛氏自脩自證與聖學近似而作用公私則分隔天壤其訓諸子以先器識後文藝明理義成品屑區區祿位不足尚也身雖貴顯朴素不改其初居恒布衣蔬食無耳日玩好園池聲樂之娛痛兩親不逮養每展墓祀伏臘悲不自勝事繼母夏繼祖母胡備極承順胡臥病十餘年奉侍無少怠夏母生世懋撫其孱弱迄于成立腴產悉推讓無吝色妹既適高撫恤終始不替親疎內外待公以生養死葬遠宦卑官具道里費者每至傾囊倒困不惜也故交丘月林冢宰卒于官幾不能殮捐俸佐之石東泉司馬下獄妻子遣戍公爲周給司馬歿遺書當道謂主和雖非是而心無他以爲國計誤聽佞口耳其妻子當宥衆高其義竟請從寬典公之廉恕自筮仕至垂老如一日云元



配黃夫人通孝經烈女傳諸書與公協德同心  
自爲婦及貴顯躬親中饋董治女紅絕無紈綺  
金珠之奉愛育子女九人皆自乳哺有母黨老  
嫗嘗來京邸舍中一日懷重貲爲人脫罪夫人  
卽戒門者絕其來公之操履嚴慎得此稱良內  
助無愧已歿時年僅四十有五未克偕老而累  
荷國恩贈夫人與白首同歸奚異哉蕃於甲午  
歲就試南都蒙公國士之知戊戌制歸庚子北  
上再過公里門欵語移日諄諄皆持身立朝大  
節瞻公丰儀整碩期頤未艾乃于丙午春享年  
七十有五而終諸孤以蕃爲公門下士屬爲公  
傳誼何敢辭據其有關於世道者著于篇俟爲  
名臣立傳者採焉公六子鼎鸞鸞昇喬岡女三  
人孫男八人承祖承廕承業承恩承勛承訓承  
芳承芬孫女十一人婚娶皆名族見公誌中此  
不具述

史氏蕃曰古今人不相及以予觀于司馬公此  
非篤論也司馬登朝四十有六年居里者廿有



七年先後仕南都者八年立殿陛間未及五年耳前以直道忤時相幾蹈不測再起不少貶以徇時負竒偉以老牖下可不謂百折不回乎至其坦夷簡要臧否不爽律已嚴淨處物厚施鑿鑿皆百世師也古大臣風節當不過是固命心銘蕃知所適從奉以終身焉耳立懦廉頑寬鄙敦薄竊謂司馬公兼之

賜進士及第通議大夫南京禮部右侍郎前詹事府詹事春坊庶子翰林院修撰記注

起居編纂章奏管理

誥勅欽差正使朝鮮

賜一品服金陵門生朱之蕃頓首拜撰



衛陽先生集目錄

疏一

酌陳時政以效愚忠疏

國家圖書館 NATIONAL CENTRAL LIBRARY, TAIWAN, R.O.C.



衛陽先生集目錄

疏二

祈

聖明慎舉動疏

儒臣久玷清議乞罷黜以端表率疏

廣

聖恩舉遺賢疏



衛陽先生集目錄

疏三

整祛親軍積弊以嚴法守疏

奸儉大臣漏網肆讒乞罷黜以昭公議疏

廣 聖恩舉遺賢疏

酌議恤軍事宜以飭戎政疏

營軍關係至重乞免工役以壯國威疏



衛陽先生集目錄

疏四

開闢荒田疏

優禮輔臣疏

條議救濟災民疏

國家圖書館, NATIONAL CENTRAL LIBRARY, TAIWAN, R.O.C.



衛陽先生集目錄

疏五

條陳理財六議疏

議臨德倉糧改折疏

鄭王孝行疏

薦舉方面官員疏



衛陽先生集目錄

疏六

整飭營務疏

條陳新舊諸營兵食八目以圖戰守疏



衛陽先生集目錄

疏七

乞宥言官疏

劾勲臣恣橫疏

海防十議疏

督發南京水兵援朝鮮疏

國家圖書館, NATIONAL CENTRAL LIBRARY, TAIWAN, R.O.C.



衛陽先生集目錄

疏八

倭警告急摘陳喫緊預防事宜疏

倭警告急續陳營務未盡事宜以作士氣疏

在任第六次乞休疏

回籍復起原任第五次乞休疏

附四鎮議



衛陽先生集目錄

序九

刻武經七書序

重刻紀效新書序

人倫要鑑序

增輯先進遺風序

重修縣志序

太僕常公督河奏議序

毛文簡公遺稿序



孫沙溪文集序

宋金齋文集序

賀懷棘王侍御還朝序

壽毛太夫人序

賀邑侯李墨潭行取序

邑侯顧星泉入覲序

附宗系引

衛陽先生集目錄

詩十

秋暮旋自西村道經衛河

雨坐栖雲樓

重過黃村寺有感

仲秋月夜宿鹿豕庄

初秋晨出觀河水泛溢

過唐家廟

過三義祠



郊行

送宋金齋河上歸夜寤賦此

酬鄭年丈蘭石寄問二首

燕罷侯城罷城成有贈二首

別趙二泉鄉丈之晉州掌教二首

送懷蓋蔣父母應 召北上二首

酬金山人

酬李憲長年丈次韻四首

送劉掌教赴任魯王府

澹村紀夢

邑侯蔣慕竹誕子四首

別宣司訓之靜海掌教

答袁吉菴

閏四月念三夜識夢

贈陳瀛南按蜀

送陳瀛南司理平陽

贈辛慎翁赴大理任

壽潘印川總河集古四解有序



衛陽先生集目錄

記十一

新遷故城縣記

重修儒學記

重修董子祠碑記

新建二賢祠記

邑侯顏心葵去思碑記

新建玉皇廟記

新建玉真觀碑記



衛陽先生集目錄

祭文十二

祭中嶽神禱雨文

祭大學士高公文

祭南少司空方新渠文

祭少司寇楓潭高公文

祭少松滕公文

祭少河沈公文

祭孫僉憲文



祭柳沙葉公文

祭侍御朱文川文

祭董母陳老夫人文

祭潘老夫人文

祭黃太母王氏文

祭楊夫人李氏文

祭梁太夫人文

祭新宅落成文

衛陽先生集目錄

行狀十三

誥贈資政大夫叅贊機務南京兵部尚書先

祖考義軒府君行狀

誥贈資政大夫叅贊機務南京兵部尚書先

考北原府君行狀

誥贈夫人先妣李氏行狀

墓表

先高祖懷石府君墓表



衛陽先生集目錄

誌銘十四

朝議大夫娛恬段公墓誌銘

承德郎陞五品服俸河南歸德府通判盧公墓誌銘

誥封戶部郎中龍溪宋公墓誌銘

中憲大夫江西饒州府知府陳公墓誌銘

勅封孺人蘇氏墓誌銘

京闈進士浚溪孫公墓誌銘



貢士蘇公墓誌銘

勅封孺人亡妻黃氏墓誌銘



國家圖書館, NATIONAL CENTRAL LIBRARY, TAIWAN, R.O.C.



衛陽先生集卷之一

北陵周世選文賢父著

武林後學沈獅

較正

同邑後學沈嘉

孫男承芳編次付梓

疏

酌陳時政以效愚忠疏

題爲酌陳時政之要以效愚忠以禪

聖治事

臣以一介草茅遭逢

聖主擢置諫垣時切犬



馬之報而思爲芻蕘之獻者未嘗頃刻忘於懷也

但 聖化已底於清熙而諸臣又多所建白臣復何言之有哉然言者雖多而見之施行者未盡行者雖有而切於機要者尚缺是故士習未醇也涵育之教必責之儒官化行自近也率作之機必始於太學懷經裕之圖者計當足食矣而安內攘外可不求足兵之實政乎均緩牧之職者責當任事矣而揚清激濁有不賴練事之風憲乎至於根本重地樹藝良圖固政務之當先而不可不及時

講究者也罄陳一得條爲七事伏望 皇上俯

賜採擇悉見施行其於治道未必無小補而一念芹曝之私亦可少紓於萬一矣緣係酌陳時政之要以效愚忠以禱 聖治事理未敢擅便謹開

坐其題請 旨 一曰重師儒以責教化之實

臣惟師道立而善人多教化成而風俗美此不易之理也恭惟我 皇上壽考作人治隆化洽而又破格用人除姦滌弊一時効用之士喁喁然有回心嚮道之風矣顧邊隅雖修而悃愾之誠不著



荀苴雖息而觀望之意尚存凡以植根淺薄宿習  
錮蔽無教化之素以培養之也故言官條列或欲  
重提學之選或欲久提學之任良以提學一官長  
師儒而總教化必得人久任而後可以移易風俗  
也前後言之亦既詳且盡矣而卒不定久任之議  
蓋亦徂於常格壅滯之說耳然以臣計之官止數  
人任止數年果有成效卽超陞之似亦不爲壅滯  
而亦不見難行也且以久任之間涵濡漸漬真才  
聿興其有裨於世道人心不小小矣此非可斷然  
行之而不必疑者乎伏乞 皇上勅下該部定

議施行凡提學憲臣務選文行兼優志節真誠者  
充其任定以六年九年照資超遷之法則教令不  
朝改而夕更士習不逐風而異嚮如是而乏真才  
歟至治必無之事也然臣又有說焉握黜陟之柄  
於上而標示風動之者固在於提學分化導之責  
於下而耳提面命之者又在於教官提學賢矣而  
教官否焉提學久任矣而教官之賢者不久任焉  
譬若頭目端直而手足癱潰其何以宣洩脉絡而



成一體同仁之化也哉年來忘教化之本源視教職爲疣贅貪殘罷廢改而任之固非事體至於日暮途窮之人又多怠棄職業惟出身於賢科廼顧惜乎名教凡提學之所以布條教以化誨諸生與諸生之以勤服習而衣被教澤者咸是賴焉然往往有教事方新而邑宰之報卽至士習甫變而監博之轉遽聞於彼叙遷養望似得捷徑之路矣其於憲臣之所責望與庠序之所以成德達財者果何益耶再乞 勅部查照近年題 准事理

行各提學官凡考貢之時毋將老耄不堪者起充而就教之人尤必遴選精明者爲之貪肆等官毋得改授其舉人教官必能敦尚風節化育才賢兩考之後方陞以縣正府佐等官其卓異者照依弘治年間例一體行取考選風憲不必復陞助教等官其在歲貢亦宜破格用之仍令提學每於年終分別所屬教官某堪風憲某堪有司某歲貢也堪以擢用某不才廢職當行黜罷開具揭帖送吏部查行其巡按復 命亦必查應退者糾斥之以



勵其餘自撫按提學之外凡各衙門有相臨者除入境照常行事外並不許遠調干涉致妨職業如此則責成專而教職無不舉教職舉而士習罔不振矣臣待罪禮科正與學校相關故首議及焉其他守令等官之久任亦所拳拳致望者矣伏乞

聖裁 一日修太學以隆作養之地臣惟國家之治非賢才無與共理賢才之生非作養無以成器古成均辟雍之制聯師儒頒條約羣英才而教育之所以人文丕振而成械樸菁莪之化也我

成祖定鼎幽燕建置太學因勝國之舊而廓新其制度一切教戒居養之事靡不至詳至備卽古之成均辟雍不是過矣二百年來人才有彬彬之盛治道有熙熙之隆率由於此而中間 列聖相承增修改拓之功亦不容掩也洪惟我

皇上稽古右文崇儒重道嘉靖初年因儒臣之請特勅修理頽者葺之缺者補之規制之未善者恢廓而崇飾之一時 廟貌巍峩堂宇煥新聞海內之士游藝於此者濟濟蹒蹒莫不快覩 上



國之光而頌 皇上崇文重教之盛也迄今閱時既久風雨浸尋塼埴之損壞簷木之朽頽墻宇之坍塌齋舍之傾圮日甚一日雖經節年修理亦支東補西而已其大壞極敝如明道堂內外號舍等處不鞠而爲茂草者幾希矣諸士之所居處與所講習者不問可知若不趁時併加修理抑恐數年之後傾頽益多工力益難矣臣昔在監肄業近因丁祭瞻謁俱嘗目擊而心慨之且復待罪禮科是又相與關涉之事也故敢冒昧進言伏望

皇上念太學爲賢士所關而京師又首善之地

勅下該部查估興修即使財用詘乏亦當設法措處臣非不知公私告匱之際而乃欲爲是勞衆費財之舉嘗聞采芹泮水魯之所興青衿城闕鄭於是乎不競矣文治所關氣運攸係今也 聖

皇御極世道全盛其所以作新文教譽髦斯士而聳華夷之觀瞻者端在於是興修之事豈容已哉再照 國學之設至重而得人之盛宜多今之司監事者祭酒司業監丞而下又二十五六人也而



生徒不滿二百內則例貢一百五十然則官不爲擁虛位而士不爲應故事已乎廢墜之事誠不但廟宇學舍而已也再乞 勅部查照言官節

年 題奏事理或止開納或疏貢途或行催舉人或量裁屬員或釐革各衙門歷事虛應之弊而減其數務使司教者實修其職而不爲冗官卒業者各成其材而需有實用庶不負 建學毓秀之意而可責養賢及民之效矣伏乞 聖裁 一曰

懲侵賴以飭催徵之法臣惟有財此有用在上足國之經有田則有租在下惟正之賦惟賦虧於下而經國者斯不免告匱於上也我 國家當一統之盛行兩稅之法入有定額而出有常經二百年來太倉陳腐帑藏充盈有久安長治之休而公私不至於不足者凡以徵納惟時虧國損民之弊未滋也邇來南北多事奏討紛紜司計者至出一切開納苟且之計而猶支給之不前至厯 皇上宵旰之憂一則曰思所以處理充蓄之計一則曰宜講求足國裕民之要所以軫念儲計至再至三



固中外臣子之所共聞而思以仰副爲 國爲民之至意者不容已也顧督徵之檄疊發沓至拖欠之數日積月累叅官提吏徒費文移往來借貸那移益致倉庫耗竭所以然者一由於有司不任怨而均田清糧之端則在於官豪勢要坐侵 國課靠損貧民恣意肥家而略無忌憚也蓋仕宦旣多優免益衆所遺差徭已歸之百姓矣百姓之差旣重消乏之患難免田產售之豪家重糧遺於本戶而賠累又在於百姓矣勢宦之家旣不當差又無重糧卽升斗俱完其不受累已倍蓰於百姓也迺有等貪橫之徒攘 國家之公稅填一己之私囊蔑棄官法恬不爲意在南方則糧長跪拜而兌軍尚不與其全在北方則里長把門而折准僅得其半中間又有族黨親識一槩影射而不納官亦有詭寄投靠私受糧銀而盡入己府縣莫可究詰糧里其爲包賠包賠不敷而掛欠之數戶計之則成百圖計之則成千而縣計之則有不止於萬者矣臣任推官時查盤蘇松等府冊開欠數或以表或



以號比比皆然卽常熟納級序班錢某一御史之子耳歷年所欠亦有千餘其寄庄江陰等處不與也卽一錢氏而其他又可知也如此之徒狠貪於宦游虎噬於里閭而又至於蠹損正課惡亦甚矣若不大加剗懲何以塞其流弊伏乞 勅下該

部轉行巡撫衙門行令各該有司清查區折圖折之糧務有根着歸正子戶寄戶之田總收一處審編糧長收頭不使零星轉當起解京運邊糧嚴禁棍徒包攬至於收糧之時通將見任回籍大小鄉

官應納稅糧另置一簿分別本折起存各該若干註各名下用印鈐蓋委官另行監收完日定限將原簿解巡撫衙門查有未完五十石以上及二百石以上者不拘起存本折通筭照例問遣應叅

奏者奏

聞處治其不完五百石以上者拿解

來京除應得罪名外仍比照衛所置買民田不納糧富差其田入官事例追沒其田若其餘民糧有司勒比追徵不完者查照題 准不及分數事

例將掌印管糧官一體叅劾降罰固不得借口於



鄉官之賴糧也若鄉官依限完納亦不許奸徒故意刁難多勒加耗庶玩法者懲其奸頑奉法者得明心跡有司之令行侵欠之數寡矣再照優免一節屢有 欽定則例而奉行之人鮮能遵依姑

卽其最者言之里甲一槩不免冊以十段爲定此例行之久矣今則旣免均徭雜泛而又免里甲此北方之積弊也而南方亦間有焉旣免上段差徭而復免下段此南方之積弊也北方亦類是焉若夫一詭田也遂槩免十數戶一寄庄也遂冒免兩三省占使夫皂倍收價直此又南北之所同者差煩役重民窮盜起未必不由於斯也仍乞 勅

部嚴行照例查處以清宿弊亦拯民裕 國之一端也伏乞 聖裁 一曰昭勸戒以除剝削之

弊臣惟去將士之弊者必使革心得士卒之心者必肯用命皆非以勢迫脅之也鑒別精於上而勸戒惟明則將士有革心之誠矣紀律嚴於下而剝削不事則士卒有用命之勇矣故兵法曰舉有功而進之無功而勵之又曰將貴止欲凡以將之貪



衛陽先生集  
饗爲害事之大而勸懲之機懸於上者尤貴有以  
革其心而轉移之也且今內外南北防倭備虜練  
兵之政無日不講養兵之費無地不括然而軍令  
嚴矣而軍容或未之整軍容整矣而軍實或未之  
振求其一人投命足懼千夫者無有焉其故何也  
良以貪饗之夫一味剝削無以得士卒之心而制  
其死命耳是故或影占虛兵而冒支廩糧或給散  
糧銀而坐扣分例或指稱公用而倍加科歛或歲  
時伏臘誕子生辰例有花幣果酒之送又甚而私  
役奪其力戰陣奪其功下自隊官皆以下奉上而  
人人效其尤則上自總叅又安能以上馭下而節  
節之有制乎武功不競職此之由此弊相沿行之  
既久今之所賴以警飭將士而使之改絃易轍者  
在外則有撫按等官之督勘舉劾在內則有本兵  
之陞擢黜斥而總其權於 朝廷近年以來碩  
奸距脫要路冰清本兵之體 國奉公其陟黜非  
不公且嚴也撫按等官之貞度秉憲其廉察非不  
精且詳也但此輩習成債師巧肆錢神查覈之員



役方委卽行百計打點推陞之美缺未出預已多方鑽求故嘗見以乳臭而立躋崇品未幾叅黜以貪懦而攘取虛聲隨復論罷近又聞將官有韓某者差家人何君表齎千金住京投權要以求美轉竟緣當事之執持而抱賂以去又有趙某者假公差之人携私懷之金潛至鑽請以南城御史之追緝而忙匿其踪是雖夤緣之計未遂暮夜之金未投臣姑不過爲之指摘也然計彼之囊橐已盈而軍士之膏脂其腴削殆非一日之故矣此風不熄流弊無極其何以激勸將士充實行伍而振國威也哉伏乞 勅下該部轉行各該總督撫按等衙門曉示將官潔已愛士凡有行勘功罪查取賢否點閱兵馬監放錢糧盤驗器械一應事情慎重差委勿畀匪人所委員役除本等供應外若與將官毫髮交際如受下程餽送之類及因而顛倒是非眩惑上司者各究贓論罪若將官假稱科取及有前項一應剝削等弊請叅該人等呈首叅究縱係名將而智勇不廉定不許列之優薦該部凡



有陽先生集  
遇勘過功罪保劾過人員分別等第應陞錄者卽  
與陞錄應贖復者卽與贖復應降黜問罪者卽行  
降黜提問某宜於某官陞用而不因其求某宜於  
某地又任而量加其銜其有鑽刺營謀之徒如韓  
某趙某者痛加裁抑仍行緝事衙門訪拿來京打  
點之人明正其罪若本兵及總督撫按等官一有  
偏徇致用舍不當俱聽臣等科道官訪實糾劾勸  
戒明而將士之貪風可息剝削寢而士卒之神氣  
以振矣又何倭虜之足慮哉再照武職推陞之憑  
劄兵備總叅等官之 勅書已經該部題奉

欽依清查齋領矣邇乃有等走空光棍通同各  
衙門吏書人等買文憑而爲貿易之資賣 勅

書而張局騙之勢不止過違限期而致政務之耽  
延然又冒竊勘合以重驛遞之騷擾矣再乞

勅部查立定規釐正宿弊禁緝買賣之人亦正事  
體便職任之一端也統乞 聖裁 一曰嚴責

成以弭禍亂之源夫涓涓之流不塞漸必至於滔  
天爍爍之火不滅勢必至於燎原蓋遏之於微者



易爲力而勢大則難圖也天下之事大率如此而  
况於盜賊之起也可不爲杜漸防微之計而徒坐  
視容隱以恣其縱橫而後爲之所乎吁盜而至於  
縱橫勢之大也縱橫而後爲之所圖斯難也有地  
方之責者非聾非瞽非無心思者何爲恣馴其盜  
一至是乎緣其始也苛罰酷刑草芥民命以促之  
其旣也有司懼激變之罪監司厭多事之擾上下  
相蒙荏苒歲月迨其千百成羣劫掠鄉邑也或前  
官幸未發而已去或後官欲邀功而張皇凡所以  
樸滅於方微擒治其首惡而解散其餘黨者一無  
善策往往至於勞師費餉雖旋復蕩平而所損亦  
已多矣地方之官反論功而受賞不窮源而加刑  
無怪乎姑息政成而養亂之日衆也張璉林朝曦  
等之事夫旣往矣竊伏草澤而黷孽未萌者不敢  
過慮而目天下以必禍矣如近日湖廣之黃中四  
川之蔡伯貫幸已就擒而守巡等官且皆有可紀  
之功矣釀其禍者果誰之爲乎廣中之土賊跳梁  
江南之礦徒猖獗俱未殲滅而中間被論之官惟



循陽先生集  
據地方之受害者耳階之厲者伊誰其人乎近又聞泰州地方有史家庄者村聯十數人衆千餘始則結黨販鹽邇來肆行劫虜高如泰通等處遠近騷動人畜不寧雖官捕亦被其殺傷而莫能與敵此江淮咽喉之地亂形已具矣當事者因循相沿付之不問豈非養亂之道乎凡此前項地方上非不有巡撫也諉於遙制之難周下非不有府州縣官也託以威望之弗重而守巡兵備海防等官方且以官爲傳舍逡巡保守不久而他轉矣實心任事爲地方而早爲之圖者鮮有其人也蓋緣久任之法已壞責成之令不嚴謀匪經常事多蒙蔽往往馴致於大壞極敎然後起而爲之吁亦晚矣伏乞 勅下該部再加查議如川廣湖浙地方行令各該巡按查盜起於何年盛於何日何官坐視養成之上自巡撫守巡兵備下逮府州縣官雖陞遷去任亦要覈實從重叅劾見在賊黨速行剿滅其泰州潛伏諸盜行彼處軍門海防等官趨今未熾相機撫剿固不可縱之使盛亦不可激之爲變



衛陽先生集  
五  
務期救寧以靖地方再行各省直撫按衙門轉行  
所屬守巡守令等官申明保甲之法而禁其騷擾  
修舉鄉約之會而不事彌文凡一切弭盜安民之  
事務要着實舉行倘有前項結聚賊黨不及時預  
爲之處分銷散後雖離任亦要追惟禍本而重究  
之庶官不爲旦夕之計而注意於地方事不皆苟  
且之謀而周防於後日盜賊不至於盤據寰宇永  
奠於永安矣伏候  
聖裁  
一曰明職掌以正

風憲之體臣惟庶官懸生民之休戚而風憲總諸  
司之綱紀近年以來節奉  
明旨申飭憲綱一

時御史諸臣體

聖衷肅吏治凡以奉宣

德意而展布風采者視五六年前尚圓通而應故  
事大相逕庭也臣復何言顧以糾察而爲職御史  
之官同也然其職司之各別御史之差異也大差  
巡按代  
天狩於一方各差御史司風紀於一  
事故巡按總領衆職而其他則各有專責者也若  
以專責爲不足以盡其所長視巡按而必欲以出  
乎其右則過矣卽如查盤防侵僞之弊相干者或



可查也若以此而涉彼昔無而今有是豈必不可  
已者乎受狀開伸理之門相干者必宜准也若田  
土而以錢糧裝頭鬪毆而以盜劫換面是豈可以  
槩受者乎土豪積惡固宜訪察以爲狼莠之除也  
巡按夫既行之矣若於此而競爲風力不免當道  
有問狐之舛貪官毒政固宜拿究以祛乳虎之暴  
也巡按夫既行之矣若於此而過於吹求斯致邑  
人罹得牛之災凡若此者是固攬轡埋輪必使干  
紀者之無所逃而其撼山震嶽抑恐奉行者之滋  
其擾此臣有感於往昔而慮復踵於將來者也合  
無 勅下兩京都察院再申飭各差御史一應  
行事若拿官訪惡之類必與本差相關者其他一  
聽巡按御史行之不得攬越其各處巡按之出巡  
也激濁揚清興利革弊一遵 勅劄盡黜浮文

如訪察一節必若常熟之周某湖州之茅金山人  
莫敢誰何而司府之法不能加者盡其數而行拿  
之雖一二十人不爲多也苟無此巨惡之處不必  
苛瑣以及於無辜至於耳目諮訪尤不可以不慎



也可於匪人而濫寄乎其糾劾一節果若雲南之嚴傑湖廣之張瞬人受其荼毒而贓跡之著不容掩者隨所知而卽劾之雖數十餘人不必畱也暨當夫復命之日勿拘有無以示乎至公至於直隸舉劾較之他處尤多也可必求人以塞責乎卽是以例其餘而不用偏私不徇異同務振風猷各奏實績則憲職不至於乖違而按屬允底於清肅矣伏乞 聖裁 一曰興水利以裕東南之

財臣惟東南財賦之淵藪水利東南之要務蓋水利修則旱疇無不治田疇治則國賦無不充否則湮溢乾涸之患至而迺移逋負之弊滋矣此台然之勢也 國初江南水災夏原吉以重臣往治之三吳之民至今享利嗣是而後時塞時浚事不經久一遇水旱輒復告災三十九年給事中季科已言之四十一年給事中趙灼又言之二臣產於吳者也身嬰其患目擊其艱特爲題 允勅行

固一時拯急起溺之良圖也但時移而事易廢官改而法亦隳卽去年五六月間淋雨浹旬而江南



之田有漫漶浩瀚一望成湖者臣方宦於其地因  
詢問父老備悉水利之堙塞不修也震澤瀑漲每  
激於踐洩之不廣橫流汜濫恒潰於圩畝之未脩  
潮沙壅淤又乘於閘堰之未備憲臣非不有督理  
之令也往來文移竟成紙上之桑府縣非不有水  
利之官也勞來猷敵鮮見躬行之人間有一二任  
事創議興修者不沮撓於羣言則苦難於工力卽  
如白茅一港已該巡撫都御史周某巡按御史溫  
某會行知縣王某勘計明實刻日興工矣迺糧多  
之家慳於出夫鄰近之縣阻於接濟畢竟以錢糧  
不敷而工遂寢迫其滄沒爲患也不過爲乞免稅  
糧以紓目前之急而已夫蠲糧以甦民困是矣而  
水利不修何異止沸而爲湯之揚興作必俟錢糧  
之足是矣而不及時料理是徒說梅而望渴之釋  
也竟何益哉今幸無事則已萬一有警言而鯨鯢弄  
波海上多事又歲禱而有方一二千里之大水大  
旱漭泄無備塲谷不登本地養兵之費不能支而  
四百萬石之漕儲又何所於仰給也哉故識者謂



水利之修深長之慮也然宋臣范仲淹有言曰今世有所興作橫議先至非

朝廷主之則無功

而有毀守土之人恐無建事之意矣臣之慮亦猶是也伏乞

勅下該部轉行彼處撫按衙門責

成帶管兵備及府州縣水利專官各修實政勿事虛文凡遇農隙之時親歷郊野遍詢阡庶查有支河之當疏圍圻埽塋之當築陂塘溝洫之當濬者工力不煩卽令得利人戶修之頗爲浩大則通融計處動支導河夫銀以修之其有港浦當開閘壩

當置導泄湖流而畎引江海若白茆之類者申請估勘酌量緩急次第趁時設法修理毋致廢壞愈多而工程愈難也其一應獎戒繳冊事宜查照原行一一着實幹理撫按衙門仍將各官報過水利事蹟不時密切查訪真偽以行勸黜則官無怠政民無棄田東南有積倉之富而常變皆宜 國家有輓輸之財而匱乏無慮矣伏乞

聖裁





國家圖書館, NATIONAL CENTRAL LIBRARY, TAIWAN, R.O.C.

徐陽先生集

三



衛陽先生集卷之二

井陵周世選文賢父著

武林後學沈獅

較正

同邑後學沈嘉

孫男承芳編次付梓

疏

祈 聖明慎舉動疏

題爲仰祈

聖明慎舉動以崇

君德以端

化源事臣惟君身爲萬化之源崇德迺立身之本



然欲崇其德必慎乎動古之稱至德者必曰出入起居罔有弗欽而爲非禮之戒者亦以細行不矜終爲大德之累甚矣動之不可忽也在昔聖帝明王一動一言率循禮度而無敢戲豫無敢馳驅誠以一身之舉動雖不下於堂階四海之觀聽實有關於化理故耳恭惟我皇上寶祚肇臨

聖度丕昭溫文恭儉清和粹夷大小臣工仰

休光而望至治者自臨御以來靡日不切切

然矣然而德意尚壅於下究治理未臻於極盛也

頃者外而傳聞近侍內臣競進名馬導陛下

日馳於禁中臣以爲陛下臨朝端嚴出警入

蹕非不自愛且重者何爲有燕居馳騁之事不可

信也昨二十七日陛下御殿行冊妃禮成

該臣同各科臣導駕以入恭覩陛下卽

中極殿前乘馬由殿而進焉臣趨蹌之餘不

勝驚訝退而反覆思惟或陛下以入宮法從

雖任情自便亦無甚失德者歟不知陛下

身關係至重卽乘馬一事實有四不可者臣職司



諫諍敢循默苟容而不爲

陛下一言之乎自

古稱人君之出入不曰乘輿則曰車駕卽近年

視朝等項儀注載在會典者不曰升輅則曰乘輦未嘗有乘騎之文也所以然者以天子至

尊無對儀衛甚嚴若於馬是乘則下同於武弁及文職四品以下之小官矣體統倒置自褻威儀其不可一也且皇上御用之馬固必得極良之選者然諺有云千里之馬定有一蹶又况馬之善走或不免於蹄齧萬一控馭失宜致有不馴我

陛下聖體廼主

天地神靈之統荷

宗

廟社稷之寄者烏可不重加愛護昔漢元帝之入廟也將御樓船薛廣德極力諫止之蓋以乘船不如就橋之安也夫古之愛君樓船且慮其危矣而况獨乘一馬乎臣以爲不如乘輅之爲安耳此其不可者二也伏覩皇明祖訓選良馬數匹能

行速走者常於宮門喂養蓋以警備非常防禦不測乃祖宗之深意也非謂退朝燕閑之時卽可乘坐出入而恣意嬉遊也駭四方之耳目驚海



內之人心

陛下無以爲小故而忽之此其不

可者三也凡遇

視朝馬必列於仗下而喂養

備用亦當在於宮門即使畱心武備教演自有定

所然亦不必

陛下之親自教演也若夫

殿庭之上清嚴邃密凜然森然奚可走馬於其間

乎且在

殿如此其在

宮苑之內又可知

矣此聲傳播似非

帝王盛事其不可者四也

夫一舉而不可者四在

陛下之至明至睿不

宜有此舉動也而乃有之臣以爲

親賢務學

之功有所未盡左右近習之誑惑者日囂雜於前

雖

陛下明聖亦無自而覺悟其非也何也

陛下昔在藩邸自聽講之外於儒臣無一語之

交及今

嗣登大位自早朝之外於諸臣無一

言之及凡有關於

君德之成否治道之汙隆

朝綱之振弛者不接於耳不細繹於心而左

右近習便嬖側媚非以之獻諛則以之取悅卽進

馬於

宮中備馬於

後殿致

陛下有

此過舉是果誰執其咎與臣固知宦侍不得辭其



責也是以曩者宮詹有十事之疏科道有延納之請以及諸臣陸續建白率多慮及於此而惟

任聖圖治之是望目今 山陵襄事中外望治

之心更切往時伏願 陛下思 先帝付託

之重憫海內多事之艱 畱神治道銳意圖維

凡一切內侍諂諛誑誘以騎射聲音貨賄等項誤

陛下者各明正其罪以示屏絕仍乞 勅

下該部查照諸臣原題事理具儀 題覆遵照

先朝故事每旦朝罷卽請 陛下御 文華

殿或 會極門除經筵日講外 召內閣及九卿

科道諸臣商榷政事訪問民瘼辨覈忠邪咨詢利

弊久之政務益熟 睿識益精羣小莫能惑而

動作罔不臧 君德於是乎大備化源於是乎

允端矣再惟 登極一詔 聖政維新天下

想望太平跂足以待矣柰何惠方下流事多中梗

舉其大者言之如冗官方議查革也而內官弟侄

授錦衣世襲者三十餘人是傳奉之弊政可漸長

以導其流乎如工作方議停寢也而 紫極等殿



之拆卸人力復煩 翔鳳殿之建造事在可已是  
土木之重役可再興以擾民乎伏望 陛下總  
攬乾綱洞開離照革傳奉罷土木其他一政之布  
一令之出慎終如始加惠元元固臣愚一念拳拳  
望 陛下以堯舜之微忠也懇惟 俯賜採  
納天下幸甚臣愚幸甚

儒臣久玷清議乞罷黜以端表率疏

題爲貪鄙儒臣久玷清議懇乞 聖明特賜罷

黜以端表率以重吉士之作養事臣惟 皇上

之設科取士也於進士之科爲獨優而進士之中  
拔其尤者爲庶吉士羣之秘館厚之廩餼程以課  
業復命學士重臣以領教事其所以優崇教育之  
者又特至焉良以館閣之儲所關非輕而作養之  
典比常宜重也然必端方正直者爲之師而後瞻  
依觀法者有所據此上年選館之時吏禮二部因  
言官建白而覆題申明之者有以也若今之教庶  
吉士吏部左侍郎兼學士秦鳴雷者其人品其心  
術其行事庸鄙貪劣物論久彰當不容使之一日



居乎其位矣而况可爲庶吉士之模範乎試卽其素行數端人所共議者爲我

皇上陳之部堂

缺官其陞補自有定序往年吏部侍郎缺右時鳴雷方居禮部之左也廼揚言於衆而云以左改右昔曾有孫陞之例卽其番涎吏部之意實欲假借事權以爲媒利之圖耳至今縉紳傳之以爲笑柄此其立志之卑汚見議於人者一也士夫處鄉其持身當以正道往來鳴雷給假回籍時胡總督方用事於浙也廼往來其門而說事騙錢深貽桑梓

之害迨其復任赴京之日索討長夫於各府縣而折價殆千金之多矣至今黨里恨之名爲秦檜此其居鄉之貪肆見議於人者二也弟侄子男嚴以教之惟恐其鮮克有禮矣鳴雷乃縱親弟秦鳴冬等及家僮數百武斷鄉曲吞噬百姓見今龐御史之按問事猶未結此其處家之縱惡見議於人者三也左右廝僕法以繩之猶懼其竊勢爲非矣廼鳴雷令家人傅大高伍官等四十餘人通贓京邸爭攬說事門官李可之引進人人所共知此其居



官之不檢見議於人者四也跟辦之人非爲供億之需也迺令家人索取前件承差十二兩官吏各五兩與三兩如有奏納之稽悞卽致逼勒之橫加近有山東李承差者一時不及十二兩之數因其家人凌辱也執稟本官迺謂之舊規而更加責叱本役固可一訊而知矣此其罔利之及於吏胥而見議於人者五也祭酒之官非爲納賂而設也昔在南監受諸生餽遺或以土物或以段帕與折銀視其禮物之多寡以爲撥歷之後先比有屬官尹尚賢者因行取納三百之賄許其薦選風憲也後陞同知止倒銀二百而仍指一百南都至今傳噏未已矣此其黷貨之及於師儒而見議於人者六也在內各衙門事體因循正以投託之便而行法之難耳鳴雷則用鄰居於姓者之通賊而公行干請或爲商人乞免見拒於巡視衙門而罔有耻心或爲吏役坐缺屢求於撥吏衙門而圖得厚利卽今各衙門之傳說與臣科中之辦吏其爲鳴雷之囑託固有可指而證實者此其撓政紀於內而見



議於人者七也。在外各衙門執持不定，正以權要之阻而淆奪之易耳。鳴雷則受河間高某之重賄，而屢爲請託。四十二年通啓於李巡撫，被其視爲假書而叱回。四十三年遣使於葛知府，逼之轉懇，同僚而同允。至今有勢能壓知府，不能動巡撫之語，傳播於臣之鄉邦，固所稔聞而灼知者。此其撓法柄於外而見議於人者八也。凡此數者，非謂足以盡其污迹也。特自其昭昭衆論，臣所聞者言之耳。以若人而司館教也，道術無可觀，德義無可

度作事全無足法。即使諸士盡得鳴雷之學，亦如鳴雷之爲人，不過浮沉於利祿之場，淪胥於齷齪之輩而已。安望其砥礪清修，堪備他日公卿輔弼之用也哉。又况本官之資俸將歷尚書而上之者也。若不及時早爲議黜，一旦柄用，則招權納賂，恣邪逞奸，其隱憂尤有不可勝言者。是豈可一日立于堯舜之朝也哉。叅照吏部左侍郎兼學士

教庶吉士秦鳴雷，心似溪壑，行同壘斷，覬銓曹而甘爲遷就，虐鄉鄰而肆行騙索，傲弟不法，皆緣故



循陔先生集  
縱於平日狼僕通賄公然送入於主囊取受下逮  
胥儒詎能見利而懷義囑託徧及中外罔顧徇私  
以滅公卽彼蠅營終年無非孳孳爲利是誠不廉  
不正之小人何有正身正物之師範科名徒愧重  
任不堪所當亟行議罷者也伏望  
皇上特賜

乾斷將秦鳴雷卽行罷黜別選志行純潔者代其  
任以端教習以風士心若諸士中有浮佻不檢不  
厭人望者查照原題不時議處庶師表得人而  
藝苑之矜式攸樹士習丕正而局館之儲材惟精  
矣

廣 聖恩舉遺賢疏

題爲廣 聖恩舉遺賢以風勵人心光隆政化  
事臣惟用人圖治古今御守之要術以人事君臣  
子效忠之至願臣以迂拙苟安田里荷蒙 皇  
上用薦者之言起臣于林麓之中再造之恩真同  
高厚矣臣受任以來思竭犬馬之愚以效涓埃之  
報無日不切切然也顧報之以一人之身則注措  
或限于不廣惟報之以羣材之助則幹濟可資以



無窮古云集衆思廣忠益蓋爲是耳矧且當今之時潔身養高之士與夫忤時坐廢之臣槩多材品行誼非臣所能比肩者其可用尤宜不後于臣也臣若菽而不言則不惟有失拔茅彙征之義亦何以盡以人事

君之忠故臣敢以海內之賢得于聞見之素有屢經薦覆而尚未推補者有未經薦揚而灼見可用者一一爲我

皇上陳之如

原任禮部侍郎王錫爵心純忠孝學富經綸繫寰海之具贍負台衡之偉望所宜及時召取以備輔相之任者也如原任刑部尚書劉應節原任操江都御史吳時來原任保定巡撫孫丕揚原任太常寺卿陳于陞原任太常寺少卿胡汝桂原任太僕寺少卿張楨原任左布政使張天馭劉繼文原任叅政陳惟直趙國璧原任副使查鐸原任叅議邵永春原任僉事王謨以上諸臣或著鯁亮之節或抱經濟之猷或蒞政清白而休聲尚播于士林或居鄉高潔而清風不改其素履要之皆賢聲久著公論攸歸旣經薦議叙錄所當卽爲除補者也其



未經會薦者如原任南京兵部尚書戴才歷官多年而朝紳尚談其籌邊之烈憂歸數載而里人共服其養晦之高原任遼東巡撫張西銘才名素負昔著剛介有爲之聲泉石久娛益聞操持無瑕之譽原任南京通政司右通政使吳自峒淳如美玉藹然天賦之吉人洞若冰壺允矣清修之君子原任左布政高察清謹素著于銓曹而人服雅德勞績方懋于薇省而人惜去官原任行太僕寺卿顏鯨崇尚風節在昔有名御史之稱堅立雅操于今有真道學之譽原任副使李拭澄清郊圻而寓教化于法北淵源問學而振家聲于鄉評原任副使穆文熙居官以節義自許而不避險艱處家以著述畱心而不事俗務原任僉事萬廷言卑凡近而務高明當年之聲稱甚藉謝塵囂而守虛靜末路之志節益堅以上數臣雖才行不同要皆堪爲世用而不可使之終于佚棄者也內顏鯨穆文熙萬廷言俱係考察鯨以忤故相取嫌文熙以忤同官招忌廷言情事與胡汝桂相同迨今公議昭然咸



爲稱屈似當照張楨胡汝桂例一體叙用者也凡  
臣所舉諸臣皆博採輿論慎察的實非敢以碌碌  
無當之人輕瀆

宸聰亦非敢以區區阿私之  
見希于衆譽蓋舉其所知以少紓圖報之忱于萬  
一耳若果臣言得行諸臣獲用則內之足以熙載  
亮工外之足以分猷宣化卽一時未可盡補而需  
次于家亦將以勵操修而表鄉閭其有裨于政化  
人心似非淺尠矣伏乞

聖明採納

勅下

吏部再加查核如果臣言不謬將王錫爵及時徵  
用劉應節等卽行除補戴才等議覆錄用庶沉淪  
之士旣按羅而不使掩抑于林臯則融顯之儔益  
砥礪而思以奮忠于盛際矣



徐氏先生集

三



國家圖書館, NATIONAL CENTRAL LIBRARY, TAIWAN, R.O.C.



衛陽先生集卷之三

井陵周世選文賢父著

武林後學沈獅

較正

同邑後學沈嘉


孫男承芳編次付梓

疏

整祛親軍積弊以嚴法守疏

題爲整祛親軍積弊以嚴法守以勵人心事先該

巡視 皇城給事中張鹵題前事該兵部覆奉





欽依科道差滿之日備將門禁有無違錯官軍有無逃故經管官役有無包占求索等弊一併具由回奏等因今該臣等巡視冬季已滿除地方失事門禁疎虞及點閘不到官軍節經酌量叅奏處治外其一應巡視興革事宜又屢經諸臣建白該部題覆纖悉備具若無復贅說矣顧緣朝儀久廢人心玩弛茲值陛下臨御之初中外臣民

翕然望治固將首振朝綱以漸布寰區矣若禁秘之地種種弊習不先整刷而飭勵之其何以樹

華夷之觀示隆治道于鼎新也矧臣等目擊夙弊不容無言敢爲我皇上陳之臣等照得守衛

軍人最係緊要舊例隊伍缺人卽行勾補正身上直不許空虛代替昨該給事中張鹵題請選補之時缺軍九百八十名隨該兵部覆行職方武庫二司驗補清勾去後迨至臣等接管據所開逃故之數亦九百五十九人補者無幾逃故者又無虛日且頂名虛應包占影射情弊及老羸不堪之人卽見在者亦不可勝紀由此侵尋不已將恐尺藉日



循陽先生集卷三  
二  
耗合無法去老弱嚴行清補務足原額數目仍照節題事理置立年貌文冊照填木牌人給一箇併銅符懸帶以便稽查庶人無虛曠而輪直不缺矣其軍伍之所當覈實者如此各官軍接班之日具花名手本遞臣等備查隨又遞放糧稟帖問之迺知一年之內六箇月赴通倉關領月糧守候往返耽延數日遇點開不到輒具稟帖混行破調西安門紅舖失事指揮劉勳亦借口關糧遮飾他可知矣臣等伏思 國朝優恤守衛軍士造飯支米正

爲其常川信地而時刻不離也數日遠出則數日乏人防守直宿重務豈應若此先該兵部議咨戶部施行迄今未見改支近據府軍衛指揮胡璽等呈乞比照犧牲所錦衣衛上五所校尉騰驤四衛勇士月糧事例改入京倉以便守衛合無行令旗手等二十衛將守衛官軍按月另出實支送兵部巡視司官查對明白掛號轉送戶部撥支在京倉糧永爲定制庶虛冒可革而直守不悞矣其軍糧之當便給者如此 皇城門禁法至嚴肅凡辦事



人員內官內使出入各門及朝參文武將帶人役及閑雜賣物穿朝入朝等人各有禁例載在令甲邇來人玩法弛防禦不嚴負擔之徒公然貿易往來之人紛然穿走文武各官跟隨人役亦沓雜于午門 端門之前節經臣等拿究曉示而積習相沿罔識忌憚合無嚴 諭守衛各官一切遵

照舊例凡閑雜賣物等人不許放入其各衙門辦事等項員役查照先年驗牌事例施行若文武官入 朝帶領從人查據會典參酌時宜某官應帶

幾人某官不許將帶詳定數目限至某門其從人所懸牌面應否本衙門自置各立成規無得越逾以取參究此門禁之出入當謹嚴以肅儀衛者如此守衛軍士晝則直門夜宿紅舖傳鈴之暇賴此憇息 午門東西城外數舖廼被各內官占住臣等每巡視到彼扁鎖封識致各軍忍凍吞聲其臥簷底至于 端門 承天門東西 長安等門以裏各私蓋房屋數十餘間宛如闐闐今茲 聖政維新八方來同不惟 朝宁森嚴之地巷列羅



居觀瞻不雅抑且室垣參錯逼近門側祇恐閑人竊入藉以潛踪而防閑之有礙矣合無責令各門監退出紅舖住歇軍人各門內不應存留房屋盡行撤去不許執迷自干刑章此 禁地之舖宇當刷正以便防衛者又如此臣等查得各門監官原止一正一副此外添差不過二二人而已近年添至十數人或二三十人夫門官之享用多出門軍之膏脂官多則軍力不支軍貧則逃縣日衆前年兵部議行司禮監查革良有見于此也况今又奉有 明詔乎至于旗手等衛指揮千百戶等官雖經考選實多匪人甚者不顧行止下同丐乞如茶錦之醕酌終日劉琦之需索貧軍王良臣之曠廢職務如此之輩不可枚舉欲望其整搦諸軍督率勤事難矣今宜速令司禮監查各門原額監官若干照舊存用餘者取回別項差遣其各衛官責令兵部查訪不才者通行揀退另選充補一有索害等弊盡法處治則官蠹可祛而軍士思奮矣此內外官員所當簡核以除其冗穢者又如此門禁



條約有

祖宗之榜例有

列聖之詔旨可

謂事制而曲防者然猶怠弛因仍頽敝不振固由于人心之玩愒首起于內官之阻撓卽如上年吏科左給事中趙格等具題該兵部覆奉

欽依

刊刻榜文禁論誠爲剴切明備足警人心矣迺

西安等門內官惡其防已也羣聚合夥每遇兵部官員圍繞罵詈輒騰飛語勒致藏匿榜文便其需索而後已此風不熄欲扶奸剔蠹以維

政化

恐終不可得矣除已往不究外合無行令該衙門

追查節年榜論重新遍置各門曉示各官務遵約

束省改前愆如有仍蹈故轍辱及各官害及各軍

者許卽時指名奏處以重典庶法行自近而

人思振勵矣此頒布榜禁所當查復以新其視聽

者又如此以上數事或節經條議而寢閣不行或

循襲故常而議處未盡均之救弊補偏可禪

新政之萬一伏乞

聖明採納

勅下所司

詳加覆議着實舉行是亦清源防微飭度警邪之

一大端也



奸儉大臣漏網肆讒乞罷黜以昭公議疏

題爲奸儉大臣漏網肆讒致乖政體懇乞 聖

明速賜罷黜以昭公議以儆臣工以光隆 新

政事臣聞之古除小人者必曰去邪勿疑而論治

世者亦必曰朝無倖位蓋以去之稍疑而猶倖在

位則必附勢罔上結黨行私思逞反噬之計以搖

國是毒縉紳而亂政紀者無所不至矣是以自

古慎之也臣竊有感于今焉恭惟 皇上賦資

高朗御下嚴明 登極之初首舉考察之典而以

拾遺付之臺諫正恐奸邪有倖而免者允矣 圖

治之盛心也比臺諫諸臣仰體 聖意惟慎惟

公咸謂老奸巨猾久招物議如工部尚書雷禮者

固在所必黜矣 聖恩浩蕩容其自新爲禮

者正宜感 恩思報悔過省愆斯大臣之體也

一時傳聞禮且罵詈科道及又怨罵原任光祿寺

寺丞萬廷言臣始聞之猶未之信不數日間廷言

果陞雲南僉事矣士論嘖嘖皆云以禮之故夫六

科十三道詳悉采訪公同評議彼廷言何預于此



而一有疑心卽中傷之公論于是而不平焉非重  
廷言也小人讒譖得行其漸不可長也臣因不避  
撫怨復卽事端之有據者爲我 皇上陳之叅

照工部尚書雷禮狐媚成性狡險存心阿附嚴嵩  
極其諂密至有夫人拜壽禮節迄今門下之士猶  
有鄙之者而云得罪嚴門其誰信乎嚴嵩欲殺楊  
繼盛事在猶豫也禮以兩言而決之臣始入科卽  
聞同科諸臣每一議及輒爲扼腕是果今日之捏  
造乎萬竄追賊而爲之求解不遂饒推官之不得  
行取果誰騰其謗乎省城蓋坊而奪劉伯躍之基  
址非葉知府委曲調停其誰當其虐乎伸謝拜權  
璫之虛位傳之都下者非止一日縱子持書柬以  
囑託仕于其地者誰云不知去年曾郎中陞任代  
之者查其虛出銀四萬餘兩禮乃大聲嚷罵于公  
堂不審主掌出納果爲司郎之獨專昨該刑部問  
擬犯人徐杲等虛開廩糧夫價名數冒領銀幾至  
數萬原其扶同判領豈無分例之潛通其他瑣猥  
之態鄙穢之行舉生平才名而盡棄之尚有不止



于此者物論久彰人情共鄙

新政之初甄別

黜陟首宜罷斥而不容復留者也以故臺諫之臣  
不廢公道不奪異議而必用糾拾禮廼疑一萬廷  
言而加之擠害豈不大可駭異乎然爲禮者必曰  
吏部陞用人材于我何與爲吏部者必曰內外陞  
遷照各資俸之常提學憲臣非裁抑人之官何爲  
以是而論列也臣請有以折之禮善脂韋厚自結  
納于銓卿又恃舊寅公行指授于司屬言無不售  
竊柄凌人所由來者久矣禮將誰欺至于廷言陞  
轉尤有可議者由刑部而兵部而禮部而光祿何  
內轉之驟也一聞雷禮怨言卽有滇南之擢又何  
外補之速也旣亟亟以補之于外矣又謄張佳胤  
提學之缺以與之是果以廷言之人品心術爲臧  
耶爲否耶顛倒衆聽籠絡人心謂無置意于其間  
也得乎且提學事體與臣禮科相關先該臣具題  
該吏部覆奉 欽依提學見任各官必使久于  
其任要以二考爲率今張佳胤歷任年餘而陞以  
叅議果以不逮廷言能堪提學之任乎抑以其賢



能久勞而優擢之乎與前題覆矛盾甚矣又該給事中張鹵具題該禮部覆奉

欽依行兩京十

三省提學官自今年正月爲始將所屬生儒從新考試親臨通閱又該給事中岑用賓具題禮部覆奉

欽依提學官務要精勤職業毋得至臨場

之際草率完事蓋慎重科舉而責成提學者專且切也今時將春暮矣張佳胤聞報而勢不可留萬廷言在京而卒未能到雖有帶管終非專職欲其親臨通閱而不潦草完事也將責之誰耶是蓋以

官處人而不使人之實業乎官政體乖舛莫此爲甚皆緣雷禮一讒言之行有以致之也小人之能亂政而爲禍本也有如是哉于此不重加究斥將恐貝錦成俗萋菲橫行喪心小人懷妬肆謗鼓如簧之口以變亂是非造無根之謗以傾陷忠良者又將何所不至哉甚非 國家之福也昨該左給事中馮成能條疏正人心一欵良亦有見于此耳臣明言官媿無補報惟糾劾奸邪舉正欺弊乃臣之職分所當自盡者故不慮禍而冒昧進言伏望



聖明洞察

勅下部院科道諸衙門從公

虛心定議如果雷禮人品端潔無可訾議卽罷臣  
官以爲妄言之戒若果臣言不謬乞將雷禮亟

賜罷斥以清仕途庶公論昭昭頓息讒說殄行  
之弊百僚濟濟翊成 帝治維新之盛矣再乞

天語叮嚀吏部尚書楊博秉心貴虛聽言務

審毋爲小人誑惑致傷政體庶不負

九重眷

知羣生倚重之至意仍乞

勅萬延言兼程前

去赴任不許延緩致悞科場大事是固臣愚一念

拳拳所欲效忠于

陛下者他又何計焉臣不勝悚切俟

命之至

酌議恤軍事宜以飭戎政疏

題爲推廣

聖慈酌議恤軍事宜以飭戎政事

臣等伏覩

皇上感時令之亢賜憫生民之疾

苦理寃拔滯蠲負減供亦已勤矣旋復徒步 郊

壇省躬祈禱至于有司官剝害之禁尤惓惓焉一

念愛民之心卽堯舜之如天好生不是過也臣等



律陽先生集  
叨列言司勉思奉揚

德意以布之閭閻媿不

能效未議之萬一顧時方祇役京營其所奔走而  
藉敷者軍旅事也因思民爲邦之本軍爲民之衛  
軍民一體中外維均其在邊鎮武臣頃蒙

皇

上俯允該部所陳戒諭一申三軍溫如挾纊乃京  
營之軍環聚

輦轂下書則荷戈操練夜則晝

地哨巡似當矜恤困苦以培元氣矧風霾時作邊  
警可虞兵貴先聲尤當申嚴紀律以振神氣以是  
二者周爰諮諏得其梗槩敬以事之便于軍情而

禪于兵紀者爲我

皇上陳之夫自古良將視

士卒如嬰兒愛子豈惟恩信當然亦有見于行間  
之最苦耳故各官科尅之禁

明例炳如日星

邇來總協大臣身先表率臣等又多方體察一時  
將領等官罔不砥礪惟謹第各軍十餘萬衆在營  
伍則分隸于副叅遊佐等官在衛所則統屬于指  
揮千百戶等官中間分例之索月糧之扣事跡顯  
著者臣等訪實查究自難姑息此外十羊九牧或  
劫于積威而不敢言與工于彌縫而不盡露者能



保其必無哉若究其原籍 畿內八府居多彼中  
有司往往岐軍民而二視之卽如告取軍裝漫然  
不理而雜派民差必欲分之貧軍以要譽于小民  
或據告批行依期繳報者十無一二軍士之疲救  
職此之由雖鞭之長不及馬腹臣等亦徂于法令  
之難施矣伏乞 勅下該部再加查議覆

請將營衛大小官員嚴行禁諭仍轉行願保等府  
該管撫按曉諭各州縣官存恤軍士凡裝銀當給  
悉與處分民差當豁照例除免此則嘉惠營軍之

一端也兵家之追逐以馬爲先若士飽而馬不騰  
雖有賁育何以致遠京營之馬節經諸臣禁約軍  
士頗知餒養倒損之數不及十分之一要之款段  
遲鈍類多羸瘦不堪臣等稍示戒懲輒云兌領有  
年馬已加長徒付之無可柰何細訊其故各軍利  
于免椿延捱餒養一馬之值不足以當數月之料  
銀殆與無馬等是可襲故而而不爲之一處乎合無  
候春操將畢例應驗馬之時行令太僕寺會臣等  
公同查驗中有老瘦不堪騎操者平估價值酌量



變賣短少之數仍查營中前剩馬價及積餘樁朋分給各營買補見今 禁演旣停原有壯馬三千恐內養未便人馬俱疲併乞 發下該營給與

無馬軍人領養度乎調息有法雲錦成羣儼然

國家之外廐營馬旣足草料不加省之太倉者又不啻積之 內府矣此馬匹之所當議者也

矢之利以威天下軍中之長技恒賴之然必製造精堅方裨實用京營弓矢例該三年一給俱係各省直解到及在京各廠歲造者先年所領非幹粗

難挽則觔薄易裂該巡視京營左給事中姚學閔

等具題兵部覆

准咨行工部照戎政衙門所

造式樣令其製造如法上勒工匠姓名識所精濫有不堪者許令軍士退換仍將經造員役指名叅究法甚善也近據該營軍士咸稱上年所領弓箭大半不堪不免自行置買每弓一張矢一束費銀數錢賠貼甚苦乞要改給折色紛紛爲言夫一弓一矢也造之于廠庫爲費頗多散之于營軍盡屬無用是兩失之也合無乞 勅下該部從長計議



以後應給年分改給折色令軍自行置買或發總  
協衙門酌處買給以防各軍減價塞責之弊庶挽  
強有其中可應茲費省而軍亦便矣此弓矢之所  
當議者也京都屯聚衆兵春秋操練所以振揚威  
武居重馭輕比至撤操亦當慎爲之備以故營中  
舊例每于停操月分將三大營軍士分爲四班如  
初一十一二十一等日各輪八營人馬計二萬四  
千有餘進營候點以後遇三遇六八等日俱點如  
前良以備不時調遣之用而其實官未必點軍未  
必集也相沿成法似徒涉于文具矣若卽此數以  
責其實則旬日一輪軍將疲于奔命合無酌立日  
期裁定分數凡歇操之月每間一日止用二營計  
軍六千在營擺列聽候查點則月輪一次人不苦  
難旣可以備緩急之用亦可以寬士卒之力矣此  
輪點之法所當更始以責實效者也以上數事非  
謂足以悉軍士之隱而盡營中之弊蓋臣等仰體  
宸衷據所見聞庶幾惠徼  
恩澤以祛部  
伍之積困耳如蒙  
勅下該部俯賜允行則



聖德翔洽六軍歡騰不惟安攘之圖有隆靡替而忻悅流行未必無助于昭格之化矣

營軍關係至重乞免工役以壯國威疏

題爲營軍關係至重懇乞

聖明遵

祖制

免工役以壯

國威以永治安事本月二十七日

伏見工部尚書

何一本欽奉

聖諭事奉

聖旨壽宮工程重大旣班軍不敷准照嘉靖年間例于營軍內添撥二萬名輪赴工所應役欽此

臣等竊惟

壽宮之建肇

皇圖不拔之基

番萬載無疆之慶至

鉅典也因班軍之不敷

而取辦于營軍若有甚不容已者臣等將順不暇奚宜有言第以安邦之略必資于武備之修而振武之猷莫先于訓練之豫粵惟

成祖文皇帝

定鼎幽燕倣古者居重馭輕之制設京軍四十餘萬分營命將操練惟勤誠有深意存焉者柰何承平日久尺籍漸虛嘉靖初年尚有十餘萬衆迨後工作煩興公私役占有操練之名無操練之實因循以至于庚戌之季虜薄郊圻將兵者無一敢言



戰良由無兵可用故耳幸賴

世宗皇帝赫然

震怒銳意振興一時在事諸臣殫精畢議嚴清勾  
時簡閱休養生息凡數十餘年稍有生氣肆我

皇上銳精治理加意安攘選將練兵犁然大備  
迄今邊鄙不聳虜款稱堅此非重兵彈壓之明效  
哉然而數止十萬其間荷戈敢戰者自戰兵車兵  
而下不多得焉臣等祇役以來方以整飭未遑爲  
懼若復以工程重大調撥三分之一僅餘七萬有  
奇在營操演戎行之零星可數士氣之蕭索日滋

堂堂天朝殆不可不深慮也矧營操工作二者自  
難相兼凡此三萬之軍旣已驅之工所矣彼大工  
非數年可完則各軍非數年可罷向之所教以坐  
作進退馳射衝擊者且夕惟畚鍤是務目不覩旌  
旗之色耳不聽金鼓之聲武藝生疎器械朽鈍空  
虛消耗其弊有不可勝言者兼之奔走勞苦勢必  
至于彼此告叛互相輪替各軍十萬不過三輪是  
相率而趣于疲也仰惟

聖明在御宇內又安

萬萬無他足慮然憂治危明思患豫防之策可一



日而忘戰哉不可一日忘戰則不可一日不足乎  
兵其義固較然也先是外衛班軍間充工役萬曆  
七年該巡視京營給事中李廷議等建議隨該兵  
部題奉 欽依各軍盡數入營操備不許借用  
工作軍聲賴之少振去歲撥赴工所臣等擬卽具  
奏然 慈寧鼎修孝養攸係 壽宮勦建規

畫方新且班軍一枝卽不入營操尚于營制不甚  
虧損今役軍三萬則大營之所撥已多方其練之  
也養以數十年而猶恐其不勇及其疲之也遲以  
數十年而莫爲之改圖目今開操伊邇防秋屆期  
無論遼左河西之遠卽屬夷如長董貢夷如哈不  
慎要求疑貳東伺西窺皆不可不慎爲之備者苟  
根本之地兵防少懈其于 祖宗屯兵聚衆之

議謂何夫 大工與戎政皆 國家重事也臣  
等卽待罪巡視豈敢以區區職掌惟京營之是急  
而于 大工則緩之哉盖用營軍則軍日單弱  
別無振揚威武之方不用營軍則軍日盛強尚有  
經營工作之術臣等竊有以籌之矣如蒙 皇



御賜先皇集  
上仰思

祖宗建營之意聿弘 國家講武之

規

採納臣等所言

勅下兵部會同工部

從長計處如果班軍不足多措銀兩顧覓人夫厚其資糧恤其勞役時其班限俾之樂于赴事克底成功其營軍仍令在營操練免其添撥如是則

大工允濟戎政益修兩利俱存計無便于此者

惟

聖明擇焉

供應缺乏乞崇儉德清浮冗疏

題爲供應銀兩缺乏至極懇乞

聖斷重

明旨崇儉德併

勅內外所司清浮冗以修實

政議接濟以禪職務事竊照臣等叨蒙任使守官光祿所職者

御用之供辦也所藉以克盡其

職者財用之充足也恭惟我

皇上御極以來

心存儉約用尚樽節以故本寺臣僚仰體

聖

心事事稽覈所費者無侈靡則所蓄者有贏餘除歷年正供外奉

旨取入以充別用者蓋百萬

也而本寺未甚稱乏自去歲各處災傷原派本寺錢糧部解不前九月內復奉

旨取入銀十萬



兩則本寺貯庫銀兩止存七萬餘計其應用不足五月之費也比該本寺署印少卿謝杰等具題為庫藏十分缺乏懇乞

聖明豫區處崇節儉

以足

國用以便供應事奉

聖旨既該寺錢

糧不敷內庭供應委當裁節這所奏知道了其餘該部看了來說欽此於此仰見

皇上惜財節

用之盛心明示裁節

內庭供用矣迨今已逾

五月該臣到任兩旬以來稽查庫銀止有二萬八千餘兩除二月分該給各行物料價銀一萬五千

兩零止剩實在銀一萬餘兩尚不足三月分買辦

價銀之用各處解到銀兩每月不滿數千無濟于

用是寺銀詘乏從來無如此之甚者已經二次遵

照明旨移文尚膳監查照裁節去後並未見

有分毫減省蓋未經

天語叮嚀彼雖欲仰承

德意尚不敢以自專也伏望

皇上勅下

該監查照原題事理將

內庭供應一一核實

除

上用暨各宮膳餼等項原有正額未敢輕

議其近年續奉

傳取者某項偶因一時取用今



宜停止某項不係緊要應行裁革某項卽不盡裁應減分數或憫寺銀甚缺另處內帑銀兩辦用詳細查明具奏 定奪度減一分則本寺寬一分之供而小民行戶卽受一分之賜矣臣等又惟本寺職專供應不司財賦厨料等銀俱由戶部牲口等銀俱由禮部油紅等銀俱由工部轉發本寺會同科道秤收以備買辦至於缺乏別無區處卷查嘉靖三十二年六月內爲急缺供應銀兩懇乞

聖明勅賜議處接濟以免 竇奏事該本寺題

行戶部議覆今後該寺用盡前銀如各解未至先呈戶部議處不得再三竇奏奉 世宗肅皇帝

聖旨是欽此比時本寺經用錢糧浮於額派甚多俱由戶部陸續處給濟用本寺卷簿可查自是以後費出有經寺銀充裕二十餘年不煩戶部矣目今本寺十分缺乏臣等無可措手不容不仰給于大司農之調度也卷查萬曆十二年至十五年該戶部派行各省府辦納本寺厨料襍糧等銀共拖欠二十四萬五千七百餘兩禮部派行牲口銀共



拖欠三萬八千五百八十餘兩已經部覆查催一時難以解到又查先年題准本寺每季於太倉銀庫該關錢鈔折銀四千二百五十兩一年共銀一萬七千兩湊買品物應用向因銀兩足用自嘉靖四十五年秋季起至萬曆十五年冬季止並未關支伏乞 勅下戶部設法嚴催拖欠銀兩先行酌議動支別項銀兩給發數萬以濟本寺燃眉之急待各處銀兩解到有餘照數扣補還部其太倉銀庫累年應發本寺錢鈔折銀不敢望盡數補還亦令發給數萬濟用以後年分仍照舊額關支庶上供之費不缺而臣等曠職之咎可逭矣此時公私告匱太倉空虛臣非不知而欲戶部措銀以濟寺用盖念 內府供應時刻難緩視之軍國諸需輕重較然况本寺歷年奉 旨取入庫銀一百一十萬兩則各衙門銀兩亦因是而免取矣今議通融接濟亦事理之所宜然者如蒙 俯賜允行則 國計幸甚





國家圖書館, NATIONAL CENTRAL LIBRARY, TAIWAN, R.O.C.

德陽先生集



衛陽先生集卷之四

甘陵周世選文賢父著

武林後學沈獅

較正

同邑後學沈嘉

孫男承芳編次付梓

疏

開闢荒田疏

題爲中土民困未蘇懇乞

聖慈俯賜優恤以

救殘黎以安重地事臣惟河南地當天中夙稱樂



土自萬曆十二年以來水旱頻仍殆無寧歲百姓  
流于四方轉于溝壑者不可勝紀仰賴

皇上

多方賑蠲遂致子遺之衆猶得稍稍全活去年雖  
幸有收柰氣數不齊仍有衛輝開封河南懷慶汝  
寧等府所屬獲嘉商水等州縣不收之處且春夏  
瘟疫大作病者十九死者十三總計減損戶口不  
下數十餘萬其在陳畱杞縣蘭陽儀封封丘通許  
鄭州尉氏密縣滎陽等處死徙猶多以故各縣雖  
雨暘時若而田地大半荒蕪去年秋冬迄今春月  
蓋已歷三時矣而白草黃埃猶然一望迷目臣奉

命入境之初每見窮民遮道泣告及今兩月  
以來各屬屢行具申有乞賑濟者有乞停徵者有  
稱無力備辦牛種者俱各批行查處未報臣會同  
按臣王世揚議照民窮必須賑救舉事貴在及時  
方今春已過半而各屬又散處不一倘俟查齊後  
行不免時過太晚除去年秋災地方如獲嘉等二  
十二州縣及信陽等三衛已經前撫臣衷貞吉及  
按臣王世揚題

請蠲恤不敢再議其 題後



續報如靈寶魯山郟縣寶豐伊陽裕州真陽確山  
上蔡西平遂平十一州縣暨已題而民食艱難  
如信陽固始商城羅山光山光州息縣新蔡等八  
州縣先據布政司及分巡汝南道按察使范謙呈  
乞賑濟臣等仰體德意先已批行倘有不敷

容臣等將新積備賑倉糧再行查發惟陳杞等州  
縣各荒地甚多據開封府所報畝數除祥符原武  
滎澤三縣差少不開外如陳畱縣原額七千六百  
頃有零今荒六千六百頃有零杞縣原額二萬九  
百頃有零今荒一萬八千七百頃有零儀封縣原  
額五千一百頃有零今荒四千一百頃有零蘭陽  
縣原額七千三百頃有零今荒五千八百頃有零  
封丘縣原額一萬五百頃有零今荒六千三百頃  
有零通許縣原額八千三百頃有零今荒四千二  
百頃有零密縣原額六千二百頃今荒二千八百  
頃尉氏縣原額一萬二千九百頃有零今荒四千  
二百頃有零鄭州原額一萬七百頃有零今荒四  
千三百頃有零滎陽縣原額五千七百頃有零今



荒二千三百頃有零去年既失種麥今年又失春耕倘再泄泄然不爲之所則國家正供與小民衣食將何取給臣等備詢拋荒之故雖由逃亡未復大都亦皆缺乏牛俱使然爲今之計惟有貸借一節是目前急務第累年逋負之後京邊錢糧借解無措而一切藩封供辦支費尤多欲興民事以培邦本無可措手查得臣等撫按衙門每年解進贓罰各該銀四千兩仍乞聖恩俯照上年

事例再畱一年容臣等查照縣分大小分發各掌印官除上戶免給外其中下戶并新招佃種人戶酌量給銀督令速置牛具盡力開耕官廩惟查其墾闢數日以稽勤惰不必責其償還有將領去銀兩妄行別費者訪出重究然臣等猶有說焉蓋各縣糧差皆有定額而十六年者又係見徵倘方責其開耕而遽令其納稅彼未覩收成之利先受追徵之苦卽百計招來必無敢直下承認者臣等以爲凡父子兄弟同爨及上戶之家各荒地原係已產自難他諉惟將各掌印官姑逭其叅罰督令陸



續徵輸其遠族並外人承種者本年既未種地難以責其納本年之糧似應盡數除豁容臣等督行司府各縣窮按無礙銀兩分作兩年次第處補十七年仍各派以輕折以少蘇其疲困夫各州縣原未報有災傷而臣等輒有是舉非敢罔上以行私也蓋灼見時勢至此有不得不爾者如或拘于常格而緘默不言則田地終不可闢錢糧終不可完見在者且思逃而逃者遂不復返矣恐將來之難處當又有甚于目前者伏乞 勅下該部

再加查訪如果臣等所言不謬覆議上 請將各賑濟銀米容臣等查實開銷并貸給蠲豁事宜悉照臣等所擬施行事完通行造冊 奏繳清冊送部查考如或各該有司玩忽從事致使實惠不霑者聽臣等一并叅處庶災民既有攸賴 國課亦不至逋欠矣

優禮輔臣疏

題爲懇乞

天恩優禮耆舊以昭

盛典以

隆

聖化事據河南布政使司呈准守巡河北



道咨牒據彰德府申據安陽縣申稱卷查萬曆十年十月二十四日承奉本府帖文抄蒙河南布按二司守巡河北道案驗奉撫按兩院憲牌欽奉

詔書內開一文官一品致仕及養病等項居家日久者有司月給糧米三石歲撥人夫四名應用二品以上年及八十者備綵幣羊酒存問九十以上者具奏遣使存問欽此查得本縣鄉宦原任少傅兼太子太傅吏部尚書武英殿大學士郭朴官崇一品養病家居已經照例月給糧米三石歲撥人夫四名選用訖今照本官立朝則調鼎秉衡忠貞直貫天日居鄉則蘆頑起懦雅望尤崇斗山鮐文已躋于八旬鴻羽可儀夫百世似應具奏存

問等因申府該本府看得安陽縣養病鄉宦原任少傅兼太子太傅吏部尚書武英殿大學士郭朴望重三川壽躋八袞握鈿衡而登揆席公孤之忠亮彌光謝台鼎而就里居家國之儀刑不替惟茲鄴中之元老允爲天下之達尊旣經該縣查報前來相應申報具奏存問等因具申到道備由咨



牒到司該本司看得本宦發跡詞林游登鼎鉉天之化及其急流勇退足徵完璧無瑕壽屆八旬允爲三朝黃髮望隆四海恒存一念丹心本司伏讀恩詔二品以上八十者有司存問然本宦先任吏部尚書後入內閣官至少傅似不當拘于常格也查得嘉靖二十二年該巡撫河南都御史李宗舉巡按御史楊勉學會題開封府許州臨潁縣致仕鄉宦禮部尚書兼武英殿太學士賈詠壽至八十乞要照例優禮等因該禮部覆奉世

宗皇帝聖旨賈詠耆舊重臣年躋八袞齒德並茂可照例賜以羊酒着河南撫按官及門存問仍給食米四石歲撥人夫六名應用欽此又查得萬曆十一年該浙江撫按會題原任少傅兼太子太傅禮部尚書武英殿太學士丁憂回籍呂本年當八十比例存問該禮部覆奉聖旨呂本輔弼舊

臣年及八十齒德並茂准照例賜羊酒着浙江撫按官及門存問仍月給食米四石歲撥人夫六名



應用欽此今照太學士郭朴正與賈詠呂本事例相同雖月米歲夫已經遵 詔查給仍應照例

加增伏乞具題請 旨存問并加月米歲夫等

因具呈到臣據此卷查萬曆十六年二月十二日准吏部咨爲欣逢 明主間舉曠典再懇查復

全典以優老臣以光治化事該都察院左都御史吳時來題致仕大臣張瀚曹亨等年俱七十以上乞給月米人夫優禮等因該本部覆議內開其或爵位人品年壽與諸臣同而疏內間有所遺者仍行各省撫按查明具 奏務須允孚公論毋得槩舉市恩本部候奏到之日另行酌議覆 請等

因題奉 欽依移咨前來已經案行該司通行

各屬查報去後今據前因臣查得優禮老臣載在令甲自當循例舉行至于輔弼大臣齒德並隆勞績茂著者自與他官不同如先年大學士賈詠呂本該撫按官具 題皆蒙 特恩遣官存問此

累朝優禮輔臣尊崇者舊之盛典不可以常例拘者也今大學士郭朴年躋八袞未經存問誠



爲缺典該臣會同巡按河南監察御史毛在議照  
彰德府安陽縣養病鄉宦原任少傅兼太子太傅  
吏部尚書武英殿大學士郭朴道德純粹學問淵  
源輔政 先朝洵明時之碩望養高鄴下稱洛  
社之耆英造其廬而環堵蕭然不殊寒士覲其德  
而型範自存如對古人其名位年壽與呂本賈詠  
相同而引疾乞身又與致仕丁憂有間旣經該司  
查有前例呈報前來相應題 請伏乞 勅

下該部再加查議如果臣等所言不謬將郭朴查  
照先年事例行臣等及門存問仍照例加增月米  
歲夫庶 朝廷優老禮賢之盛典益彰而所爲  
風動士心遠矣

條議救濟災民疏

題爲目擊地方災困至極略陳蠲恤末議懇乞  
聖恩俯從以蘇孑遺以濟時艱事據河南布政  
使司呈蒙臣與按臣會牌照得兩河地方數歲凶  
荒民貧徹骨今復冬春亢旱雨雪不霑兼遭異常  
風變刮損麥苗民房樹木節據各道府呈稟及各



州縣衛所申呈并各屬被災軍民各府貧宗日每擁門擴道控告蠲恤情詞懇切看得停徵蠲糧事于奏

請賑濟饑民必查堪動錢穀事在該司執掌合行查議爲此牌仰本司卽查各州縣拖欠節年錢糧某年各若干內有何項應該停蠲卽今賑濟饑民貧宗有何項堪以動支逐一查明呈來以憑會議具題施行蒙此又蒙臣批據開封府陽武縣申爲懇乞鴻恩俯賜軫念重大災傷轉達緩徵賑貸等事原武縣申爲乞憐停徵等事衛輝

府獲嘉縣申爲乞賜停徵等事又蒙批據洧川縣軍民等籍周鈍等通許縣民王尚賢等林縣民黃登榮等祥符縣民路愛等各言停徵錢糧等情俱蒙批仰布政司查議報奪蒙此又據本司經歷司呈蒙巡按河南監察御史毛在批據各縣申并周鈍等告同前事俱蒙批布政司查報抄呈到司該本司掌印左布政使孫錦議照河南爲腹心重地災沴頻仍民困已極去冬少雪今春亢旱無雨復罹異常風變據各州縣報稱被風吹斷麥根又將



麥苗沙壓皆已枯槁四野頓成赤地黎民失望扶老携幼啼泣載道見者寒心除夏災俟查明類報外第目下閭閻窘迫米珠薪桂實難度日至有食草根樹皮以延旦夕者雖經放賑如一杯水救輿薪之火曷能濟事本司晝夜籌思心神焦竭具奉檄書行催錢糧急如星火兼之庫藏空虛摻括已盡宗祿數多無從借給似宜多方議處以救目前謹抒一得列爲數款合無會題庶災民有蘇息之望矣等因到臣據此簿查先節據陽武等縣申并軍民人等各告前事已經批行該司及會牌查議去後今據前因臣會同巡按河南監察御史毛在看得天災流行何代無之或數歲間有猶可恃往日之蓄以救一時之急地方荒歉亦何處無之或此歉彼豐猶能借彼糶之餘以濟此糶之饑而民或不至流移困苦之甚乃若河南自萬曆十二年迄今水旱疾疫無歲不災兩河之間赤地千里無處不災臣等待罪茲土僅餘一年目擊舊歲夏秋二災今春復苦旱魃風霾小民無升斗之儲有



衛陽先生集  
司急催科之令譬如从病疴羸之夫元氣消鑠幾  
盡復責之負重肩鉅鮮不仆矣臣等伏思救荒之  
策不過蠲賑兩端所謂蠲者每及存留存留糧數  
本少卽十分災傷例蠲七分以槩州縣糧數總計  
之所蠲不及十分之一况官吏師生俸糧等項又  
勢之所不能盡缺者乎所謂賑者止藉州縣預備  
倉糧乃洊饑之後倉廩放賑已竭無可恃賴是蠲  
賑二者幾成虛文而小民鮮受實惠也是以臣等  
先于題報災傷數內 請留解部錢糧以備賑

濟部議止允三萬餘兩夫以百餘州縣饑民無慮  
數百萬而以三萬銀賑之所濟幾何且節准各部  
及各邊鎮移文催促緊要錢糧臣等只得轉行催  
督及據小民告蠲告賑紛然日至臣等又不得不  
行議處在有司朝奉緩徵之議夕奉急徵之文小  
民方以求賑而來又畏催科而去官民並困莫甚  
此時勢不得不乞恩于 皇上所據該司條議

救濟諸款皆萬萬無可柰何之計臣等逐款詳議  
敬爲我 皇上陳之伏乞 勅下該部再加



查議如果臣等所言不謬覆

請早賜

俞

允行臣等遵照施行 一蠲帶徵據該司呈稱查得本省十四年十五年災傷極重該前撫按具題帶徵戶部覆議每年帶徵二分奉 聖旨是欽

此復該四川道監察御史崔景榮具題分年帶徵該部覆議將十五年錢糧在十六年帶徵二分十四年錢糧在十七年帶徵一分奉 聖旨依擬

行欽此此值大計之時各州縣官因十四十五年錢糧未完叅罰又該兩院會題照舊帶徵戶部覆議各州縣官完至二分以上者准其開復原俸奉

聖旨是欽此俱經通行欽遵訖爲照帶徵之意原爲凶年拖欠豐年補足不料十六年薄收而十七年又遭全省旱災十八年春又遭風霾大旱災變疊至民不聊生管子曰其稼亡三之一者曰小凶小凶三年而大凶大凶則衆有遯去今大凶已數年矣催徵日急逃亡益衆村落蕭條幾絕人烟卷查十四年未完起運銀一十九萬三千八百九十三兩五錢三分六釐三毫一絲九纖十五年



未完起運銀三十萬六千八百八十八兩五錢八分四毫六忽三微通共未完起運銀五十萬七百八十二兩一錢一分六釐七毫一絲六忽三微九纖合無具 題盡數蠲免等因該臣等看得十四年十五年拖欠起運錢糧原有每年帶徵二分之二

旨似難別議但查十六年拖欠之數尤多見將各州縣掌印管糧等官住俸降俸督催急如星火又見徵十七年錢糧而十八年錢糧且徵派矣是五年錢糧一時並徵雖豐年樂歲民且不能供辦况數年被災疲民何以堪此臣等接覩邸報有浙直督理荒政戶科右給事中楊文舉題爲遵例勘實災重民危乞 恩破格蠲賑等事該戶部

覆奉 聖旨是這帶徵錢糧依議蠲免以甦地方貧困欽此夫兩河連歲災傷比之浙直何異皇上一視之仁自不忍獨靳于此一方也乞

勅該部覆議將十四十五年拖欠錢糧悉與蠲除庶孑遺之民少蘇而見徵錢糧亦易完辦矣伏乞 聖裁 一酌分數據該司呈稱查得戶部



題 准刊發荒政輯略內一款時當順成則

國計所需不得不嚴徵輸之令歲值災侵則民生爲重不可不存蠲恤之仁節 題事例九州縣錢糧總計以十分爲率行取給由完至八分以上者皆准起送等因今監兌員外郎林廷陞題十六年未完錢糧戶部覆議將河南未完錢糧州縣官員掌印管糧等官徐夢麟等七十二員照災疲事例分別住俸降俸候完至九分以上方准開復等因奉 聖旨是欽此已經通行欽遵外但思河南

重疊災傷自十四年至十七八年無歲不災特十六年薄收而又值瘟疫子遺之民瘡痍未起罹苦已極若欲目下將十六年錢糧完至九分民力實不能堪且部議叅罰旣照災疲事例減等矣則開復之例亦照災疲完至八分准其開復似不爲過也伏乞會 題等因該臣等看得完糧不及分數叅罰住俸降俸官員完九分方與開復原俸者固有 明例而荒政輯略開載完至八分以上行取給由准其起送者是又寬恤之一道也夫各官



之叅罰旣以災疲而量寬則開復之分數亦當以災疲而量減乞

勅該部覆議容令見今住俸降俸官員完至八分照例開復原俸則不特官免一分催徵之苦而寬一分民卽受一分之賜矣伏乞

聖裁 一豁班價據該司呈稱查得本省各衛所應解宣府大同榆林三鎮班價係各軍月糧內扣除而各軍月糧係各衛所屯糧內出辦茲屢遭災傷屯種拖欠年復一年月糧尚患不敷班價憑何扣解拖欠數多勢實難完卷查萬曆九年蒙前撫按題將隆慶五年起至萬曆六年止拖欠宣府大同榆林三鎮班價銀共八萬一千五百六十二兩一錢六分九毫一忽請 旨蠲免兵部

覆題奉 聖旨該衛所班銀自萬曆六年以前拖欠的都准蠲免以甦軍困欽此通行欽遵訖一時萬軍感戴 聖恩懽呼動地始得安生今查

自萬曆七年起至十五年止拖欠宣府鎮班價銀二萬五千九百四十四兩五錢一分四釐六毫拖欠大同鎮班價銀一萬五千一百七十三兩四錢



八釐五毫三絲四忽七微拖欠榆林鎮班價銀七千四百四十七兩一錢通共欠銀四萬八千五百六十五兩二分三釐一毫三絲四忽七微爲照拖欠班價與萬曆九年事體相同而頻年災傷比之先年尤重軍困尤爲可憫卽十六七年者尚不能納而况責其輸往歲之拖欠乎縱使日加敲朴徒于天和終爲無益恐相率逃亡行伍愈爲空虛合無會題照例請豁等因該臣等看得節年災傷州縣小民皆蒙蠲免而循所屯糧止議

折銀各軍金不容惠其勢自難完辦以故拖欠數多前項班銀何從扣解及查萬曆九年前撫臣褚鈇按臣許子良將歷年拖欠班價八萬一千有奇題請蠲免邇來災變甚于往時尤宜軫恤而所欠之數僅當一半更易處分乞勅該部覆

議將萬曆七年起至十五年止拖欠三鎮班價照例豁免庶貧軍亦蒙蠲恤之惠而不至獨抱向隅之悲矣伏乞聖裁一補宗祿據該司呈稱

查得周府宗儀祿銀原額徵派六萬五千八百



三十四兩九錢三分一釐三毫六絲三忽一微九  
纖各項補祿銀一十八萬一千三百五十九兩一  
錢五分二釐二毫五絲四忽五微六纖通共銀二  
十四萬七千一百九十四兩八分三釐六毫一絲  
七忽七微五纖若使盡數解完宗祿何患不繼顧  
此項係存留錢糧每遇災傷照例蠲免卽有司視  
爲稍緩多不依期完解拖欠數多本司難以措辦  
自 潞府分封之後節該戶部題 准將汝府

原派祿糧并官軍俸月糧及莊田子粒等銀共二  
萬六百五十八兩三錢向係 周府補祿者俱屬

潞府支用節蒙兩院具 題各宗增添祿糧又  
不下一萬餘兩是本司歲入之數比舊少二萬餘  
兩歲出之數比舊多一萬餘兩矣財非神運鬼輸  
止有此數旣缺數萬將何支持且庫藏數十年所  
積爲造 潞王府第之用費幾二十餘萬此又不  
在數內也一旦祿糧缺乏宗儀叢聚動以千萬計  
嗷嗷待哺羣聚擾攘深屬隱憂卽今無祿 宗室  
日在撫按衙門告賑其勢誠急其情誠可憫豈可



不亟爲之圖乎本司庫內鮮有堪動銀兩惟查一項缺官俸薪齋膳等銀每歲雖無定數大約近數千兩舊係解京之數近題 准留本省備賑之

用又一項扣留兌軍銀每年解部濟邊銀一萬兩又一項種馬草料銀每年解京二千七百八十六兩又一項戶部每年解京事例銀若干又一項工部每年解京事例銀若干夫此數項均非正項定額似可留爲每年補祿之用合無會 題將缺官俸薪齋膳等銀數千兩兌軍解部濟邊銀一萬兩

種馬草料銀二千七百八十六兩係萬曆十七年者准留見今賑濟貧宗之用自十八年以後全留本省爲補祿之用其戶部事例銀十八年已蒙本部題 准留爲本省賑濟之用工部事例銀尤

望將十八年全留本省補祿自十九年以後戶工二部事例銀將上半年者照舊解京下半年者留本省補祿著爲定規等因該臣等看得額派 王府祿糧并各項補祿之數皆係存留錢糧節年災傷重大蠲免過半不敷支給今 潞府新封又撥



給二萬有奇加以新增宗祿一萬是所入之數漸少而所出之數漸加將來真有可慮據呈請

留抵補誠有萬不得已者乞

勅該部覆議准

留前項銀兩以補宗祿支用度祿糧稍可支持而

宗儀無枵腹之患矣伏乞

聖裁



衛陽先生集卷之五

其陵周世選文賢父著

武林後學沈獅

較正

同邑後學沈嘉

孫男承芳編次付梓

疏

條陳理財六議疏

題爲 國計匱甚經用難支遵奉

明旨敬陳

理財六議以備採擇事萬曆十八年六月初四日



准戶部咨爲

國計空虛天災疊至懇乞

聖

明博採羣議措財用以裨修省事該本部題稱太倉銀庫每歲出數不下四百餘萬曆十七年歲入止三百三十九萬見在庫窖銀共止一百五十餘萬事在燃眉勢難支持欲令南北兩京九卿科道等官凡生財節財之術足國足民之方各述所見具奏等因奉

聖旨連年歲荒民困徵輸不前以致國計空虛經用不給朕覽奏惕然依擬着兩京九卿科道官悉心計處條議具奏欽此移

咨前來除欽遵外臣捧讀

綸音不勝駭愕不

謂國家財用匱乏一至此極乎凡爲臣子者觀此罔不慄然疚心不獨抱杞憂而已也臣雖至愚極陋叨廁九卿之末待罪一方豈忍緘默以負我

皇上求言之意乎臣謹會同巡按河南監察御史毛在看得自昔言生財之道者不過曰開其源節其流而已所謂開其源者生衆爲疾裕民之力也所謂節其流者食寡用舒薄民之征也邇年來災疫頻仍閭閻困救民力殫竭至甚矣我



皇上賜蠲賜賑凡可爲民生計者似已無所不至  
乃催徵檄牒自存留應免外猶復督促如故凡以  
國用不足也而國用不足凡以用財無度也  
苟不能節財而必取供于民則民力愈困徵輸愈  
難矣故今之理財斷斷以節財爲先也而節財之  
大者如清內庭額外之供停織造不貲之費裁  
錦衣冗濫之員等項事宜我皇上自有獨斷  
在內九卿科道自有建白竝見次第舉行矣臣待  
罪地方不敢議及謹遵明旨博採地方各官

條議以其可行者列爲六款大略皆裁節繁冗之  
意蓋將以行之一方推及天下積之杯勺聚爲鍾  
釜或可以裨度支萬分之一也伏乞皇上勅

下該部再加查議上

請允賜施行一方幸甚

天下幸甚臣等亦幸甚矣一汰冗員臣等議照

朝廷設官分職必盡器使之能如其冗濫徒  
糜餼廩孰若裁減以省財用查得河南一省教官  
凡縣學之大生員多至二三百名以上者舊設教  
官三員無容議矣其止百餘名不及二百名者止



設一諭一訓如汜水等十二學是也亦有生員不滿百數止設一諭者如南召桐栢二學是也今查得原武密縣涉縣修武孟縣永寧六學生員不過一百名滎澤河陰二縣生員不過六七十名而俱教官三員南陽府學生員二百二十餘名教官五員鄧州學生員一百七十餘名教官四員俱似太多合無將南陽府并鄧州原武密縣涉縣修武孟縣永寧滎澤河陰十學各裁訓導一員南陽府止存一授三訓鄧州止存一正二訓原武等八縣各

存一諭一訓亦足教士其所省各官俸薪等項銀兩俱解布政司每年終類解戶部濟邊支用仍乞

勅下該部通行天下各省直查照一體議裁

施行倘念教官寒苦改選爲難姑俟陞遷事故後停缺不除庶通便宜之權於節縮之中又垂憫卑官之一道也伏乞 聖裁 一裁冗役臣等議

照小民之役在官者自古有之然皆民親供役期滿而代更番輪換民不知苦嗣後變爲免役民止出錢顧募近行一條鞭法止于槩州縣通融徵銀



在官聽人應募充役而民愈稱便但近年在外司府州縣官員多好侈靡所役門皂防夫民快等役每員動至數十名張蓋執仗前呼後擁以壯威儀行部則又有旗幟鼓吹騶從頗都前項人役工食皆係小民膏脂真可謂冗食所當裁簡者也自今以往合無限定名數先從臣等撫按衙門裁起一應內外班皂快等役止取足用其次司道其次府州縣有司一體酌量裁省有事行部并經過官員並不許張大旗幟擅用鼓吹違者聽科道撫按指名叅究至于各州縣原設巡捕兵快隨巡捕官緝拏盜賊自不可少又有一等民壯專備護守城池迎送上司過客并押解人犯投遞公文雖經裁過則州縣尚存一二百名夫護守城池誠切務也押解人犯投遞公文猶公事也送往迎來是亦不可以已乎亦應再裁伏乞 勅下該部再加查議通行天下各省直撫按等官查各衙門原設各項人役多寡分別酌量裁減各撫按官將革過人役查明造冊計算減省工食銀若干見經徵派者盡



數起解濟邊以後免派以蘇民困 國計民生未  
必無萬一之補也伏乞 聖裁 一減班軍臣

等竊惟京營之制每三千人合爲一營以一將統  
之自副將以下所統不過三千至于班軍考之昌  
薊兩鎮亦然蓋每營立中軍一千總二哨官六上  
下統率易於鈐束法最善也昔臣選曾以戶科給  
事中巡視營務見各班操官軍則不然如 中都

春秋四班每班軍七千餘名四班共二萬八千名  
以都司四員統之山東春秋二班每班軍五千餘  
名共一萬名以都司二員統之是每員統軍二營  
其事權反加於副將之上相沿久矣爾來恭遇

壽宮之役各班軍不入營操專一運土運料舍  
戈矛而荷畚鍤者已十年於茲矣由是老弱不汰  
惟取充數逃亡不補惟責完工甚至扣軍月糧顧  
募攬頭代役往往百人存半習爲故常虛冒錢糧  
莫此爲甚今歲 壽宮停役前項班軍例該入

營隨操舊例每都司一員揀選精壯軍人三千名  
合爲一營操練其餘老弱不堪者悉發備兵營聽



衛陽先生集  
用夫兩省班軍固多乃半入備兵雖多亦奚以哉  
至如歲供錢糧每軍月糧每年折銀二兩八錢八  
分上班到京又支行糧本折每軍每年銀一兩二  
錢連月糧每軍共支糧銀四兩八分如 中都山  
東每班除每營三千名外 中都多軍一萬六千  
餘名山東多軍四千餘名二省共多軍二萬餘名  
每年費銀八萬餘兩除月糧係各府州縣衛所出  
辦外其行糧二萬四千餘兩俱動於太倉近戶部  
查議歲用不敷此其一也夫 朝廷設營軍以

壯 國威而又益之班軍誠欲其主客之兵相兼  
練習以爲一日之用故不惜數萬膏脂以養之今  
率多老弱充數虛費錢糧於萬分難處之日不亦  
可惜也哉合無乞 勅該部查議將前 中都

四班山東二班多餘班軍之數盡議裁革其歲需  
月糧出在他省者不敢遙度輕議以歸德一衛言  
之該衛班軍三千隸 中都都司統領而月糧則  
取給於河南每歲動費一萬餘兩頻年災沴相仍  
軍民死亡相半合無揀選精壯者一千五百名照



舊選委指揮等官管領與 中都所屬合營操練  
中有老弱不堪者發與該衛城操每月量給三斗  
餘五斗扣折銀兩解部至于逃亡失額者盡數扣  
解大率一千五百名之中老弱逃亡俱半歲可省  
銀三千餘兩至于山東直隸所屬亦照此例查覈  
大約可共節省銀三萬餘兩通行解部濟用如此  
庶營軍精實而虛冒可除矣伏乞 聖裁 一  
停打造臣等竊惟天下成造軍器每歲解交內庫  
以備京軍操守之用固定制也今當 國計空虛  
之際可無從權暫停之議乎蓋各省直歲造完解  
行之二百年來無少欠缺內庫充盈取用不竭甚  
有堆積腐爛無所稽考者矣計河南一省軍器料  
價該民七銀一千三百餘兩軍三銀七百九十餘  
兩脚價銀九百零五兩共銀三千兩有零河南一  
省若此而他省直可計矣其類造數多者則錢糧  
又有浮於河南者矣合無暫停一二年或三四年  
前項料銀脚價盡數解部行之天下通計遙度歲  
可得三四萬少充 國用俟年豐用足仍復其舊



庶幾財用武備相濟而不相病也及查萬曆十年起至十四年止曾經半造折價一半解部倘謂軍器不宜缺乏照此半造之例行之亦可至于各衙門解造器皿等項如此類者逐一查如穀數年支用姑停造解價濟用亦一時週變之法也伏乞

聖裁 一廣開納夫入粟拜爵之議始于晁錯然迄今千年後卒從其議者良以理財之策不能越此也查得戶工二部見行事例業已遵行矣其工部原議開納今議停止者十七款河南自止例之後布政司所收事例銀頓覺太減近見科臣條議部議復開是誠不可不開也此外尚有可增者如各途守候一官有父母年老或本身年老竟需次無期終身不霑一命之榮者若徬往年空選速選之例再舉曠典援納必多又吏承等項有緣事問革前程者除奸盜犯賊太惡外倘出一時註誤詞訟攀搶問革許令納銀辯復酌量等第以定銀數則就者尤多似皆於事體無礙也伏乞勅下戶部再加查議除工部停過事例一十七款



已經議行外仍查先年空選速選之法及推廣事例將緣事問革援例監生吏承人等查係註誤致罪及不犯重情者照原納銀數上納准復原役聽選聽缺等項施行各照該府近題事例於本省上納至原定日期爲止如此庶開例旣廣納者自衆錢糧倍增而國用自裕矣伏乞 聖裁 一

廣贖罪臣等查得五刑之罪惟死罪與充軍及口外爲民之罪皆不准贖臣等竊謂死刑之不可贖無容論矣如遣戍編氓之罪本以懲姦而姦豪之輩雖經解發旋復賄逃屢解屢逃殊無益於營伍徒爲貪汙軍職開一駟局耳不若多定贖銀以濟公家之費爲愈也又如軍職立功調衛俱有贖銀事例其犯該充軍者亦應定數納贖乞 勅該

部再加查議通行各省直將前項充軍爲民及軍職充軍人犯除情罪重大不許濫贖外其有所犯稍輕可許納贖者多定以贖罪銀數有犯願納贖者聽從便不願納贖者照舊發遣編發此項銀兩行各撫按衙門置簿登記候年終造冊先行送部



俟追完日盡數解京濟用如此度贖刑既寬人樂輸納于帑藏亦未必無少補矣伏乞 聖裁

議臨德倉糧改折疏

題爲臨德倉糧萬分累苦乞 恩照例折銀徵

解以救倒懸事據河南布政使司呈蒙臣批據本司分守大梁帶管清軍糧儲道左叅政李維禎呈萬曆十七年十月等月據汝州禹州鄭州等州魯山汝陽湯陰遂平扶溝郟縣等縣民馬自強吉尚仁張守道趙良牧等數百餘人連名告爲幫銀救命等事俱稱臨德二倉糧原止八錢折色不知何故改爲本色每一石糧費銀二兩餘尚不能完私下無幫貼官府無扛解除田產傾費賣男鬻女尚難足數兩處牢獄不得生還情極困苦查得山東三百里外俱係折銀河南地方皆在三百里外乞爲此比例甦命等情到道具呈到臣詳批仰布政司會同糧儲道查報又蒙巡按河南監察御史毛在批據該道呈同前事蒙批布政司會同糧儲道查報蒙此依蒙劄行開封等府及汝州查議去後續



據各府州申稱臨德二倉糧原係無麥納米每石徵銀八錢僉收頭解納雖有使費不甚賠累自萬曆十五年爲始俱徵本色自八錢之外絕無一毫津貼原與漕糧不同戶部亦照漕糧事例扣算每石所費過倍八錢之數尚不能完以致監追死亡及破敗家產鬻賣子女者在在皆然合無仍舊徵銀解納庶幾少蘇民困等因具申到司該本司左布政使孫綜會同帶管糧儲道左叅政李維楨看得河南總會文冊漕運兌軍米共三十一萬內二十萬原額派京通倉謂之正兌十一萬原解臨德倉而改運于薊密永昌四鎮謂之改兌俱派于秋糧內外有原徵解臨德倉糧八萬石派于夏稅內無麥折米無米折銀每石該銀八錢民間謂之八錢倉相沿已久不甚賠累自萬曆十五年以兌軍多因災傷改折乃將此八萬石俱改收本色原議八錢之外無一毫使用四季隨人上納米價消長不一而二倉積役勒指太甚掛欠籌斛不得掣批傾家蕩產賣男鬻女兩處監併殞命亡身如各役



所告各府州縣所申者誠可憐憫竊議夏稅秋糧  
既一條鞭徵收則此八萬石米亦宜於秋收後開  
倉徵納仍照舊例每石徵銀八錢秋收之後徵銀  
完日各州縣解司差官類解亦不得仍前任有司  
不時開徵大戶零星運解以滋多事之擾 國儲  
民隱兩無妨礙呈乞早爲題 請等因具呈到

臣該臣會同巡按河南監察御史毛在看得臨德  
二倉糧米徵收本色以供軍需似難輕議改折但  
自河南至山東地方道里甚遠大戶必須到彼糴  
買上倉苦被歇家斗行勒措而衙門使費更屬不  
貲原議每石八錢此外別無耗增民間賠累誠爲  
不堪且臨德二州商賈輻輳每年山東與河南兩  
省兌軍米俱在此處收買多至百萬石以上卽欲  
收買此八萬石米亦自容易米價隨時高下有八  
錢可買二石之時若以河南八萬石改爲折色解  
納本倉自行收買本色則折色之有餘亦可以備  
本色之不足若因時制宜本折各半以放軍糧則  
不惟無害於民而亦有便於軍不惟無損於河南



衛陽先生集  
而且有利於山東况八錢折色原自舊例非今日  
創議所當亟復者也既經該司道會議前來相應  
題 請伏乞 勅下戶部再加查議覆  
請將河南臨德二倉八萬糧米照依舊例每石徵  
銀八錢各州縣每遇秋成之後解布政司差官總  
解各倉上納於 國課軍儲原無虧損而災民賠  
累之苦庶幾少得蘇息矣

鄭王孝行疏

題爲際遇

恩詔公舉

親王忠孝以彰風化

以勵諸藩事據河南布政使司呈蒙臣批據 鄭  
府長史司呈前事蒙批仰布政司會同按察司查  
例通詳繳又據本司經歷司呈蒙巡按河南監察  
御史毛在批據 鄭府長史司亦呈前事蒙批布  
政司仍會同按察司查報蒙此行據懷慶府申據  
本府儒學申稱隨將闔學廩增附生員何應符張  
守業郭之禎等與集明倫堂公議據各生呈稱符  
等詢之父老考之典籍查得 鄭府親王抗疏  
世廟致蒙南遷一十八載 穆宗登極首詔



歸國仍加歲祿一百石以優異之至事母闈妃生則視膳問安薨則喪葬盡禮忠孝兼全已奉有

明詔及懷民耳目睹記鑿鑿可據允宜公舉表揚以勵諸藩等因呈報在官惟恐不的覆據各生結稱查得 鄭府親王慎厥身修恪遵侯度好學不倦樂善有誠仁陸宗媯義繩軍校抗疏 世廟爲國家而畢殫忠誠聞喪 穆皇遠宮寢而

極盡哀毀事母闈妃生則視膳問安病則進藥嘗穢薨則寢苦枕塊葬則執紼扶輦精忠大孝卓冠

宗藩公舉表揚允孚輿論結呈到學覆勘相同

又准 鄭府長史司牒稱卷查萬曆十一年正月初六日該本府 廬江等王厚光等手本開稱伏

覩 詔書內一款宗室有能飭躬修行孝親敬長樂善好學敦宗睦族足以激勵世風者許各撫

按官具實奏 聞獎勸欽此除欽遵外今照

鄭王忠貞性賦孝友天植先年抗疏 世廟修

德講學裨益 朝政及其奉養母妃備極誠孝

生事死葬風動國人其敦睦宗親撫恤軍較樂善



好學亶亶忘倦善行尤多枚舉不盡理宜應

詔據實開具手本送司竊照忠孝係經常之大敦睦爲風化之原今以親藩而陳言建白已見貞心以高年而執喪哀毀尤徵純孝况敦朴範躬謙和睦族潛心博古樂善不倦是誠足爲世風之表率者今該各宗開送前來理合具請備由於本年閏二月初四日具呈

欽差巡撫河南等處地

方兼提督軍務管理河道都察院右僉都御史褚鈇批行布按二司會勘明的具呈兩院至今未蒙

詳示今奉行查理合查照原文開報及查嘉靖四十五年十二月二十六日爲

開讀事禮部題

稍鄭王以宗藩懿親效陳忠款顧遭誣構禁錮多年海內人心久已共惜所當釋放還國復其原爵題奉

欽依准復爵仍歲加祿米一百石欽

此則王之忠貞已大彰明較著矣等因備牒到府具申到司該本司左布政使孫綜會同按察司按察使王來賢看得

鄭府廬江等王保舉

鄭

王忠孝友愛樂善好學等項既經該府覆勘實跡



可據查例似應奏

請旌獎但

恩典出自

朝廷合候會

奏定奪等因備呈到臣據此

簿查先據

鄭府長史司呈前事已經批司會查

去後今據前因臣會同巡按河南監察御史毛在

查得

宗藩要例內開

宗室中有孝友兼至足

以激勵風化者各具實跡奏

聞以憑覈勘明

白或立坊旌表或請

勅獎諭或加贈封號長

史教授官并宗儀人等不許需索抑勒亦不許扶

同欺罔有孤

恩典欽此臣等議照

鄭王厚

焯大節炳于

先朝孝德孚于宗議學校同舉

司府共推洵爲

天潢之耆碩堪作

藩王之

標準相應照例題

請旌表以樹風教伏乞

勅下禮部再加查議上

請定奪

薦舉方面官員疏

題爲循例薦舉方面官員以備擢用事臣惟藩臬諸臣表率一方責任甚重臣撫綏兩河將及二載與諸臣共事日久知之頗真今茲叨轉例應舉劾除有疵議者近已糾論臣不敢復行毛吹外訪得



河南布政使司左布政使孫綜任重道遠之偉器  
處繁治劇之宏才籌帑若持衡而裕國利民兼濟  
評官如懸鑑而肅僚甄吏咸宜分守大梁道左叅  
政李維楨清冽凜寒潭徹底鎮靜儼巨嶽憑天明  
炳幾先而運用動規于渾厚思超物表而畫裁雅  
妙于平明分守汝南道右叅政郃永春負百折不  
回之操守一塵不染之介精神罔露而機務應若  
運斤惻怛恒存而吏胥凜然授組按察司按察使  
王來賢才幹行雲流水心情白日青天運施注以  
從容而政修事集籌機宜以敏捷而吏畏民安提  
學道副使周夢暘才品高潔器局端方注措得于  
歷試之餘而寬嚴得體文藻發于裕養之後而經  
緯有章管河道副使李三才沉毅靜雅正直溫恭  
樹鎮洛之屏籓而壯猷夙著振防河之籌策而偉  
績聿新大梁兵巡道僉事王九儀資性嚴明渾厚  
施爲博大精詳釐治不爽而一路風清詰戎有方  
而千里警息以上諸臣皆藩臬之良所當薦揚以  
備擢用者也內部永春近雖報陞尚未離任李三



才任未及期轉自本省俱例應併薦伏乞  
勅  
下吏部再加查訪如果臣言不謬將孫鏞等循資  
擢用庶賢才益勸治理有裨矣  
！



衛陽先生集卷之六

其陵周世選文賢父著

武林後學沈獅

較正

同邑後學沈嘉

孫男承芳編次付梓

疏

整飭營務疏

題爲邊報可虞 國威宜振及時整飭營務以禪  
安攘實用事方今西有叛賊勾連黠虜尚未擒滅



東有倭寇攻破朝鮮頗聞猖獗正四郊多事之秋

爲 主憂臣辱之日臣以庸朽媿無能獻一策

効一力以報 皇上拔擢之恩乃不蒙 斥譴

且以京營重務 命臣協理臣自受事以來日

夜籌度京營有居重馭輕之勢人臣貴安內攘外

之圖必營務整擻而 國威丕振斯 皇靈震

疊而外患潛消臣見近日京營較之數年前臣爲

科官巡視時有大有可觀軍無虛冒將能奮發有敢

于赴鬪之氣有多中銀牌之能昨因警報兵工二

部悉心查給器械火砲等件似已堪爲攻守之具

矣第軍數固充未必皆可用之夫將官雖備未必

皆適用之材操法尤當更定下情亦宜體恤置器

有應給費用造車有未盡事宜此在平時尚應熟

講矧今用武之際乎該臣會同總督京營臨淮侯

李言恭起今開操在邇一一查行副叅等官會議

應行事件擇其緊要切實者開款上 請如蒙

乞 勅兵部作速議覆行臣等遵照施行庶營

政修明軍聲震懾 國家之神氣允肅而安攘之



實效可臻矣 一嚴挑選以振行伍照得治軍之法惟選與練欲練不選則勇怯雜處強弱相參怯弱之人不惟無益于用且爲強勇之累故挑選官軍不可不急合無於開操之際先將三大營各中軍千把總有堪領戰車而見任城備者有止堪城備而見任戰車者容臣等會同巡視科道官郭士吉等逐一從公遴選更換務在因材施教使而各盡所長仍併行各該營將領將本營隨伍軍人嚴加選擇汰其老弱或祖軍或召募有丁者責令告替無丁祖軍退發備兵召募者另募壯丁補伍其選鋒內有年衰而勇力不加或年壯而技藝生疎者一體退發軍伍卽將本營單糧選鋒選取五名呈送試驗如果年力技藝俱優者照名頂補若補單糧選鋒名缺其試驗亦如之至于戰兵車兵乏人取于城守城守乏人取于備兵各拔最優者充補各將領中有徇私不行用心揀選者聽臣等指名重加叅治庶挑選之中寓激勵之意將見勇敢彙集精彩自倍又何外侮之不可禦哉伏乞 聖



裁 一議畱操以精技藝照得京營操法寅時進營辰時散操此舊規也今當有事之秋豈可盡拘常調况操演止于移時教練未必精細欲一旦驟更俾之過難則又于人情不便合無自開操之日爲始每日臣等抽籤調閱者不計仍行各該營將領除照常散操外各畱一司或較馬步射藝或演刀鎗短兵或放大小火砲其中把合式者量行給賞以恤其勞生疎不堪者另加懲治以警其惰操至未時聽落號帶方行解散倘各軍士中有愚頑不遵約束者該營將官呈解軍門聽臣等以軍法從事計可入操二次各營各司遍練一番庶操遊之時旣久技藝之習自精一日之專工可抵數日之泛練良法無踰此者伏乞

聖裁

一立教

師以便操演照得京營軍士舊習器械止于弓箭刀鎗大小砲等件近以倭奴警報因倣浙兵所用行令各該將領每營各造長鎗二百杆狼筈一百杆俱已報完但舊無精于運使之人孰爲教練師範查得薊鎮守臺浙兵慣用鎗筈合無

一諭令



兵部移文彼中督鎮擇取能教前項器械南兵三十名令其作速咨送前來以憑分發各營教演如古以一教十十教百百教千千教萬之法而行之每日聽臣等量加犒予俟其有成再加優犒彼中勿扣其月糧事完發回照舊防守庶鎗筦不致徒設而可爲刺擊島夷之利器矣伏乞 聖裁

一復行糧以鼓士氣照得京營軍士一年所得月糧合本折通算不及在外州縣一民壯工食欲其盡日操練而不早散別營也焉能撐持况應操之日多自遠方而來今欲如前項畱操不加優恤益重其苦何以責其安心操練而可資禦侮乎查得嘉靖年間每遇防秋開操各軍一槩給行糧四斗五升嗣是或減或增未始通裁蓋示優恤之仁以寓激勸之意耳迨萬曆五年議將戰車營軍均支三斗城守罷支雖名節費其實病軍故當時主議者亦云萬一有警聽該營酌處今之時似亦非平寧無事之時也各軍行糧委宜均加合無 勅下戶部會同兵部作速議加行糧庶各軍養贍有



賴而畱操責備可行矣伏乞

聖裁 一厚處

給以修器械照得在京軍士尋常赴營操練辦備  
衣帽修整器械等項止靠月糧充費已難支持萬  
一有警列營則隨營所用器具除官給鎗刀火砲  
等件外定有雜用如柳鈴燈籠水篋鍋席之類俱  
係自辦臨時督責尤恐不堪且生別弊其所領刀  
鎗等件用時無不自行修治卽如近領弓箭一時  
俱係檢選無不堪者恐過幾時亦須整修方可適  
用若不及時預爲處給使各軍修理各項器械以  
備臨時急用非桑土綢繆之謀也合無 勅下

兵部查議每軍量給修械銀二錢或三錢其領弓  
箭各軍行令工部借給各省應解未到十九年二  
十年原議折弓箭銀兩每軍四錢或五錢以爲臨  
時整修弓矢之費庶各軍禦敵有賴而用命心切  
矣伏乞 聖裁 一議車軍以便衝突案查本

年三月內該暫管戎政兵部左侍郎王基 題添  
標營軍人二千名舊共五千名分爲二營操練又  
添造輕車二百四十輛今將漸次造完相應卽演



分合衝擊之法必得精壯軍人運駕方可演習每車計用車丁三名兩輛當立車正一名以司分合之令共車二百四十輛應用車丁七百二十名車正一百二十名共計司車軍士八百四十餘名時近開操運習尤爲喫緊若干本營五千名內撥用前數教演輕車誠恐營陣單弱合無于三備兵營內挑選壯軍八百四十餘名或另行勾募完足行令坐營官何良臣等教習演練以成二大營庶營無虛車之設而戰有衝突之用矣伏乞 聖裁

一置車房以防損壞照得三大營戰車原各造有車房以遮蔽風雨免其敝壞今標營輕車造石次第見寄安于崇國寺各簷下至于長鎗狼筈藤牌砲銃叉弩鏃鏢之類止令各軍隨帶回家寄放均非妥便長久之計倘有傷損不無虛費錢糧合無查照各營車房事例每車四輛用房一間計車二百四十輛宜造車房六十間于各營教場空閑處所收貯前車再造局房十間于車房之側以便安置鎗筦等物其各車仍有合用隨車器具如軍



御賜先生集  
幕每車一頂共該二百四十頂軟簾每車一副共計二百四十副旗幟二面共計四百八十面小窩鋒砲五門共計一千二百門每門火箭五十枝共計一萬二千枝小拒馬鎗二架共計四百八十架此戰車應用器具相應一併速行置辦者乞勅工部將軍房並火砲火箭拒馬鎗等項建蓋估造其軍幕軟簾旗幟等項動支太僕寺原收本營籽銀置辦庶標營車輛有濟用之資無損壞之慮矣伏乞 聖裁

條陳新舊諸營兵食八目以圖戰守疏

題爲倭警未寧武備宜飭條陳新舊諸營兵食八目以圖戰守以固根本事職方清吏司案呈奉本部送准兵部咨爲倭奴假詐已彰當事玩愒如故伏乞 聖明嚴加責成以圖萬全事題覆兵科都給事中吳文粹等題前事兵部覆議內開移文南京兵部及督撫衙門所有整備海汛防範內地一切事體上緊料理其間兵食之應議處將吏之應去畱務在春汛以前亟爲處置等因奉 聖



旨是日今歲荒民困內患當防不止備倭一事依擬行各該地方申飭區處毋得怠玩欽此欽遵各部送司案照近年倭奴寇陷朝鮮聲言入犯內地南京一應募兵防禦事宜已經本部先後條議舉行外尚有將領兵食諸務事關戰守應爲申飭區處者條列入事呈乞具題施行案呈到部臣惟畱都根本重地兵曹機務要區當海寇未平之時正兵戎預詰之日君門萬里猶懸宵旰之憂臣職一方敢忘旦夕之計受命以來隨

事整飭一切載在令甲題議一定事可徑行者俱經遵行不敢槩請今據該司條陳八事皆

申飭將吏料理兵食所以節制舊軍鼓勵士氣調度新兵裨益營務蓋亦有相資並用之機焉相應開列上請乞勅該部再加查議恭候

命下行臣等遵奉施行一精簡核以重將領夫將三軍之司命也選兵練卒料敵制勝撫士之恩馭衆之法不一其事惟人所行南京各營大小將領每年終本部會同科道舉劾獎戒一次法至



密矣坐營諸員經薦數多屢歲未擢者雖人稱淹滯而備倭方亟未可易將本兵自有鑑衡至如不肖將吏論罷未及擁虛噐而冒爵賞者尤宜核實精簡要在得人不妨更易今查得新江口營把總孟熊孱柔懶惰庸瑣沉酣遇事毫無處分戎務廢閣點軍擅自科罰操守卑污小教場把總陸泌質本委靡才復庸劣識不諳於世務安解兵機事每見其曠弛徒取充位彼雖經戒飭未能卽改似應革任回衛另選知勇材官代之庶將領無具員而營務當益振矣以後查有不堪如孟熊輩不拘坐營把總容臣等陸續叅革其衛總以下有不堪者本部徑自革換施行伏乞 聖裁 一揀選鋒

以待攻戰夫軍無選鋒曰北軍之貴選鋒也尚矣南京大小二營各選鋒把總三員選鋒衛總六員神機營選鋒把總一員選鋒衛總一員浦口池河各選鋒把總二員選鋒衛總二員總計選鋒之數不踰八千蓋貴精而不貴多也顧自萬曆元年立有選鋒迄今二十餘年雖歲有會選替役月有



衛陽先生集  
事 故 照 補 而 舊 伍 存 留 寧 有 疲 病 乎 父 老 子 替 豈  
皆 精 壯 乎 合 行 選 揀 不 堪 者 歸 常 伍 操 備 甚 不 堪  
者 歸 本 衛 別 差 而 以 常 伍 新 補 壯 丁 及 戶 口 上 冊  
餘 丁 年 二 十 以 上 四 十 以 下 者 選 充 前 役 其 選 退  
之 法 行 令 管 貼 隊 選 送 衛 總 衛 總 選 送 把 總 把 總  
選 送 坐 營 守 禦 官 坐 營 守 禦 官 精 選 具 選 存 選 革  
冊 二 本 報 本 部 司 官 會 同 科 道 面 試 提 石 以 觀 其  
力 二 百 斤 者 爲 上 一 百 五 十 斤 者 爲 次 懸 手 移 足  
五 步 爲 率 仍 復 校 其 射 藝 優 者 卽 令 入 營 就 練 選  
補 之 法 各 衛 具 名 送 司 對 冊 查 照 各 營 衛 分 行 坐  
營 守 禦 官 坐 營 守 禦 官 行 把 總 把 總 行 衛 總 限 與  
選 鋒 軍 同 時 點 揀 具 選 收 選 退 冊 二 本 報 本 部 送  
選 如 前 選 畢 仍 令 各 官 會 官 約 日 齊 赴 各 教 場 覆  
點 取 結 收 伍 以 防 代 替 以 後 各 官 常 川 操 練 本 部  
與 科 道 將 各 軍 練 有 成 效 多 寡 虛 實 定 坐 營 把 衛  
總 官 本 年 終 賢 否 之 實 管 貼 隊 如 有 作 弊 虛 應 行  
令 營 官 分 別 處 置 其 新 江 口 營 選 鋒 聽 操 江 都 御  
史 另 行 庶 精 銳 悉 收 於 幕 下 而 折 衝 足 用 於 師 中



矣伏乞

聖裁

一嚴挑補以實軍伍夫在營

常伍各軍名爲操備實多不堪益六十以上者子  
侄得補紀錄出幼者住米卽補身不滿三尺力不  
舉半石徒執祖差例得充伍食糧此等操備名存  
實亡 國家損米歲輒數萬計徒養疲羸之卒其  
何益哉合行一體挑選老弱者回衛別差將在冊  
餘丁選補其人雖衆其法一一如選鋒之選毋務  
急迫塞責嚴禁受賄冒收則補役皆壯士而軍伍  
無虛糜矣伏乞 聖裁 一給口糧以專操練

夫一夫七尺之軀父母妻子之養咸取足焉選鋒  
不時操練別無營生匪厚其餉末由資身况爲

朝廷出死力乎今據各營揭稱新江口營選鋒  
除月糧外每月給鹽菜銀二錢要得照例請給顧  
人多費廣司徒告匱勢難准從查得京營戰車二  
營例有防秋行糧合無比照量給每遇春秋開操  
之期每選鋒一名月加行糧三斗戶部支給歇操  
住支俟海防寧日盡數停止每年犒賞及冬夏布  
等銀照舊許支餘丁同爲選鋒一體添給冬布一



疋夫月米有加則日操無辭宜一洗營中舊套以軍法從事乃可言兵蓋今所謂團操僅僅馳走數迴吶喊數聲寅入卯出金未問擊刺之方試騎射之能也選鋒教戰法不宜然每操當令常伍先撤選鋒獨畱同寅而入盡未而出比技校射一一如前都督戚繼光紀效兵法習之仍不廢朔望一操盛暑則寅入已散祁寒則辰入未散各選鋒官不拘以常局令其各竭智慮融會演習要以兵精爲實彼其身先督率亦宜於開操月分量加廩給每月三錢以恤其勞於本部草場銀內動支伏乞

聖裁 一處廩糧以便防汛夫京口爲 畱都門戶本部覆議免設總兵業已省費不貲而用備倭都督提兵出汛此正其時也將士廩糧又經覆請應天廵撫議給除再三咨行外今據回稱地方災疲難以加派要得南京戶部處給廩糧查得鎮江府總府衙門與金焦甘露寺并兌糧鎮西倉等處與各兵居處咨覆本部煩爲覆議題

請等因臣惟汛期已迫事關兵務恐致遲誤合無



一面暫咨南京兵部處濟一函具 題候覆遵行  
總之防江防汛事同一體 內帑外庫皆屬公家  
正項支用似無彼此再照防汛之兵原議三千蓋  
掣六千之半而出也續該先任本部尚書衷貞吉  
題 准免募一千見今兩營各止二千五百水

兵營已撥一千防守浦口今次提督出防京口合  
無卽將水兵一千五百再添陸兵一千共足二千  
五百之數卽令水兵坐營黃冲霄統領帶管陸兵  
其畱下陸兵一千五百令坐營胥尚行照舊團操  
帶管浦口水兵一千提督王椿旣領兵出防其原  
管大教場事務查有都督于嵩空閒合令暫管遺  
下水陸兩營兵合令都督馬繼武暫管各照常操  
練帶管暫管各官本部照例給劄施行汛回照舊  
交代管理亦內外上下妥便之計也伏乞 聖

裁 一謹城守以固保障夫金城萬雉南都之雄  
勝也延袤百二十里修理誠難而巡守亦不易查  
得萬曆十九年南京工部題議修理城垣春佑秋  
完移各本部責成守門官軍輪日上城巡視各城



兵馬司緝捕竊盜砵石及縱放作踐之人法亦備已而因循既久遵行猶踈惟修補文冊每歲到部巡視緝捕竟成虛套蓋官作樂其圯而有估修之利官軍憚其勞而無巡緝之實崩裂坍塌損壞脫落勢所必至合無請乞 勅下南京工部行令

管城主事查照舊例不時親視修補務在堅固每歲秋工完日不徒文冊相通仍與本部管操主事會同閱城面取督工官與守門官一同結狀交接明白本部管操主事分註某城某門左牆若干垛輪該軍某某巡守右牆若干垛輪該軍某某巡守以便查點本官逐月登城查其所守城垣有無崩裂坍塌損壞脫落幾處丈尺若干如其由於風雨圯頽則不堅之罪坐官作如由盜毀樹裂罪坐守門官軍合卽重懲是謂守城專責不得他誘其兵馬司照舊嚴加巡緝如此行之數年卽工部歲修之費幾可半省而重城保障永固無替矣伏乞

聖裁 一議軍器以備戰陣夫自朝鮮用兵海上告警南都修備器械數不爲少今據各營揭領



盔甲弓矢等物尚多不敷給發查得內府兵仗局戊字庫所藏盔甲悉不稱體故嘗題造藤盔紙甲僅取水陸營之用舊營未有也弓矢之製往曾議及徒謂庫局所有驗之則弓筋箭翎多已脫落無用其他刀鎗火器等件間多不堪合無請乞

准令南京工部委官會同該管衙門與本部委官將在庫在局一應軍器如盔甲砲石火藥硝黃之類一一查明分別堪用不堪用及應修等項數目明白造冊堪用者聽候給領各營演用應修者修補完備不足者添製若干以備臨急取用如或誤事責有攸歸再照弓矢南方所習戰守俱用惟地方氣候濕蒸易於脫壞官造之物未必甚精又難收藏今當報警需用之時合量給工價與各官軍自置完日送驗仍聽其演習使用亦自收藏愛惜京營嘗行之似爲省便應照例行南京工部處給一年以後仍照舊規行庶攻戰有資而威武益振矣伏乞 聖裁 一振法紀以肅人心夫賞罰必信兵法之紀今天下法敕久矣而南都猶甚



既懦弱且驕悍也頃緣營兵弱而後有募兵之役自募兵至而營兵有因人自奮之心改茲易轍此其會也江東子弟豈盡出浙兵下哉患在因仍故習虛號團操練不嚴法不率誠恐異日募兵撤而營兵愈救愈驕長此安窮乎故昔加秋賞今加月糧昔加妻米四斗今加冬布一疋厚賞之下實因其機以作其氣先之以恩惠而繼之以約束務在必行亦如水陸營之法可也蓋聞宋懲五代之姑息棟驍勇爲上軍選強壯爲兵樣召募教習送之

闕下矧今在營皆

闕下之軍而兵樣在

水陸營咫尺間也今後合無責令都督坐營官按法治兵細打重處毫不容貸不嚴則責營官之慢而戒飭之營官亦務自祓濯罰必當罪毋因私減公恣氣逞臆以失士心斯謂新舊互用彼此交勸使人心重犯法而士氣且益倍矣伏乞 聖裁



衛陽先生集



國家圖書館, NATIONAL CENTRAL LIBRARY, TAIWAN, R.O.C.



衛陽先生集卷之七

井陵周世選文賢父著

武林後學沈獅

較正

同邑後學沈嘉

孫男承芳編次付梓

疏

乞宥言官疏

奏爲言官被摘人衆

國體非宜懇乞

聖明

俯賜矜宥以光

聖德以隆至治事臣等待罪



南都備員卿位竊見

皇上臨御以來信任大

臣慎重言路臣等頌戴不暇何敢復置一喙近見  
邸報吏部接出 聖諭近來兩京科道官專徇

已私附和結黨以抗違君命要直沽名爲事每每  
以無指實之事興疑惑衆無上亂政且如昨者兵  
部欺君鬻爵朋奸結納箝口無言其於糾奸發邪  
耳目之責何在全失職守好生可惡本都當重治  
爾該部查兩京六科都給事中及十三道掌道御  
史姑且各降三級調外任不許朦朧推陞其餘的  
姑且罰俸一年還開寫職名來看吏部知道欽此  
續又接邸報吏部爲遵奉 聖旨事奉 聖

旨有勾了的照昨旨降調用不許朦朧推陞其餘  
着遵旨罰俸策勵供職欽此臣等相顧驚愕則知  
皇上諭本兵以持廉秉公之義責科道以發  
奸糾邪之忠其在 聖心必有真知而獨斷者

豈臣等愚昧所能測識第揆之政體質之輿情容  
有未盡協者臣等安敢持祿而不爲 皇上一

言之夫軍政考選主其事者尚書石星也稽其弊



者兵科吳文粹等也此非事有職掌業有專責者乎臣等僻在遐方其于彼中事體雖未周知但據石星生平忠誠節義昭昭在人近者 皇上信任星于羣言攻擊之日臣等謂知星之深者莫

皇上若也星受

皇上眷顧之隆方圖捐糜

報効不遑詎肯以軍政一事受賄行私上負

君恩下棄生平卽病狂喪心恐未必至此至於言官論事不患其不言患其言之無當使科道不察受賄實跡而遽以風聞意度形之論列咎將誰執

故臣等謂科道之不言意者徐察而徐圖之未可知也不然封倭之議科道曾百口以攻星何獨于鬻爵一事而曲庇之此其故可類推矣若南京科道去京師三千里而遙于聞見爲最後卽兵部考選之疏南中尚未見報而擯斥之 旨條下矣

諸臣且不及知又何望于及言臣等以爲科道諸臣情有可原而南京科道尤有可原者藉謂諸臣罪不可辭 皇上卽摘一職掌者懲之朝野已不勝悚惶矣柰何 雷霆所震無不摧靡使南北



臺省幾于空署耶昔人云觀人之國者先觀其君子視君子衆多如林則知其國之盛今之降謫諸臣皆 皇上所謂君子而選之在臺省者今以一事而擯斥者將三十人臣等不足爲諸臣一官惜而深以有關於世道升降之機爲可畏也古稱臺諫爲 朝廷耳目臺諫隆則 朝廷尊今一旦摧折而消沮其氣 皇上將廣寄耳目於誰乎將 朝廷之體統亦甚褻矣以 皇上日月之明何所不照以 皇上天地之量何所

不容倘以臣等之言爲不謬俾降謫科道薄罰還職則一切臣工旣畏 照鑒之明又感 包容之量所不更相勸勉盡忠言事者非夫也臣等爲國家大體義不容默故敢仰干 宸嚴實非有所阿附伏惟 聖明垂察臣等不勝悚懼祈籲之至

劾勲臣恣橫疏

題爲勲臣辜負 天恩恣橫不悛以致人心危疑地方不寧懇乞 聖明速 賜裁處以安



重地事臣以庸朽誤蒙 任使叅贊南京機務撫  
安人民保釐重地乃臣職分當爲也地方不安臣  
罪何辭竊見誠意伯劉世延者生平以豪傑自負  
談論以報 國爲詞臣嘗壯之乃近年以來老而  
貪得如癩如狂任用羣小信其撥置違法罔利受  
詞挈人危害士民無所不至京城內外及江之南  
北人人恨怨而唾罵之累經科道等官鄭明選馬  
嗣武等指其過惡叅劾不下十數本俱蒙 皇

上畱中蓋念其先世勲勞而望世延改圖自新也  
夫何自爲得計愈肆狂逞今日發一疏曰論某人  
明日發一疏曰議某事無非罔諸臣以脅制之術  
而愚小民以鴟張之勢我 皇上亦多畱中蓋

亦洞察其情而厭之也乃世延通不省改益恣非  
爲近如擅造火噐稱爲勤王出示通衢令民輸銀  
准充首級其無忌憚至甚因而捉挈平民吳郁淹  
禁水牢拷打逼銀死卽搥掩致郁妻侄多人上門  
討屍一時京都誼傳皆云劉府激變數日以來人  
情洶洶訛言不已非地方有變亂之事則本爵有



不測之禍矣臣如坐視不言誠恐釀成大患責將  
誰諉哉伏望 皇上軫念根本重地查發科道  
叅世延及世延叅人諸疏卽照 先朝例差法  
司大臣及錦衣衛堂上官前來一一從公查勘明  
實具 奏處治庶勲爵斂戢而地方寧謐矣

### 海防十議疏

題爲報獲倭船應嚴警備敬陳海防十議用圖戰  
守萬全以固根本重地事職方清吏司案呈奉本  
部送據鎮守南直隸江南副總兵官朱文達劉河  
遊擊李遇文崇明等處把總陳嘉謨等各呈報本  
年五月十三日擒獲倭船一隻共獲倭奴三十四  
名并倭衣倭帽倭刀倭書布疋等物俱解送兵備  
道譚審等因續據督理蘇松常鎮糧儲水利帶管  
兵備湖廣按察司副使韓濟呈稱弔取通使譯審  
倭奴不吐真情中有一名失麻哈兒口稱同船之  
人俱係琉球安南大趾小趾大佛郎機小佛郎機  
等國合夥於萬曆十九年間投充關白名下今年  
五月初三日午時遣船四十二隻出洋在於 中



國地方窺探地里以便侵掠遼五月十二日一更時分被風飄散沉溺數隻一隻飄至崇明被官兵擒獲等因各到部送司及閱邸報該兵部尚書石星題爲塘報倭情事內稱關白恣橫不就羈縻閉關絕款悉聽督撫便宜召募專備緩急至沿海地方如山東淮揚應天浙江福建廣東近又奉

旨嚴勅况封疆畫守各有專司一或踈虞軍法具在臣等再行申飭有應增器具應更將領乘今汛期將過上緊議處等因題奉 欽依外看得封

事之罷倭宜洩恨于朝鮮而鄰震于遼東今倭船之獲乃稱窺探于延海而邇密于郊圻南京係根本重地而淮揚應天又爲南京外藩即使譯審倭奴言詞未委虛實而防禦事宜應爲議處所有淮揚應天海防要務呈乞酌議具 題施行案呈到

部竊爲淮揚應天皆南京吃緊藩籬也臣等叨職邦政不止畫守封疆今生擒倭船之報雖偶獲于一時而外夷入犯之防當亟圖于今日謹條陳十議相應題 請伏乞 勅下該部覆加查議



恭候 明旨行應天淮揚巡撫等衙門亟爲處  
備庶海防門戶鞏若金湯而 畱都堂與安如磐  
石矣謹題請 旨 一日議戰兵照得近報關  
白狂逞動稱發兵數十萬卽未必然而與昔年事  
勢大不同矣昔猶零賊竊發今則大兵入寇也昔  
猶倭主不知今則倭主所遣也當此時我兵須厚  
集其勢乃克有濟今據江南副總兵朱文達開報  
所統沿海沿江一帶兵數僅二萬餘江北副總兵  
沈思學所報且不滿二萬以此分守信地計一處  
多者二三千人少者纔三四百人而止耳萬一倭  
奴數十艘忽至一處我兵禦之可必勝乎臣等謂  
宜亟行各該撫鎮衙門查將兵士見在者挑擇精  
壯虛名者查補行伍不足者行令召募皆收本處  
耆民漁戶人等取其便利堪戰勿限以數仍厚與  
募值練爲遊兵數枝專備截殺則旣可保障鄉土  
得其戰守之助又因以禁絕姦宄塞其嚮導之門  
此計之上也伏乞 聖裁 一日議將領照得

三軍之命懸于將帥而領兵分符務在得人將非



其人則平時教練無法臨事鼓舞無術欲其斬將  
搴旗而令鯨鯢授首也難矣方今倭情已見春汛  
甫畢合行各該督鎮撫按衙門除甄別見在將吏  
外仍查訪謀勇忠義將官不拘世職行伍見任廢  
閑本鎮外省各選擇堪任者授以相應職銜管領  
新募士卒照依名將紀律訓練精強以收實效候  
有功勞不拘資格不次陞賞至于效一謀出一奇  
知能技藝之士亦令收入幕下仍降空頭劄付給  
與各該督撫使徑得授官委用試之而效仍不拘  
時類 題係世官者或陞級係白丁者或授職任  
其便宜責其成功似與會舉邊才咨發各鎮者更  
得實濟伏乞 聖裁 一曰議糧餉照得兵行

則糧隨此必然之勢也不有以足食則何以足兵  
然皆仰藉于公帑之給恐難以繼軍興之資合行  
各該撫按衙門查議該地方應增募兵若干卽該  
增餉若干從宜會議或 奏畱或酌派或復協濟  
之規或廣設處之法勿泥故常勿避嫌怨蓋養兵  
原以保民非爲私也要在當事者加意圖之耳伏



乞

聖裁

一日議戰具照得海上攻戰全資

器械苟器械不利是以卒與敵也大都防倭之具水戰則有福蒼哨唬等項船隻與隨船應用諸器陸戰則有盔甲鎗刀弓矢等項器物與火攻砲石向亦犁然備矣第承平沿習能無虛數乎歲月屢更能無損朽乎臨期圖之必致粗畧且涉張皇應行該管衙門一一從實檢查修補其新募兵士亦宜添造器械合用工科查估題行庶使應敵有具而可收功于一舉也伏乞

聖裁

一日議

哨探照得哨探乃兵之耳目也哨探必真斯先事有備今沿海官兵或出探外洋或偵視海港或會哨鄰境非不有其人有其法也但法又易弛人又易玩況海洋遼闊風汛倏忽實信叵測虛應良多近據崇明沙所獲倭船臣等訪聞沙民擒獲在先官兵擒獲在後故原來申文亦云據漁戶宋良賢所報比時輪哨船兵何在也且十日一次公私報部並無警息習爲舊套已該臣等另文查究矣合行各該撫鎮嚴行各官將會哨等項事務一一整



飭着實舉行務選熟知海道水性之人遠出外洋分頭哨探遇有聲息星火傳報以便發兵禦剿如哨探先到使賊至失利此曲突徙薪之功若賊勢大則議陞職之賞賊勢小則議斬獲之賞本管官亦減等行賞若哨探後到以致地方失事大失則議斬首之罰小失則議割耳網打之罰本管官亦減等行罰庶人心知儆而海防可固矣伏乞

聖裁 一曰議防禦夫自 國朝防倭以來遣將出帥謀議非一先臣尚書楊博云平倭長策不欲鏖戰于海上直欲邀擊于海中斯禦之于海洋之說也至譚綸則云若陸戰一勝即可盡殲賊乃與禦不復犯我斯禦之以陸戰之說也總之二臣俱熟兵事各有攸當蓋昔者趙庸擊倭于南海陳瑄敗倭于沙門島劉海破倭于望海壩皆海洋勝也戚繼光夜破倭于興化劉顯追擊倭于鎮江俞大猷屢收功于定海皆陸戰勝也今天下豈乏若人哉關白謀犯勢在大舉倘一時突至誓必殲之于海中豈坐視其登陸合行各該撫鎮等官悉心料



理嚴令申飭如倭船果至探報得實某處某哨某兵船邀擊于海洋不許容賊登岸以人船俱沒爲功萬一登岸某處某哨某官兵擊殺于初至不許流突內地以水陸夾剿爲功凡海洋登岸則責在水路防守官凡登岸內犯則責在陸路防守官俱臨時查勘失事大小以議守備不設之罪則防禦旣嚴賊徒授首而膚功立奏矣伏乞 聖裁

一曰議城守大海寇之來衆寡難料戰守異施賊勢寡則邀擊擒斬利用戰賊勢衆則堅壁清野利用守戰用兵將守需城堡矧關白有攻城之說乎合行各該撫鎮衙門查將所屬一應城堡如羆邑則責成有司如墩堡則責成將領若何修補若何防守固不可張皇以擾民亦不可玩愒而忘備庶桑土預徹而外侮坐銷矣伏乞 聖裁 一曰

議策應夫倭并力而來我分兵而守無所不守則無所不寡所貴彼此應援方可合少爲多以全取勝今江南之吳淞江北之淮揚與夫三輔諸羆邑皆聯絡南都近地警報日達宜相機策應合行各



該撫鎮同心共濟如兩鎮之中要見某處與某處相近賊至某處則某當禦某當援如一鎮之中要見某哨與某哨相近賊至某哨則某當禦某當援賊攻一郡則本郡當禦鄰近當援賊攻一邑則本邑當禦鄰邑當援賊攻一堡則本堡當禦鄰堡當援或發銳師以搗其虛或設疑兵以分其勢或伏陷阱以伺其來或驅奇兵以襲其後法必曰非信地而兵先至者有異賞坐視鄰患而弗救者與同罰則賊來有腹背受敵之困而我兵無唇亡齒寒之虞矣伏乞 聖裁 一曰議責任夫帷幄之

臣主運籌封疆之臣主鎮守彼此職掌各有司存不一申明人將怠忽而不思殫厥心力以防患未形或致塵 君父南顧之慮則將焉用彼臣爲

哉卽如南都堂奧也江口門戶也江南北沿海一帶藩籬也藩籬不固守藩籬者任之門戶不扃守門戶者任之堂奧不安守堂奧者任之目今倭奴狂狡天或厭惡自促滅亡姑無論已萬一有如人言窺伺浙直若賊船由江南地方登岸江南官兵



不卽截剿則江南文武封疆之臣罪何辭也其在江北其在江口有封疆責任者罪亦如之或至流入都城之外不卽擒滅臣等之罪亦如之舉一處而他處可知已伏乞

皇上嚴發勅旨詔諭各該地方守土諸臣作速經理毋爲燕雀處堂而泄泄然也伏乞

聖裁

一曰議賞罰夫賞以示

勸罰以示懲兵家所尚賞罰不明何以激勸人心捍大患而成大功也當此倭奴告警正宜懸示賞格傳播中外各鎮官兵人等能誅關白者賞若干誅行長以下頭目者賞若干誅從倭與脅從者賞若干至于陸戰以衝鋒當先者爲上功不計首級水戰以打沉人船者爲上功不論斬獲反是而退縮失律者罪無赦又須賞不踰時罰不旋踵撫陣臨戎秉節鉞而專行焉則士卒奮勵軍威振肅克敵制勝端在於此伏乞

聖裁

督發南京水兵援朝鮮疏

題爲倭奴兵船夜襲朝鮮該國水兵失守亟請添兵促餉以濟萬分急用事職方清吏司案呈



奉本部送准兵部咨該總督薊遼等處軍務兼理糧餉經略禦倭兵部尚書兼都察院右副都御史邢玠題稱倭勢猖獗內開南京兵部新募水兵亟借三千卽以原任本營坐營今陛 興都畱守黃冲霄量改叅將統領星夜前來安家行月糧等項照浙兵事例行南京戶部查給徑自具 奏補還開銷調來水兵仍令召補以充前數以備本地之需該兵部覆議應行南京兵部查議新募水兵果可那用一面酌行督發一函具 奏等因題奉

聖旨這所奏徵調各省直兵馬俱依議作速行欽此欽遵備咨到部送司卷查萬曆二十年因倭警告急該先任本部尚書衷貞吉題議召募龍江水營兵二千五百名設坐營官一員以今任 興都畱守黃冲霄充本營坐營統練冲霄陞任二十二年九月內該兵部將南京大教場把總陳雲龍推補黃冲霄員缺接管間今奉送准前因隨該本部劄行提督備倭都督汪弘噐督同坐營陳雲龍整頓各官兵并雜流人等見在二千二百八十員



名查得該營沙唬等船共九十三隻正值五年大修之期咨會南京工部發價併工修理及差官前去靖江等處僱覓沙船以抵原題改造蒼船之數其安家行月糧等項俱行應天巡撫衙門咨會照例酌議處給安家銀兩該本部出辦者徑於草場租銀內動支一萬一千四百四十九兩廩給行月糧銀應南京戶部出辦者咨行該部支取二萬一千四百七兩二錢六分五釐除安家銀全給廩給行月糧先給二個月該銀七千一百三十五兩七錢五分五釐俱給散各官兵收領外其未給廩給行月糧四個月共銀一萬四千二百七十一兩五錢一分差官解赴天津兵備道發庫收貯以後聽督臣調發隨行所在該營造冊呈請支給該營仍將領過安家并行月二糧細數造冊一樣二本送司印鈐一存本部一送總督衙門以備稽查凡一應器械除腰刀會同南京內外守備工部及巡視科道等衙門於內庫支給其餘火器火藥盔甲等項逐一處給備用爲照該營兵船本爲守護



留都而設原議出汎亦止在江海之交故其船皆輕捷便于防江未必可以出海若由外洋而行正值西北風汎波濤洶湧水程難期計自裡河運道以至天津從新河口入海度幾如期可至及查總督原題以見任 與都留守黃冲霄量改叅將統領該兵部咨內外議明白作何調取而本官遠在楚中恐往返耽延緩不及事暫令見任水兵坐營陳雲龍督押兵船前進本部一函具 奏兵部徑自差人調取黃冲霄前來不妨沿途交代本部仍

移咨沿河督理河漕衙門嚴行有司差官催僨不許停留務期星夜到彼以濟急用其遺下水兵員名缺本部查照題議另行計處召募以備急緩案呈到部該臣等看得倭奴猖獗自九月聞報以來日甚一日非獨朝鮮外援當急卽天津海口內備亦不可緩也臣等仰遵 明旨敢不卽行調發

第船隻始事修理忽陰雨連綿及修理稍有次第又募船未到臣等日夜催督齊備擇于十月初二日會同南京內外守備司禮監太監邢隆劉朝用









國家圖書館, NATIONAL CENTRAL LIBRARY, TAIWAN, R.O.C.

徐陽先生集

六



衛陽先生集卷之八

其陵周世選文賢父著

武林後學沈獅

較正

同邑後學沈嘉

孫男承芳編次付梓

疏

倭警告急擴陳喫緊預防事宜疏

題爲封事未結倭警告急擴陳喫緊預防事宜以  
固重地事職方清吏司案呈倭奴兵壓朝鮮勢必



內犯非止震隣之恐已也業奉

明旨通行預

備而 留都根本重地預備宜先除練兵等項節

經本部題奉

欽依劄各營將官著實舉行外

有所議而未盡行而未力事宜本司博採羣議悉

心酌畫條爲十款呈乞會議題

請施行案呈

到部臣等會同南京內外守備司禮監太監那隆

左監丞劉朝用豐城侯李 璉安遠侯劉懋勛南京

工部右侍郎董裕提督操江右僉都御史陳薦議

照先事預防有備無患年來倭奴報警臣等料理

戰守事宜羸有條緒矣但倭奴再犯朝鮮勢將大

舉臣等職守 留都萬一防守少踈將何以揚

天威而固豐鎬之基乎今據該司十議誠爲制

勝長策相應題

請伏乞

勅下該部再加

覆議恭候

命下咨行臣等遵奉施行謹題請

旨

一嚴責成以守要區夫

留都猶堂奧

也江口門戶也江南北沿海一帶藩籬也然必謹

藩籬扃門戶而後可以守堂奧竊料倭奴之來由

江南則必自吳淞劉河楊舍圖山以入江由江北



則必自海門狼山及安東淮揚以入江此 畱都  
緊關門戶而京口關天寧州瓜州儀真等處尤江  
防之要害也前項地方係屬淮揚應天督撫及操  
江衙門伏乞 嚴勅各該地方守土諸臣作速  
經理如遇有警卽調所屬各鎮水陸官兵厚集前  
項緊要處所併力堵截使賊不得破藩籬而窺門  
戶若賊由江南入犯江南官兵不卽截剿則江南  
文武封疆之臣任其罪其在江北在江口亦如之  
或倭奴流至都城之外不卽擒滅則臣等任其罪

毋得彼此推諉致誤事機仍乞責令嚴行會哨之  
法務選熟知海道有膽略機謀者遠出外洋分投  
哨探遇有聲息星火傳報以便發兵禦剿而又重  
其賞嚴其罰不時稽查儆戒庶機宜不失協守互  
嚴而 畱都可恃以無虞矣伏乞 聖裁 一

選官軍以護

陵寢照得

孝陵屹立都城

之外一旦遇警則防守求援屬第一議查得嘉靖  
年間 孝陵衛選充軍餘二千五百名責令守  
衛而又置振武營操練之未幾而前營裁革軍士



分布各營訓練承平日久人心玩愒前項軍士逃亡事故已不足原額之數而見在行伍者又多老弱不堪難以驅策一朝有事其孰與防守之今議行令職方司官會同巡視科道各營提督及協同守備勲臣臨營揀選如老弱不堪者卽于戶內壯丁頂補其有缺未補者速選壯役補之務足原額之數又查得瀋陽左衛有殺虎手五百名亦爲孝陵而設者今宜一併選補合得三千軍士內選一千有力藝者爲選鋒餘作常伍仍照舊散寄

各營每營責令左右哨把總二員專管統領隨伍操練遇警仍照舊規以協同守備勲臣督原管將官領率此軍護衛

陵寢其附近要害處所臨時容臣等相機調遣兵將剿截應援蓋此軍住居皆附于孝陵左右有妻子廬舍在焉一旦有事

驅之用命則人自爲戰家自爲守誠護陵

寢之一策也伏乞 聖裁 一設城臺以便防

守照得南京內城一十三門延袤約陸拾餘里當

皇祖定鼎之初雉堞屹然稱雄經今二百餘



年亡論坍塌損壞而軍少城曠亦難與守博採羣  
議僉謂十三門除石城太平等門有山勢可據有  
湖水可憑無容別議外其金川儀鳳朝陽三門外  
皆平陽大地賊可擁聚而此城多單薄無險足依  
實受敵之所深爲可慮今議三門酌量于喫緊處  
築城臺一座一面附城三面麗外高與城齊而縱  
橫約各三丈可容二三十人上安砲銃等器遇賊  
臨城兩下相夾而攻使賊不得近城攀附計無善  
于此者至于儀鳳門自靜海寺而西約一里許地

勢原下城亦甚低當加高三尺其十三門周圍城  
堞間有稀踈損壞不堪遮避者亦當添修整密臣  
等行職方司會同多官逐一踏勘形勢委宜脩舉  
除臨時調遣守城守臺人役及預備火砲灰石等  
具次第酌量外至于城臺設造雖不過十餘座而  
工程重大亦非臣等所能億度伏乞 勅下南  
京工部覆行勘估從長酌議另自 題覆一面先  
將城垣低處并堞口稀踈者作速加高整密庶金  
湯旣固保障有資矣伏乞 聖裁 一練選鋒



以備剿戰查得南京三大營原有選鋒軍七千名  
係隸提督坐營等官操練所以備衝鋒破敵之用  
者業經臣等屢行申戒各官嚴加訓練但年來未  
遇兵革人心不無怠玩此輩坐食厚餉今當有事  
之日正宜効力之時豈可仍前偷惰合議行職方  
司官會同巡視科道提督等官臨營揀選果年力  
精壯力藝高強者聽其訓練如衰憊怯弱者發充  
常伍操備卽以常伍內精壯者選補每營各足原  
額每坐營把總等官各領一千加意教習或練其

騎射或練其武藝務使人人奮揚而又量加操賞  
銀兩使該管官得以申明賞罰鼓舞激勸有警專  
候調遣戰剿仍聽職方司官會同科道不時行營  
查看如果器械鋒利軍士鷹揚多善射善藝之士  
得行賞行罰之公者坐營把總官調度有功卽于  
年終考察疏內特爲申薦優擢以酬其勞若營無  
紀律兵多玩愒及尅減操賞銀兩而法度不行者  
坐營等官尸位可知容臣等不時論劾以爲溺職  
者之戒至于新江口營設有坐營官二員而選鋒



衛陽先生集  
止一千五百尚多缺而未補此營兵專以備剿殺之用豈應反少宜會同操江衙門酌議比照三大營事例選足二千每坐營一千訓練俱照前議庶事有責成軍有實用臨敵不患無兵矣伏乞

聖裁 一選餘丁以實軍伍夫在營常伍各軍名爲操備實多不堪蓋六十以上者子侄得補紀錄出幼者住米卽補身不滿三尺力不舉半石者徒執祖差例得充伍食糧而 國家歲損米數萬徒養疲羸之卒此在平日無事且不可而况今有事

之日哉訪得各衛空閑餘丁力藝兼全者尚多顧礙于舊例充補末由合行各衛掌印官查該衛空閑餘丁除老弱不堪者不開外其中有年富力強技藝諳習者造冊送部名爲聽繼餘丁聽職方司官會同科道將常伍操軍陸續揀選如果老弱不堪者回衛別差卽以在冊餘丁酌量補之其未補餘丁候有缺填補但選補官不得急迫濫收以開倖進庶行伍無虛糜按籍有儲兵是亦足兵之一策也伏乞 聖裁 一預軍器以資戰陣自朝



鮮用兵海上告急南都年來議修器械亦云預矣但當時所備有限而歲月荐更損壞亦多查得

內府兵仗局戊字庫所藏盔甲刀箭等項以數萬計率多精利堪用候有聲息容臣等查發各營以便捍禦其所少竹鎗狼筈藤牌等項應兵自備者責令赴出產地地方買用應官給與者聽官買給務使器械鋒利以便應敵至于制倭之具火攻爲最往年本部委官監造火器如鞭銃鳥銃佛郎機等數千門分發各營操演火藥如大銃鳥銃鞭銃等

藥數萬斤收貯會同館僻處以備有警之需凡旣備矣但恐軍興不敷于用除火器在內府兵仗局戊字庫尚貯有佛郎機等項臨時查發無容另置外其應造火藥如火箭噴筒火甄一窩蜂子母銃等類合委熟知藥物官員收買硝磺等物責令如法製造俱收貯密所以備禦敵庶器械精而火器預戰守之長技在我矣伏乞

聖裁 一備

舟師以資水戰南京以長江爲險而長江以舟楫爲先水兵營原設蒼沙等船共計九十四隻內蒼



船十隻皆平底大腹用之外洋則可衝鋒用之江河則遲鈍而不得其力除將此船咨南京工部或拆毀改造外其該營沙船儘可禦敵而僅僅二十隻甚不足用宜添造二十隻以備緩急議者以打造沙船每隻約用銀一百五十餘兩計添二十隻則費銀三千兩且一時打造未必卒完卽造完矣而每年估小修三年估大修其所費工料甚鉅至五六年又以不堪拆造總之所費不貲今博採衆議謂宜照浙直事例遇有警止募民間漁鹽沙船每隻船身全用楠木高闊合尺丈者不過給稅銀三兩五錢其餘雜木相兼者遞減卽以驍勇船主爲耆民捕盜而舵工繚手旋手卽令船主自募慣諳風濤水性及壯健有膽略者爲兵每月照兵例給糧不用安家蓋船出自造比官造更覺堅固官旣無打造之煩而修艤苦蓋彼自用心官又無歲修之擾有事則召募之聽我約束無事則散遣之各就生理似爲省便容臣等臨時差的當員役前往靖江等處召募前船應用外其見在該營沙號



衛陽先生集  
等船今當歲修之期合移咨工部作速勘估着實  
修理毋苟且塞責無裨實用庶舟楫既具緩急有  
賴矣伏乞 聖裁 一嚴盤詰以防姦細夫地  
方有警則人心洶洶無論倭奴狡詐密肆窺偵卽  
盜賊亡賴惡少棍徒乘機猖亂聚衆劫掠裏應外  
合爲害非細合先行令五城兵馬申明保甲之法  
每十家一牌互相保結不許容畱面生可疑流來  
無籍之人事發十甲連坐土著者則責成隣里寺  
觀則責成僧道會館則責成同鄉皆以連坐治之  
而又責成巡邏營提督及坐營把衛總等官晝夜  
巡緝其該營缺而未補之軍作速驗補務足三千  
之數仍每城門選才能指揮官二員守把凡係出  
入可疑者卽盤詰擒拏務使姦宄不作內亂不生  
地方安堵而後各官叙賚若保甲不行巡緝不嚴  
盤詰不密以致地方失事各官罪有所歸容臣等  
指名叅究以爲誤事者之戒伏乞 聖裁 一

肅屯操以資調遣南京各衛屯軍就便皆有屯營  
頗得古人寓兵于農之意顧此軍有屯官管之者



有僉書官管之者有雜差官管之者每遇正二三該操之月各官假以屯操之名爲入屯科索之計軍士未必入營該官未必操演官無舉刺軍無紀律殊失原設美意今 國家有事與其召募費餉之兵何若整頓食糧之役今議各衛屯軍乞

勅下管屯御史行令各衛掌印官先將屯軍姓名及戶丁姓名造冊送屯院該院仍會同本部司官一員親自查選仍一樣造冊二本一存屯院一存本部其管屯操官擇素有才能者責令時常操練一旦有警本部卽按籍調遣給以行糧或令協守皇陵或令協守城池亦足以當一指之用而無負平昔 朝廷豢養之恩矣伏乞 聖裁

一明調遣以重畱京南京爲我

皇祖定鼎

之區 皇陵與百司度府在焉關係匪渺小也顧一旦倭奴大舉入寇則區區一二萬之疲卒顧東失西萬萬不可支矣今議有警之日除藩籬門戶之兵不可議調矣其江西湖廣河南三省去倭稍遠彼處各有儲蓄之兵將校統練容臣等飛檄



取之責令如期入衛一以防護 皇陵一以應

援重地兵到之日本部照例給糧事畢撤回其如期而至不誤應援者事竣官兵重加叙賚如後期不至坐令失掾者容臣等 題叅庶先聲足以制敵而根本重地坐收多助之効矣伏乞 聖裁

倭警告急續陳營務未盡事宜以作士氣疏  
題爲倭警告急內備宜周續陳營務未盡事宜以作士氣以固重地事職方清吏司案呈照往歲倭夷報警節奉 明旨申嚴武備除一切戰守事

機已經本部先後具 題整飭外所有一二未盡事宜及時應爲調停如優選鋒寬工役專責成除戎器往或拘成例而未及酌處事當叅時宜而應變通謹據膚見列爲四款呈乞 題 請施行案

呈到部臣等竊照人情常奮于鼓舞政體貴達于權宜頃因倭報旁午仰荷 綸音申明戒備臣

等旦夕思惟振飭要務次第舉行所據前項四事誠于戎伍有裨既經該司議呈前來隨行會同南京內外守備司禮監太監邢隆劉朝用豐城侯李



御陽先生集  
環安遠侯柳懋勛酌議僉同相應題

請伏乞

勅下該部再加查議覆請

明旨各行臣

等遵奉施行謹題請

旨 一議優餉以鼓士

氣竊照南都自聞倭警以來無日不以練兵爲事

蓋所恃以衛護

陵寢保守豐鎬基業者惟此

兵將而已本部節經題奉

明旨申飭武備行

令大小將領將選鋒軍餘在營嚴加操演團練庶  
幾精銳足備調遣但各選鋒近因常操有廢生業  
雖有月米一石不足贍養一家人情各懷內顧之

憂何由鼓其勇往之氣查得京營事例選鋒月給  
雙糧及查新江口營選鋒一千五百名每月除米  
外操江衙門月給鹽菜銀二錢以爲犒賞之資而  
大小 神機浦子口池河選鋒八千餘名雖節經

題議優恤戶部僅歲給弓矢銀三錢開操月給  
口糧三斗較之江營訓練勞苦相同賞賚迥異各  
兵援京營事例告求加糧但今師旅孔殷餉儲告  
匱雙糧遽難議增相應酌處合無比照新江口營  
事例將大小 神機浦子口池河各營選鋒月給



犒賞銀二錢行南京戶部支給其原議歲給弓矢口糧不復重支俟海防寧日犒賞再爲另議庶優賞有加而士氣益倍矣伏乞 聖裁 一議差

撥以專操練夫兵貴素練業尚專工我 國家培養士氣原欲蓄其精銳以備緩急之用乃今南都大小 神機三營軍士往往苦於差撥極稱疲累如 陵寢宮闕禋外城垣後湖等處遇有修葺一應合用物料及 內府進貢 龍袍并各項

鮮品一一取撥于各軍餘搬檯終歲勤勞無時休息是釋操練之本業而疲於負戴之工役以故先任本部尚書王遴目擊其艱酌議 題行南京工部用人搬運物料聽該部酌處顧覓 內府搬運錢糧着落內守備官徑撥該監軍匠民匠及上江二縣民夫應用該兵部覆奉 俞旨各部通行

欽遵未幾續該各衙門踵習因循仍前差撥今何時也疆圉多事操練方殷正宜寬恤各軍可令疲於奔走乎合無將各營軍餘從寬悉免差撥遇有

陵寢宮闕城垣修理合用料物聽南京工部



徑行顧運進 貢品物等枉亦聽內守備官于該  
監軍民人匠及上江二縣民夫應用俟海防寧日  
另行議處庶各軍苦累少蘇而操練得專矣伏乞

聖裁 一專責成以便防守竊惟關隘譏察

禦防要務使責成不專人無定志差撥紛擾姦弊  
叢生必須畫一度可經久查得南京龍江關防守  
軍餘一百名向于大小二營輪撥大勝關防守軍  
餘一百名舊於新江口輪撥每十日一更已不勝  
其分撥之擾矣況今倭報緊急營軍方事操練而

各隊伍旋操旋撥事體甚屬不便且難望其紀律  
有常孰若免其差撥照門軍事例另選專役之爲  
便也合無行各衛所將附近兩關居住餘丁造冊  
送部遴選精壯分發龍江關一百名大勝關一百  
名定爲二班每班半月專事防守不許別項差占  
遇有事故仍行該衛僉補其月糧照門軍例給度  
關守有所責成而營軍無復紛擾之妨矣伏乞

聖裁 一修戎器以備戰用夫器械不利以卒  
與敵兵法所忌也南都承平日久軍士未經應敵



所持操演器械未必一一鋒利先經本部 題議  
有事請發 內庫刀鎗銃具之類但古制厚重軍  
士不慣演用至于藤盔紙甲藤牌等項皆係禦倭  
長技乃 內庫所無先增雖有置造目前支領不  
敷若不及時添置臨用何能卒備但事干錢糧合  
應 題造容臣等查各急用軍器選委的當官員  
動支本部收貯草場等銀添造其藤盔紙甲工料  
價銀例該戶工二部及應天府出辦者各查照分  
數協濟置造務要堅緻如法分發各營演用完日  
造冊 奏銷庶器械備而應敵有資矣伏乞 聖裁  
在任第六次乞休疏

奏爲

恩厚莫承病積成廢六懇

聖明鑒

臣匪欺速

賜歸骸事臣自通籍以來歷事

三朝幾四十餘載朝夕自盟以報

主上者

唯此不敢欺之心與不敢私之力耳該臣先五疏  
乞身情迫辭窮竊意 皇上俯鑒臣衷必有

俞旨生還有日九月初四日接吏部咨內開奉

聖旨周

着遵屢旨照舊供職不准辭吏部



知道欽此臣伏枕叩頭不勝感激何忍言去時念  
秋闈伊邇武闈屆期又奉 欽依調遣水兵皆

臣職掌所在又何敢言去臣一而私宅調攝一而  
集諭各司飭具治事隨于九月二十等日閱大小  
營操閱之日實隱几而臥十月初二日遣兵北征  
遣之日勉扶掖而出此同事諸臣所親見也武場  
一事雖如期而舉閱射闈卷則侍郎許 代董其  
成諸司官分効其力至於簿書繁冗禮節趨踰則  
臣之不能而因循偷惰爲日久矣蓋臣自去歲以

來偶患左目黽勉支持今年春暮閱城爲風沙所  
擊重加腫痛移禍右目綿延至今昨者又爲諸事  
躁神愈勞愈劇愈治愈昏對面識認漸成廢疾且  
氣逆痰喘股戰肌削奄無人色危如朝露病狀若  
此尚可處艱重之地耶臣非不知鞠躬盡瘁死而  
後已臣子之義顧與其徒死而曠曠債事孰若讓  
賢避路少答 洪恩于萬一用是不覺煩瑣再  
瀝血哀鳴於 君父之前伏乞 聖慈鑒臣

狗馬之力已竭首丘之情可憫叅贊非可久曠之



官衰憊無復振揚之日早

賜歸還亟

簡

材臣以代臣任臣苟得返故廬未卽溘填溝壑依  
子若孫相與扶持祝 聖壽於田野去有餘榮

儻再遲月日石火風燭將辱牀褥未卜死所而臣  
因疾廢事失職損忠卽瞑目九泉罪莫所追矣臣  
不勝隕越待 命之至

回籍復起原任第五次乞休疏

奏爲五懇

天恩俯容林致以延殘喘事本年

正月初八日接到吏部咨文內開本部覆臣第四

次辭疏奉

聖旨周

着遵屢旨上緊赴任供

職欽此臣隨扶病焚香北向叩頭謝

恩訖伏

念臣擁腫朽才苦窳賤質何裨于

國何濟于事

而屢蒙

皇上勉畱若此從來

畱都疏遠之

臣未聞徼此殊常之遇者臣卽有胸無心寧不感

激思奮哉第命蹇災仍病日委頓有力不從心者

益臣自上年三月抵家閉門調理倏忽經一載矣

延醫飲藥殆無虛日然病勢以久而益深元氣以

病而益耗今春所感視往更劇始因風邪傷外繼



以寒涼傷內喘嗽屬而不停脾胃敗而失職飲食  
減損形體尪羸凡覩臣面貌者無不爲臣危懼卽  
臣自揣當此遲暮之年構此危篤之症恐無復起  
之望矣夫臣情迫辭窮艱苦之狀百不宜一惟祈  
皇上洞鑒至情毫無矯飾垂憐危病蚤  
賜罷免庶偃仰牖下畢願首丘則體恤之恩逾於  
任用之榮臣不勝迫切控籲之至

附四鎮議

一議薊鎮

夫薊鎮京師左輔也寔戎馬出沒之場自大寧棄  
而外藩撤如人露體當矢石無覆遮者然 廟堂  
之上以爲喫緊處建制府設總戎三協十路以及  
關營寨口星列棊布人衛則有宣大之驍雄班操  
則有山東河南之壯勇臺兵數千悉皆精銳非不  
足以寒氊裘之膽而奪之氣第營各有將而統袴  
惟怯能必其無媮媮乎將各有兵而負石荷薪能  
必其閑紀律乎兵各有餉而漁獵剝削能必其不  
枵腹乎惟選廉幹智勇之士以付闔外以寄司命



斯將領得人而一切戰具可次第舉矣若夫關外閒田一望無際或者做營平之遺意而真實行之亦足兵足食之一策也

一議昌平

昌平鎮擁衛

陵寢爲京師後門而偏近虜庭

胡馬易達故當事者日兢兢松楸之慮賴我

祖宗在天之靈兵不血而勢如堵矣但密邇都城當南北孔道軒車之絡繹商賈之往來鱗集輻輳以致奸宄叢襍往往匿爲窺矚之所禍機潜伏大可寒心乃軍民錯居也而文臣武吏未必其共猷念矣田舍相望也而河南南陽不可以詰問矣惟是責成有司嚴行保甲之法則譏察嚴密而懷姦蓄異之徒又安所秘其踪跡哉若虜性狡猾陽順陰逆一有狂逞飄忽可至則遠斥堠以勤燎望謹偵探以防叵測更嚴兵秣馬以待則又司鞞鈴者之責也

一議保定

夫保定內拱

神京外控三關稱衝繁要地故



重兵屯焉隱然虎踞所以壯畿輔而堅保障也但腹心內地承平既久目不覩旌旗之色耳不聞金鼓之聲將狃於玩愒軍安於愉惰藉一旦卒然有警自衛且不遑而况驅之使戰哉夫無紀之師難以禦敵則訓練不可不勤也朽鈍之戈難以取勝則器械不可不利也精銳買閑而疲病持戟則老弱者不可一澄汰之乎繫籍于行伍而勾當于衙舍則占役者不可一清查之乎托身於勢要而冒廩于公庾則影射者不可一嚴覈之乎鼓鷹揚之氣勵超距之勇赫赫一旅隱隱干城之望矣

一議天津

蓋天津舊水鄉耳我

文皇帝靖難北還經其

地因設置軍衛以鎮塞海口控制倭奴其

神

謀雄斷髮出千古矣迺邇年自倭變以來說者謂

東望海口倭可一帆至至則驚震

宸居爲家

門之甌宜以重兵彈壓之遂開府建牙召兵集餉

大修戰艦所費不貲竟成畫餅矣幸而曾長物故

羣醜宵遁兵解餉銷海內得息肩焉然猶慮島夷



之再逞而總總然爲綢繆之計不知天津堂奧也  
海上藩籬也不固其藩籬而徒守其堂奧何益惟  
宜于山東之文登遼東之旅順廣置哨船交會巡  
哨晝夜如織一遇倭警卽調遣官兵水陸夾剿則  
倭必不敢揚帆西向而天津且安枕無虞矣此曲  
突徙薪之謀也



衛陽先生集卷之九

斗陵周世選文賢父著

武林後學沈獅

較正

同邑後學沈嘉

孫男承芳編次付梓

序

刻武經七書序

余自濫竽畱筦以來日惴惴惟是張皇弗效爲愆  
獨幸踵前諸名公後百凡建置具有畫一可循而



衛陽先生集  
一時諸曹郎亦靡不奉職惟謹愬且稍稍釋乎然  
竊有繫於內附之虜請封之倭叛服叵測而何物  
播酋至厯撻伐則兵固非 聖世所諱也爰手輯  
武經七書屬庫曹郎徐君夢麟爲芟其舊註之穢  
不中窺者間以已意銓正之刻寘南都武學中帙  
成因展卷而嘆曰文武之設雖較若兩途迺其相  
維則經之與緯也其不可相無則輔車也而今之  
學士家多羞言武者蓋藉口於服上刑云不知子  
輿氏特爲當時民殘於戰戰殘於術者而發偏辭  
也不則何以大勇進齊宣而曰今王亦一怒而安  
天下之民民惟恐王之不好勇也今 國家四海  
一尊誠無所事於陰道然幸虜終款倭卽悔禍請  
封播酋當不至久稽天誅耳有如虜且生心倭卽  
受封復蹂躪我屬國則徂旅當遏已酋負固不下  
則衡行足耻已此而猶曰 天子之鐘鼓實式靈  
之亦何賴焉余竊妄意敵在前而寄耳目於旗鼓  
與將在軍而取進止於廟堂者皆敗徵也何也不  
習故也不習則不任不任則不虞敵而虞法而敵



律陽先生集  
思乘之矣顧其原則始於學士家羞言武而其所  
以羞言武則徂於承平無事彼誠謂無所用之也  
藉令一旦有事乃以素不習兵者與敵人爭呼吸  
之命噫亦危矣哉然則是書也與其以無所用而  
不習無寧習之而不用謂用則習無及也如曰習  
者未必能用是必試之於戰而後可戰可嘗試乎  
哉書故首孫吳次司馬法唐太宗李衛公問答又  
次尉繚子而以三略六韜終焉蓋深於兵者也而  
近且有更置之者豈以大公諸家猶有古道德風  
乎是又爲羞言武者解嘲也如曰兵孫吳尚已

重刻紀效新書序

余既刻武經七書成視篋中所携有紀效新書一  
帙徐君夢麟復請而刻之是書余理毘陵時所獲  
蓋善本也彼歲被命總環衛間以示諸營帥亦  
頗採其意爲訓誡一時稱就約束今者奉璽書  
治兵畱都畱都豐鎬重地北浮江而東漸于海襟  
越帶閩島夷時出沒爲患戚將軍蓋嘗一再大創  
之所稱紀効是也治南兵禦南寇計無出此矣夫



兵以虛用而寄於實實者何也按地形習器械練卒伍精技擊兵家所謂形也語有之多博古不若通於今是書蓋通今者歟自束伍至練將其精極於要眇而下至瑣猥而不厭斯可謂悉兵家之情形者也入三家之市使妄意室中之藏則狼顧而失措何則形未審也天之高星辰之遠瞬而望之安坐而筭之若固知者有所以致之矣用兵大事也居恒不攷究其說而猥云變化之妙存乎一心若陋讀父書之爲者顧安所得變化乎古今讀書變化莫備於易易云擬之而後言議之而後動擬議以成其變化嗚呼是深於兵者也

人倫要鑑序

善乎孟子之言曰三代之學皆以明人倫夫學之道博而斯一言以蔽之矣古者國學黨庠制旣明備軍旅之事宜有司存迺出必受成入必獻馘臧僖伯之論蒐狩也曰明貴賤順少長習威儀古人明倫之教其不廢于武臣若此 國家治化昭登風俗麻美介冑之吏荷戈而修疆場勢不得復論



于雍容恬愉之業然而軍實所在耗弊不加飭也  
而踰檢敗倫之輩有藪其間者矣畱都 高皇帝  
臨御之地余以衰庸謬筦樞鑰深惟表帥之弗任  
是憊而所部吏士多修束白好無扞文罔者豈其  
沐浴豐芑遺化最厚又諸先哲之訓厲實然乎競  
競五載幸無大戾今投老歸矣而武選郎沈君迺  
能推廣予意慨文武之途分念世祿之鮮禮據取  
經史格言先正懿訓凡有裨於治身治官者靡不  
肌分囊括會粹成書名曰人倫要鑑復捐俸梓而  
授之嗚呼是不翅家喻戶說者矣且其義崇簡明  
文無誕晦常目在之父以詔子兄以戒弟居恒無  
墜其家聲而緩急則縣官賴其用是書之關係南  
中風化者甚鉅惟爾將士庶官尚用識哉余旣叨  
一日之雅今雖去無能恻然者又嘉沈君用心之  
勤書以詒之雖然是書也推而廣之可以範今可  
以垂後蓋徹上徹下而何用不減者奚直習鞞鈴  
者所宜服膺而已哉

增輯先進遺風序



大司徒齊安楚侗耿先生纂輯前輩賢士大夫嘉言懿行見于人倫日用酬應交際之常者曰先進遺風刻之白下乃先生門人今河南代巡太倉文源毛公倣襄陽耆舊故事增輯先生一二行履復刻之汴中命余序焉余媿不文且覽先生自序暨文源公與周學憲前後二序則先生所爲企往哲憫流俗欲挽頽風而返之古意甚善也語甚具也余復何言獨憶嘉靖丙辰丁巳間江陵陳見吾中丞爲吾河間守先生時爲大行過中丞畱與談學信宿見中丞所一童子善詩歌清辨有異材問之知孤寒無依中丞收養者曰此子可教母俾下流也遂携之去時余方爲諸生得于士人傳聞咸喟喟服其惜孤云迨甲子歲余司理毘陵署宜興篆事先生督學南畿檄常鎮兩郡茂才校藝于宜興匝三月竣試事終始周旋目擊先生言動一毫罔涉于私卽有地方公務商確報書于同時部使亦露槭發余閱封遣之他可知矣試畢將行計所餘廩粟分饋各屬鄉大夫而鄉大夫視廩饋升斗有



無以爲榮辱此豈計廩粟而然哉乙丑余奉 召  
入朝過舊京叅辭先生以二儒生見托附舟北旋  
一爲王生侗壽卽前云河間童子時已携室一爲  
高生知儉因王生負笈遊先生門者俱阜城人俱  
爲學官弟子員後侗壽食廩應試不第而歿知儉  
今爲鄉進士矣隆慶庚午余以省員在告先生以  
侍御陟大理丞亦在告比 廟堂特計臺省諸臣  
行黜幽典蓋柄國者假以報復攻已而併去其忤  
已意者余遂削籍先生以望重得貶官旋躡旋起  
翱翔中外曾過阜城猶自爲文吊王生而高生則  
往來于先生之門如故每向高生訊余動定知能  
自守曰此士人正路也然耗不相聞者幾二十年  
萬曆甲申 今上用言官言起余補官戶垣適先  
生自山中起補都院僉堂每于當事過爲噓余謂  
不宜久令與新貴人伍然余于先生踰二年僅相  
面者二初則道舊叙闊末後余之任南尚寶話別  
數語外彼此無一言他及歲己丑余叨撫此中先  
生總憲南臺時楚中有劉汝國之變而汝屬諸邑



以歲稜多盜當戒嚴余走東問計先生曰汝黃接境先有盜藪賴故孝廉官思恕化誨平之今可祀官而彼中豪黨自應感化余如其言賴以無事茲讀先進遺風而因思及余所知于先生如前云云者孰非此風之昭宣哉蓋先生涵養真純操履篤實一出言一應務罔不自古道中發之語曰惟聖知聖惟賢知賢其輯先進遺蹟以風世也豈徒託諸空言已乎是故文源公增輯有見而余據所知略爲陳述亦將以補增輯之未備也然先生人品行業海內人士所共仰凡各有所知而續增以入者又不知其幾矣其大而爲國史所錄姑亡論已夫先生纂輯是編而先生即可載入蓋以先生無媿前修也後之觀是編者目覩心惟而身體焉必曰舜何人也予何人也有爲者亦若是毋徒曰世變江河愈趨愈下今難返而之古也則古今人不相及者亦罕矣此固先生風世與吾儕增輯叙述之意也有志者其勗諸

重修縣志序



夫邑志史類也史賢紀實而浮誇點綴採輯失真  
適足取姍于三長君子以故作者修者往往慎而  
難之吾邑有志歷有歲年弘正以前先達馬素菴  
暨其子東田與呂西田諸公相繼創修卷帙久逸  
今可考者惟嘉靖壬午趙邑侯榮顯所爲續纂而  
孫沙溪緒所潤色者迨今七十餘禩前之紀者或  
湮沒無徵而今宜收錄者更復不少然宦于斯產  
于斯號稱能文者竟相視逡巡莫肯受載筆之任  
誠難之也蓋邑僅八里閭巷湫隘物業蕭條過其  
地者每竊咲其陋徒以古有澹董濬文教之源而  
明興以來如東田沙溪輩以高科顯仕文章氣  
節樹人文標的而益衍其流今之鼓歌于庠序者  
且近三百人其文盛可知已乃觀邑志者謂其紀  
載多文而無他盛概將欲刪之病于蒐羅之無具  
將欲存之嫌于體裁之失準是故難之而鮮克任  
其役也萬曆癸巳冬余奉 上命赴南都叅贊任  
過里里人夏大夫維藩以修成新志一編付余挈  
至南中刪潤之蓋邑侯吳君能進懇屬大夫偕二



三士人校修竣事大抵綱領節目一因其舊而增益其新惟于其甚無當者盡削焉去取褒貶詞義嚴正余方壯大夫之果于任事而克成數十年一邑之缺典又何可以不文而不共成厥美哉顧南中稱閒曹而余以庸朽適值務冗不暇爲也因托之上元鄉耆李大尹登于凡規格之裁定詞旨之修飭字句之訂正一皆犁然郁然不浮不舛庶幾哉可類良史矣噫嘻是志也昔修于趙侯而贊成寸孫公茲修于夏大夫而克襄于李尹趙與李皆金陵人也以吾邑文獻之托兩有藉于金陵之君子詎不謂之奇事也哉書成將付剞劂氏以垂久遠余因叙其顛末以弁于簡端云

太僕常公督河奏議序

今歲己丑心吾常公已爲太僕前歲丁亥公以給諫督勘河務有奏議若干卷先撫臺衷公序之甚詳公之勘理日適衷公秉鉞梁宋會與共事公旣晉令秩衷公亦擢司空余旣承乏衷公後私竊恨不獲聆公規畫奉其指揮乃余讀其奏疏則嘆



曰嗟乎常公豈不爲社稷臣哉今之偉公功者多矣大都謂國家命脉寄之全漕公以數月底成功以一身基大命此其事非不甚偉然此以論夫往日之河工耳非公之所謂功也凡公之所謂功惟公知之惟今南北濱河之人知之他方不知也夫古之以平世而發大難之端者其事率起于河漢武席文景之富厚以塞河逐虜遂耗海內迨至晚世大役一興萬方雲擾則隋與胡元之末路是已夫亥子之際寓內爲何如哉非旱則水十年而九非死則徙十家而五揭竿斬木直需時耳思亂之民釁然後發河固爲之釁耶矧其時籌國者且有引沁入衛之議有復黃河故道之議其筭利害計久遠豈謂無術顧時誦舉羸費財動衆謂國家遠慮何公以身捍其議比于捍河沁水可通其如藩國故道可復以待後來嗚呼此二言者蓋劑世之良術匡時之上略與夫然後以河治河以漕治漕居無事行自然散財于官帑就役于饑民民不召而來工不督而奮非常之役成也忽焉當是



時微公之故將議屈于盈庭見成于作會計未然  
圖難就內有不可必之民命外有不容已之工作  
豈直河患難弭大眾久聚百隙從生卽天下事且  
不可知而况其他故猶之乎興事動衆也昔以耗  
國脉今以培民命昔以基禍本今以杜亂萌盖聞  
之惟大人者轉禍爲福返災爲祥公之謂與且夫  
梁衛淮徐之交盖五方之會而天下之樞也漕通  
而京師之命脉以通梁衛淮徐寧而五方之黔庶  
以寧然則公之功豈直在漕豈直在河今天下內  
寧外救無所事事工居肆農狎野公卿大夫垂紳  
緩帶雍容廟廊其誰論之嗟乎如公者豈不謂社  
稷臣哉余與公同居諫垣相得甚又後先經略中  
州深維尸素之媿猶幸席公桀矍祇事河防尚得  
與中土吏民共嬉小康以故手公疏議三致意焉  
于是乎因公之請而爲之序

毛文簡公遺稿序

勾吳毛文簡公稟具區之顛氣體海壖之純靈弘  
治初 天子恭儉方修綈衣革舄之業公入對敷



陳纚纚數千言詔制科第一不佞隸諸生時披誦其策則戟手嘆曰海溷地負何必減漢太傅家令也顧以罕睹全集爲憾萬曆庚寅歲獲與公之從曾孫侍御文源公勸勦中土乃得遺藁一編讀之卽公平生制述鴻篇鉅裁僅十百之一二乎然鼎實染指足餘味已公之學根抵六經苞舉百氏縱之可隘八紘擊之乃不下帶爲文長于持論不尚雕繪典而不曠穆而不詭舒而有餘昔人謂由其言可以入道操其說可以成務稱知言矣夫葛天獻響軒雲揆象泚泚爾灑灑爾周郁楚芬下逮二京翼唱六代擺綺綴繁露而絢風霞世運故也公婉孌文明之代神情玄暢風韻宣朗以故其文莊乎其體雍乎其氣鬯乎其辭昌澤乎其理冠冕揖于朝宁罄敵錡于清廟粟帛前利于生人盛世之文其然哉 國家綦隆景曜獨昌于 孝廟一時茂休玄懿之風奏焉如泰和以理學著北地以文章名餘姚昌化嘉魚以節義顯皆公同升之彥公與之方駕并軌爲世鏡勸 國史載之詳矣寧



獨是編鼓吹休明邵于來奕已乎又聞之二儀清  
穎沕滴之氣豐于澤國溟渤行乎大荒乘靈構化  
何所不神毛氏吳趨世德深山大澤龍蛇出焉由  
茲紹明其業烜起 昌曆世爲我 明鴻碩鬲翼  
之臣是在侍御哉是在侍御哉乃文簡立朝崇譚  
闕樹公忠亮節略具于雲杜李君序中不具論

孫沙溪文集序

嘗謂文章關乎氣運故世代隆汙人文高下因之  
然淵穉駿發美全道備則又係乎所養我 太祖

高皇帝汎掃胡元一洗腥膻侏儻之穢而復自古  
帝王禮樂文物之區 列聖相承文教官明浸漬  
而至成弘之際賢豪輩興擅名作者之壇足以追  
古初而軌來葉者斌斌然盛矣維時沙溪孫先生  
崛起吾邑稱巨擘焉先生幼稟竒質成童卽善聲  
律長遊蘄文僖公之門漸涵淬礪文譽輒威蕤著  
京師旣以亞元登己未進士二甲第一歷官文選  
郎太僕卿一時作家名流爭願結社遂爲藝林嚆  
矢然亦以是招忌年逾強仕遽爾懸車歸來杜門



却掃不事他營大肆力于篇章吟咏興至攜詩文  
嘯傲于雲丘烟林勝處氣益豪得益閱深詞章日  
益輝耀燕瀛齊晉間不啻千里函幣丐文者屢恒  
接戶外先生任意矢口對客立就而舊典古辭若  
鬼神默輸以翼其毫端者流傳遐邇亡慮數十百  
萬言今先生沒且三十餘禩矣穹碑豐碣長軸短  
冊人誦而家傳者爛爛如也先生冢嗣太學生若  
谷懼久而放失湮滅迺蒐羅四方得詩賦序記雜  
文各若干卷手錄成帙裝置家塾余嘗取而覽誦  
焉雲蒸霧變郁乎流霞日耀星輝爛然奪目其規  
格如綺紱畫臺拱揖乎殿閣高冠大戟森列于左  
右也其色澤如玄黃青紫鬪麗于晴和璜珞珎璫  
金粹于溫厲也其縱橫迭發如奕碁參差而白黑  
不淆如盤珠動盪而卒莫爲之入出也其春容大  
章如長江洪河層濤疊浪浩浩渺渺而無窮際也  
其寂寥短篇如竒峰異巘獨伸精彩纍纍然翼翼  
然燦可觀覩也大抵宣洩理道闡發性靈意興所  
適筆鋒輒到不爲軋茁骯骯棘塞詭衆之語闖然



入古作者闔奧矣蓋先生之文步趨于昌黎坡老  
父子五七言律絕古詩依稀乎盛唐風骨詞賦樂  
府有漢魏名人遺響諸體兼備饒險一則偉哉煨  
煨乎可以徵所養矣可以傳于世矣余把玩兼旬  
不能釋手既而思之昔人以鄉邦先達文獻泯滅  
無聞引爲已媿余獨無媿于此乎因走書白故于  
河南太守金齋宋子宋子曰吾事也遂捐俸壽梓  
隄齋以廣其傳復以書來曰子其序之序曰功名  
赫于當代一時之盛也文章垂之簡冊千古之休  
也藉第令先生久于位而躋要陟台盡據所蘊可  
伯仲蕭丙無難者然未必著述宏富可傳如今日  
也有道者觀之當不以彼易此矣然則先生其不  
朽哉先生諱緒字誠甫別號沙溪其行業具載大  
司徒海樵王公所爲碑記中

宋金齋文集序

余自束髮與金齋宋大夫共筆硯于里中昕夕相  
與切嗟余最不敏幸窺一斑不至終闇芻蕘藉大  
夫爲指南無何大夫亦釋褐官郎署顧涉世踰躡



輒起輒躋謫忠州稍遷南部改北部出知東昌改  
鄖陽繼調河南尋以親老棄去又數年復起補兗  
州宦轍幾半天下所至蒐竒抉奧懷人吊古贈酬  
記序總諸體之玄粹勒成一家言卽日跋跋簿書  
間苦吏事障而縱橫揮灑罔非寸珠尺璧斯以難  
矣然大夫直寓耳非其好也迺大夫之大者在佐  
部治隳時奏對疏議事宜規則諸篇今觀所條陳  
若救荒弭盜學校農桑錢課漕兌吏治軍政皆切  
時務之要當事者能設誠致行之鑿鑿乎功見言  
信夫玉卮貴當于盛龍淵貴當于割文章無當于  
世用雖工奚裨若大夫者所謂有用之文章非耶  
及誦其自警之銘克復忘助之論學有本原已可  
槩見膏沃光燁仁義之人宜其言藹如也視彼藻  
繪者流鶯華絕根鏤脂刻冰一無所用之者曼然  
懸矣惜也位未滿德年不償才竟不獲以經濟之  
學潤色鴻業豪傑所爲於邑已第其道德有之身  
其勲澤加之民其論列雜著俱足鳴世不可磨滅  
古所稱三不朽大夫有之于大夫何病焉嗟嗟人



亦  
有言存則人亡則書大夫之身與其不可傳者  
已矣獨賴此編之存余手其編未嘗不廢卷流涕  
也是用忘其蕪陋弁之簡端捐俸托開封守同里  
陳君威如氏付之剞劂以志感云

賀懷棘王侍御還朝序

古天子巡狩之典久湮漢以博士承明詔建節  
馳傳巡省穉國存恤四民禮三老詳問隱處亡位  
及寃失職茲稍爲害野荒治苛者舉奏薦剡守若  
令能官師廣宣厥道者有特招蓋代天子事仔

肩也我明以直指使者按天下蓋防此意故非  
正大方直平恕明允者不輕授非通達國體洞燭  
民情陶冶人羣鏡稽官常試有成蹟者不再三授  
至鉅重之矣魏博王公以名執法初按九關再  
按兩浙勛業在官澤惠在人口中外推轂而望幟  
者匪一朝夕及萬曆丁亥入報命上曰爾爲我  
更按中原業知公之在陝陝治在越越治駕輕  
就熟胡難中原也夫中原夙號醇樸渾噩之區仕  
宦商賈爭馳騫焉卽我祖宗剖符王諸天潢派



多圖厥居故省列八稊七建藩封乃邇來醇樸者  
梟桀渾噩者蚩靡仕宦債仆商賈零落 宗藩數  
萬指待食縣官廩不繼爵不瞻枵鶉下等于齊民  
不約者相導爲椎埋鼓販之雄蓋中原自今始難  
治乎也自 公奉 璽書入大梁僅一歲所周淮  
蔡踰陝洛涉宋衛環數千里諸若節車輿省厨饌  
裁奔走與學校躬親節儉輓頽風而澄弊藪者更  
僕未悉數卽取軍國大計一一綜理褒誼旌良除  
穢鉏豪蘭筋駿才者錄鷄廉狼吞者黜上下凜凜  
奉約束復料諸水旱災疫之墟懷置而沫响晋二  
三有司咨諏所以導和富民竒策若家督然慮罷  
縣關木荷葉之徒改弦調更契書民無誣心執準  
守繩時行幣物流有餘而調不足蓋懲墨膚而起  
白骨封事不啻數十上也且也歲當舉孝廉選材  
官計羣吏所號三大典皆 公董其事羅諸博士  
弟子員堪對公車者若干人升之大宗伯簡橐鞬  
踴趨可當一隊者若干人登之大司馬判若藩臬  
二千石長尉倅隸之黑白若干人付之大家宰蓋



咄嗟辨已俾大河南北萑苻絕鳴桴室廬希啼龕  
草莽鮮投憤泣璞之夫麗邑遁虎冠蠅綬之長農  
夫有所施其耒耜女紅有所粥其織衽中原良亦  
徼厚幸哉又是年 天子方寵介弟錫茅壤于衛  
營公峙糴以至資斧猥瑣事如蝟毛錯乃公石畫  
而金汪之業有成計諸執事奉行若額銘券索卽  
雅歌營謝城齊不良于是矣余不佞以戊子之冬  
亦奉 璽書撫中原步武後塵若守蕭規而鑄范  
矧也乃居無何則 公已竣中原事春風駘蕩草  
長鶯飛隋堤柳色悅可人目而 公張憶馭騶番  
番入都門矣余不佞叨桑梓末誼藉甚 榮光舊  
矣敢登繁臺酌大河驪歌方闋九頓而颺言曰  
公行矣願公毋忘中原也且毋棄余不佞也方今  
天子聖明正加意天下事且 公所經理中原  
者業旣底績倘 臨軒問所以治中原狀惟 公  
卽所以經理者對曰中原事臣誠不敢瑣尾瀆天  
聽總之民力竭矣吏治窳矣士風偷矣宗政隳矣  
臣聞川源不實漏卮山海不澹溪壑惟爲 上亟



循陽先生集  
三  
停燭以蘇子遺之命窮鼠啣狸困爵喙鷗惟爲  
上慎甄覈以簡司牧之材河決若甕口而破千里  
况禮決乎惟爲 上黜浮薄以崇大雅之軌置堂  
者築基翔千里者理戢羽翼惟爲 上廣義范以  
賡振振之風如是則 公之今日厝置永作帡幪  
所以陰隲中原者將垂數十百禩且不朽而余不  
佞所幸藉手于公以對揚 天子休命者亦因以  
不墜若微沐恩私酬艷鄉曲則余不佞中實眷眷  
然未敢以之鼓脣舌壯公行色也

壽毛太夫人序

絜今衡往考德論世究觀古賢士之樹立則家教  
所繇已漢不疑晉士行唐景讓善果其人爲世鏡  
則芳休燿于來茲揆厥所元則問平反稟教誠廳  
事之箴障後之察蓋母氏聖善茂崇藻行昭宣榮  
聞記牒所稱潤芳籍矣乃今于直指毛公而知有  
太夫人 公先世遂顯諸侯亨精詒訓玠表忠  
于素屏曾倚榮于玉樹先宗伯文簡公文章道德  
焜熠寓內 公益光而大之爲吳趨明德 太夫



人長洲聞閩父簡州理學魏恭簡公從侄也恭簡實李氏以外姓從魏簡州繇賢書兩爲令晉州牧以守正不阿聞于時謂毛氏世德又兩家同師莊渠之門也 先封公得委禽焉 太夫人幽懿用貞柔嘉維則亢德耀之高行醅班氏之媿訓公由舞象之日至司理麻源樹標柏蘖實多所翼畫方直指時也 太夫人誠之曰御史入侍銅螭彌袞闕糾百司出察官邪采閭閻疾苦嗽至尊爲天子綱紀之役蒼珮絳綳董董樹威宣驕也職

任謂何 公兢兢教命數匪函封事譚 廟堂大計兩按貴竹齊魯觀風河洛博而不詭貞而不苛惇大體則事不毛舉折姦萌則無弛大憝見之真也颯激山屹利害罔移惟時君子減德小人愴威色聲不大而方內謐如 公卽規芳兢兢爽妙簡異才乎則 太夫人內教檢廸不尠也曰禮義之門朝廷楨幹存焉有齊名李杜之訓則攬轡生風有却還賸米之規則臺端失色彼曩所稱名御史乎賢母乎方之太夫人及公獨俾斯人顯美前世耶



允矣家教所由已庚寅八月十日實唯悅辰 太  
夫人翟冠象被鳴珈珮玉坐釐介祉三吳諸彥登  
歌播頌綦響履臻大年共祝 公方繡衣持斧行  
方岳部中不獲稱觴堂下吳閭寤言南雲寄欵悵  
焉士衡懷英之感也則聞之昌黎語歐陽生父母  
之心以得爲榮詹在側雖無離憂不樂也詹在京  
師雖有離憂樂也 公卽王事拮据有懷陟屺不  
獲筐洞庭之苾蘆飪茂苑之香粳和蓴羹汎蘭醕  
奉 太夫人萬年之觴蔚爾風采諷議中外海

內誦 太夫人有子爲

國聞臣陶陶然致足樂

矣曩恭簡董學宛洛簡州筮篆沔池乃

公又茲

省方則兩河之徼福

太夫人與

太夫人之加

惠河民類夙緣然者頌必待

公稱觴而後爲快

愉哉往聞壽星曜斗女分其下多耆耄太老而

公家百齡人瑞尤竒豔吳中

太夫人應符占緯

當 主上仁壽海宇昌際導女偶之孺色長陽都

之連眉纈根菊水苻晶輔龢益躋胡考商觀 公

標紀璫階燮和珎鼎闕開我 聖世壽域則今日



始乎不佞與 公聯鑣中土同心勸勦殷然駢蛩  
之誼焉乃原家教并 公風猷之卓者爲 太夫  
人壽乃有績西岷之圖寫南嶽之誥夸東渤之籌  
哆北斗之杓則世恒所頌祝 太夫人無籍此矣  
賀邑侯李墨潭行取序

三代而下惟漢敦上吏治重守令蓋以親民事習  
典故嘗辛苦乃可稱 上任使故賢良治平者不  
吝賜金賜爵賜 璽書以示褒榮以是一時擅勛  
立名者多習爲令若張敞黃霸尹翁歸龔遂陸康  
董宣輩鴈次鱗列嫩照簡冊後世人隘百里官簿  
五斗以守令起家聲者不得與張黃諸人比 明  
令甲多循漢制敦吏治而重守令臺省額虧冢宰  
御史大夫黃門長請于 上求充之采而晉之奉  
常中舍大行者十二檄而徵之理官者十一乃令  
且居其十八也夫人臣肩鉅據要惟臺省而多得  
之令殆徑庭賜金爵璽書已且也張黃諸人所當  
京兆洛陽潁川瀛渤多輦轂三輔權豪難治而奇  
行銘官惠澤碑人口旋登膺仕艷譚千古尤難之



哉河間卽古瀛渤地故城素巖邑也上者雖弗獲  
貴德務詩書篤農桑如古傳記言然民朴高尚氣  
力寡求弗爭衣冠不乏吾侯以江右名家後占籍  
貴陽明經分博士員以能來令此邦范已潔清法  
行不阿懲刁而惠良徃則有伍簿訟不宿錢穀維  
計津梁罔圯裨萬戶若堵而尤夙慕子羽仲舒之  
風享之春秋以作士正俗蓋不寧唯是容止修整  
聞識博洽工詞章巋然動人數年來邑之里無豪  
藩無悔髦士彬彬有起色殆彷彿張黃諸人所爲

治平者矣乃 今天子萬曆之己丑冢宰御史大  
夫黃門長以臺省額虧遵故事請于上 詔簡中  
外諸臣之號賢良稱治平者徵之而吾侯被召最  
先行有日于時余不佞奉 命撫中原值水且旱  
總督民事方理勅副墨申一言張之行李而吾邑  
之憂大夫亦以二三縉紳諸黔白之請來請則余  
不佞其何辭謹北望拜手而颺言曰侯之來邑之  
幸也侯之徵邑之慰而中外之幸也蓋工瑟者不  
改弦宮商諧故善御者不易轍脂轡調故明治者



不嘗術德業赫故今以侯所爲政一故城爾所以  
范已行法御民善俗平賦而杜武理逋而舉廢者  
何難于急無如東濕而察無如撤藩何難于輒毳  
之罟于利刃而吞舟之漏于密網也所以飾度而  
攄藻者何難于慚箕踞之習態而就步趨挽餽匄  
之濫觴而收風雅也所以崇子羽仲舒而嗣張黃  
諸人者又何難于重身經務齊芳躅而追古人也  
操刀必割染指知嚮理有固然哉侯行矣余不佞  
謹企予望之大夫諸君子其果以余言爲足憑耶  
請卽以是爲贈侯之言

邑侯顧星泉入 覲序

夫從仕者疇不雅意華要矜詡才名以求無負于  
時願仕蘄于才而所爲運是才者初非張歛注厝  
間藻繪白望可獵其萬一故誠與才合昔譚蘧之  
無其貞衷愿質助伐自流彼玉理炫外敗絮頽中  
者于時無當也漢治近古號稱循良者若河南穎  
川襄陽諸彥非有一切精悍剋核之術迺其治行  
卓異焜燿區宇豈非誠與才合固然歟侯吳世家



恂恂樸雅起家賢科竟以才名分篆救邑邑故瀛  
屬比歲以災沴頻仍民稍嗾窳難治侯之始蒞也  
專務德化不務于牒訴檢式之詳循默謹厚而人  
自肅于令邑賦以萬竒寔寔積書持爲利柄而奸  
豪者因賄冒免多逋負侯甫下車會審徭編親自  
辟手畫酌宜便民成賦外毫不入羨丁是賦歛稱平  
輸將者恐後民有奸訟侯炳若燭照靡不心服贖  
緩無過督間有豪暴骹法武斷里閭者廉得其狀  
又輒繩如律無姑縱人稱爲神君云邑故褊小當

孔道先是令茲土者苦于供億侯若以廉平亡疆  
外之交東修之餽而民困以蘇歲時巡行鄉落勸  
課農業置義倉建社學若身爲虞衡司徒勞來督  
相不置已復立爲鄉約取 高皇帝大訓而侯廣  
衍之家諭戶曉又嘉惠文學以經義課士以廉節  
維風貧不能舉禮者輒捐俸周之卽今菁莪蔚起  
人文愈益赳赳埒鄒魯矣勝政善狀窮筆舌不能  
殫述侯何以得此哉蓋侯丰度凝重褻躬清脊中  
誠悃欵不彫其素以故曾未週曆而德教旁流聲



華藉起雖名不斬近而上之人亦以直道信若大中丞按部使者諸君輒異之有精悍剋核吏所欣豔而不可得侯以無心得焉噫嘻侯蓋古循良傳歟方今主上神聖炳于萬幾頃 兪憲臣之請持實政以綜覈名實茲且屆期應 朝受計大冢宰今邑令所稱保惠元元而誠與才合者孰如侯茲行也必以異等當太宰太宰且表次而褒異之陟華躋要褫帷不復故矣上急徵黃之命下懸借寇之思侯去畱難爲情哉余緬惟昔理毘陵識侯于青衿中侯嘗爲予言久任之利有如陟華躋要不復故也者非特百姓嗷嗷士紳惘惘卽侯或有不能釋然于懷者矣

附宗系引

吾家原籍太平府當塗縣采石鎮人永樂中徙閩右墟實畿甸有祖諱思誠者奉例爲故城勸農屯民遂家焉先高祖時譜牒俱存後以回祿失之所可考者先祖遺寢祭一神碑而已近于族祖璉所得一齋狀蓋正德二年高祖謝世時五七追薦疏



也具載上世頗悉自吾身而上可得八世與前神  
牌相同嘗聞先祖云當塗宗派實盛原有作某宦  
者正德以前南北宗人往來不絕然今無可據不  
敢妄爲之說第世懋兒鼎聽講暇見吾屬目前疏  
請焉因示其所以而列家世大略于左方畀之使  
知水木本源之義若夫譜之作也姑有所俟云



衛陽先生集卷之十

其陵周世選文賢父著

武林後學沈獅

較正

同邑後學沈嘉

孫男承芳編次付梓

詩

秋暮旋自西村道經衛河

野望平蕪秋色闌  
疎雲斜照鴈南天  
臨風楊柳流  
霜葉夾岍村墟起  
暮烟漁唱寒汀孤  
棹迴笛聲衰



草幾人旋籃輿遠道催歸思籬菊噴香正爛然

雨坐栖雲樓

凭欄徙倚望空濛疊巖層巒杳靄中風擁溟雲千

樹合雨籠平野萬畦同閒衙徒抱蒼生慮時从晚

種猶欣造物功安得遐方憂旱處時河洛關陝尚未聞雨報滂

沱均被報年豐

重過黃村寺有感

三十年前此借居近因許飲暫停車同游豪雋升

沉迴識回頭陀語笑疎黯淡秋光盈碧落荒涼僧

舍半丘墟古來興廢那堪擬仙梵塵沙任所如

仲秋月夜宿鹿豕庄

萬里秋空氣色清夜闌風定半陰晴危樓徙倚燈

花暗孤枕蕭條魂夢驚身世幾回歸鹿覆心旌常

欲戀鷗盟曉來自料生涯拙杖策西疇一問耕

初秋晨出觀河水泛溢

茫茫烟水浪花新村北村南不見人遠寺依稀三

島岼平疇渺漠五湖津田家坐苦秋塲廢圍守空

嗟露井堙眼底淒涼無限事西風回首自沾巾



過唐家廟

日午郊行汗浹衣  
荒蕪野廟暫停騑  
鍾懸清晝人何處  
風撼古槐鳥自飛  
繞砌連雲禾黍地  
殘簷剩照夕陽暉  
獨憐碑上昔賢字  
萬古令人感慨歸

碑文

孫太僕  
沙溪書

過三義祠

勲名赫赫人爭仰  
遺像堂堂自拜瞻  
帝蜀祇緣漢統重  
報君不避身同殲  
吞吳挫魏雄圖壯  
取義成仁祀事嚴  
試問徘徊俎豆者  
今祠何故徧閭閻

郊行

迴看遠近草芊芊  
路轉村墟與杏然  
拂拂平疇禾滿地  
遙遙斷壠樹含煙  
點衣野馬麾難盡  
極目長虹望更懸  
安得及時霖雨足  
不教太史記無年

送宋金齋河上歸夜寤賦此

金蘭契結已多年  
相愛相携意藹然  
風雨床頭思往事  
冰河渡口送征羈  
交游漫說陳雷誼  
繾綣仍投秦晉緣  
入夜不知分兩地  
夢中還與話周旋

酬鄭年丈蘭石寄問



都下別來一紀餘升沉踪跡竟何如杏園陪侍結  
盟早瓊闥睽違會面踈君自錫環傳稷契我應垂  
翼老樵漁邇承不淺綈袍念遙謝惟憑咫尺書

其二

長把魚竿逐逝波更從隴畔聽農歌自拚枯朽爲  
時棄忽有鱗鴻拂目過斗望天邊懸注久踈懷林  
下漑沾多期君北上知何日還肯停棹問薜蘿  
燕薨侯城薨城成有贈

瀛城新砌勢言言樓櫓飛懸鼓角喧壯麗一時弘  
翟貫高深千載固維垣京都南望稱雄薨寰海北  
瞻肅巨藩誌問崇功誰締構魏賢守重乾坤

其二

瀛州自古稱雄薨保障于今頌偉人謀國預爲防  
衛計告成共喜金湯新神明鼓舞宜或鯁帑幣經  
營不費民北護帝居堅屏翰褒嘉指日拜 絲綸

別趙二泉鄉丈之晉州掌教

望族衣冠擅魏鄉五年師範重瀛庠褒書幾度厯  
臺史振鐸新催縮晉章桃李垂垂時雨足劍琴灑



衛陽先生集  
灑轡聲昂行來總是粉榆地衛水恒山教澤長

其二

從來趙璧世祿歆獨借輝光歲月深忽報鶯遷輟  
舊講漫歌驪曲忍分襟門墻故繫兒曹望道雅新  
聲士類欽還擬他年金馬詔山中拭目佇佳音

送懷蓋蔣父母應 召北上

曾說虞城李太白春初始得識清裁廣言自是二  
公器燕珮原非百里才騰踏飛黃空北冀縣黎結  
綠映中台聖明 天子思賢佐爲報丹霄鳳詔來

其二

英年詞藻重三楚花縣聲光徹九重琴鶴促裝瞻  
鳳闕樽壘祖道集章縫懷葵久擬忠輸惻補衮行  
看日拜封願使虞廷熙帝載野夫擊壤頌夔龍

酬金山人

偶然傾蓋便知心談麈雕龍擅藝林湖海行藏人  
似玉吳山才望衆推金卷中爛熳張莘賦席上瑋  
璫伯子琴媿我慵踈荒筆硯勉酬佳句一閒吟

酬李憲長年丈次韻



杏園逐轡記當年初拜恩光  
玉陛前丹鳳樓頭  
香靄靄白雲署裏竹娟娟  
匡扶曾許絳侯節勲業  
還期李靖賢終是宏才堪鎖鑰  
奚憐踈妄噤哽咽

其二

歸來臥病幾多年荏苒光陰不似前  
聊檢縹囊供  
歲月羞將華髮對嬋娟  
悠悠踈懶成吾拙  
滾滾瓊瑤識爾賢  
遼海燕雲勞夢想那堪回首更悲咽

其三

千里題緘話昔年喜逢珠玉自尊前  
遙添鄙况起  
沉痾爲報君顏仍靜娟  
懷舊陳雷明義氣  
籌邊韓范屬英賢  
燕然會見垂嘉績  
誰謂單于食下咽

其四

想像丰姿英妙年彈冠射策冕旒前  
忽瞻星宿明  
霜鏑豈謂陰霾救月娟  
匡時誰蒙敬仲耻  
定傾還賴李綱賢  
憑君莫話當年事  
話到同心便哽咽

送劉掌教赴任魯王府

齊右才名壯歲聞  
耳陵教事老猶新  
瀛南共切蘇湖望  
魯國專資屏翰臣  
征旆迢遙情脉脉  
河梁樽



涓水粼粼異時爲應君王召便道還能話故人

澹村紀夢

時萬曆壬午九月六日也

別君三載隔幽明夜夜從君宛若生夢裡慙懃情  
藹藹覺來悲愴淚盈盈牀頭衾枕昔時物窓外雨  
風別是聲欲賦悼亡明此憾幾回搦管不能成

邑侯蔣慕竹誕子

畿輔循良第一流謳吟處處頌賢侯和聲四溢臻  
祥瑞英物初鳴壯治裘市里忻傳熊夢叶

元旦邑中多有

夢神送兒縣侯者今果然

慶門應許鳳毛儔何須更向商瞿問

佇見藍田種種收

其二

蒲城喑喑聞歡聲報道吾侯產俊英天上石麟呈  
綵繡相間弧矢炫崢嶸粵堂深處槐陰遍燕地于  
今桂葉榮遙憶司空垂澤永擬將繩武列簪纓

其三

積善徐卿譽未磨麟郎著美杜陵歌專城今見隆  
施久報德還應樹胤多鳳集肩邊兆不偶珠擎掌  
上意如何盈門冠鳥駢稱賀爲寫廉書豈憚訛



其四

九天淑氣凝花縣一騎飛檄過嶺巔步武得人光  
闕闕克家需用倚楠楸北堂萱草宜欣茂東閣梅  
花喜信傳時嫡夫人侍尊堂家居料得乘驄榮畫錦斑衣纍  
纍列庭前

別宣司訓之靜海掌教

絳帷三載羨君賢忽漫臨風上別筵息國鴻名人  
自重宦囊螢火老猶懸依依遠樹催行色望望停  
雲滿會川 聖代掄材途正濶雙飛鳧鳥在他年

答袁吉巷

半生學道總亡羊慙我支離老一方蘭室無緣逐  
步履朗吟珠玉秣悲傷  
閏四月念三夜識夢

夜闌風定轉陰陰夢裏觀孫識好音何處鷄聲相  
喚急覺來時事總關心

其二

畫角聲殘天色明幽人獨寤夢纔成衣冠濟濟當  
年事彷彿孫行又益丁



贈陳瀛南按蜀

鳳池僊羽振朝端  
奮翮澄清四野寒  
回首五雲臨  
密勿天門萬里拜金鑾

送陳瀛南司理平陽

攬轡澄清志飛騰  
刑獄名指揮動山岳  
信令下雷  
霆臺迥星辰白  
簾閑霜月明  
五雲縹緲處會待鳳  
凰鳴

贈辛慎翁赴大理任

我愛襄城辛夫子  
孔庭詩禮龍斐姿  
蚤向明庭吐  
竒抱盡是琅玕與  
鼎彝甲第先題鴈  
塔名牛刀初  
試爲民牧晝長單  
父琴清越春暖河  
陽花郁馥諫  
垣就列思陳力  
悃衷亟灑沃丹極  
秉持國是補中  
天排闥叫閤非  
沽直 穆皇天子  
改元初不爲修

文忘武備珍重 先朝老諫院轉致慤  
懃來問寺

魯桐駟馭奮騰  
驤夙駕服驂無  
小駟砥柱中流  
患畏途歸來三  
徑舊松菊祀人  
本未忘憂天商  
宗恭默求賢速  
江湖廊廟悉王  
臣敢爲身圖畏  
鞅掌鳴騶飛蓋  
入三關童叟僕  
僕拜稽顙西夏  
于今有范



韓男不驚烽女績紡滹沱水濶恒山高淵魚麓麇  
咸育養我今鷓雀斥藩籬鵬鷲天風空馳想幸喜  
年來戴二天天光照覆入盆盎杜陵不防惡少欺  
問存元亮勤祇仰 聖主臨朝恤虐刑欲使臯陶  
爲大理昭代有人爲士師枯槁溝壑無依倚忽憶  
同官京邸時丹衷結契如昆弟有時連鑣復連床  
把酒論文無鑿枘不因過從通知客寧將名紙煩  
輿隸回首今昔二十年圖報感恩宜沒齒但願三  
台色光齊后臣合德相歸美

壽潘印川總河集古四解有序

皇帝萬曆之載靈聖昌寓光華日月啓黃  
扉而燮五緯躡青帷以調萬方瀚海玉關  
三輔絕星邊之飛騎蓬池金危八紘報斗  
下之函書乃睠瞻國計于東南枚卜臣鄰  
之上下論求故府風想舊哲乃命 大司  
寇印川潘公爲御史大夫俾作舜臣用績  
禹績 廟謨特芘之也時蓋河伯軌命陽  
侯煽靈鴻湧驚騰軼瓠子金隄之轍奔浚



湖泮瀆淇園銅阪之防 公乃抽秘思運  
邃策鎮閩域鎔良陔投壁馬以沈淵負括  
滌而植岳使德水伏靈翁河若訓浹四瀆  
而媚雙川澄崑丘而鏡積石布颿無恙舳  
艦啣尾包茅有貢織絡輸心非勞擁楚堰  
之泉而京坻可副無用導秦渠之水而礲  
阜是盈 帝曰赫哉乃渙綸綍載藉瑱珉  
爰擇剛辰復還舊物詎非上臣之懿典  
昭代之殊勳耶蓋公儲精天目毓秀苕川

藻逸潘花光浮衛玉探照乘圓流之下分  
鶴節而夜清梧棘悲號削連城崇巘之顛  
听薦寇而晝冷社城煽焰盈門桃李春風  
拂紫薇丹桂之山護鑰豹貅秋雨肅虎踞  
龍蟠之地星沈貫索靜觀頽浪而砥柱中  
流雲接殷衡笑越要津而舟橫野渡盖欲  
了烟霞蘿薜之緣雖搖心旌以去國然已  
塵鹽梅舟楫之想竟敢回目練以瞻 宸  
豈任抱高明之風而枕流漱石正擬舒久



鬱之略而致雨興雲固宜佐金天于江水  
而忠鑒帝心明玉版于河宗而揆留皇鑒  
者也茲者年迂松椿日逢弧矢五百年而  
名世已開合德之符八千歲以爲春自應  
大年之祝况階前玉樹藉青錦以舞萊衣  
而閣上絲綸飛黃麻而響彭殿更燹倫樂  
事而闕閱顯觀已選售莼禮闈卽承照拂  
雅德簪筆省闈尤欣仰止高風日今職守  
相聯幸慰倚王之願叵柰封疆修阻莫遂  
披雲之私望中岳而長呼以引穆天子之  
歌酌大河以深酌因獻葛天氏之舞詞慚  
撰杜風雅分葩意篤薦陳筐篚具草敬集  
四解用介萬年

崧高維嶽有紀有唐豈弟君子禋爾熾爾昌如南  
山之壽德音不忘

誰謂河廣其流湯湯顯允君子我受命溥將如川  
之方至自天降康

心乎愛矣承筐是將酌言獻之不成報章我姑酌



德陽先生集  
彼兕觥壽考不忘

保艾爾後長發其祥君子有穀貽孫子休有烈光

豐樂亭次石介峯韻

自昔雄文屬大家豐亭一記重中華亭基修廢形  
如幻記石臨摩手似麻遺跡真成千古調環山不  
斷四時花名公游此多題詠珠玉呈輝時帶霞

陽明書院

朝議當年下瑣闌魯陪正論罔依違源頭學問無  
人我戶牖紛紛任是非海宇廟庭新簋豆滁陽山  
院舊門扉拜瞻遙想盤還日仰企高風思欲飛

偕楊正菴飲重熙洞之曠覽亭



野望平蕪勢廓寥于旌深入轉岵堯雨餘洞口難  
窺宵雲捲峯頭易薄霄樽酒追陪情繾綣山亭吟  
咏興逍遙共君此日惟游後未卜何年續此邀

時正

菴轉符  
丞將行

丁亥中元邀巡江王柱史飲瑯琊之三友亭  
秋空晴日散郊暉乘輿携樽入翠微諸色龍葱呈  
麗景一源活潑露真機激揚休暇詢山野潦倒追  
攀枉繡幃舊蹟新聞無限事徘徊不覺月明歸

七月望日遊瑯琊寺晚過醉翁亭一律

醉翁亭畔勢廻縈路轉瑯琊復此更雲淨丹崖還  
晚霽水流碧澗自秋清登臨曠有冠裳跡歌詠時  
聞騷雅聲多少滁陽游宦者風流六一許誰京

謁二賢祠

幾多滁守姓名傳何事祠堂列兩賢復古文章稱  
絕代邁時風節映遺篇廻岫轉谷棲神處巍棟深  
簷落照邊仰止高山今古一春秋俎豆自年年

龍蟠山寺偕正菴登高

聞道龍蟠幽且清籃輿相伴赴新盟  
明時梵宇增



金碧往代石題識姓名雲樹千峯眼底濶江天萬  
里望中平 聖朝問政常多暇游覽偏宜吏隱情

環鑑亭

吏報放衙官事稀閑來此地啓亭扉八窓總透玲  
瓏趣一水環宣活潑機眼底魚遊兼鶴舞樹頭鳥  
啣逐蟬飛留連不覺移駒影恍入蓬萊坐翠微

超然亭

兀然獨坐超然亭忘却浮華拋却形心遠有時還  
翼翼靜餘無念不惺惺風來沼面波紋綠雨潤簾  
前草色青莫謂官閑通無化理通天地自清寧

仲夏王介石過別墅次早霽後詩招張新田  
柳外忽傳好客來草亭深處共徘徊對床風雨通  
宵話積案樽壘秉燭開詞賦新聲歸勗勃金蘭夙  
契舊陳雷還思子野同高興須遣奚筒次第催

秋冬五日別墅夜中聞水

河橫斗轉夢初回十萬軍聲撼枕來莎裏螿蟻匝  
地響墻頭燈火額天哀虹橋漫滅知何在蝸舍漂  
搖剩幾堆遙憶宣防沉壁處誰能急爲聚蘆灰



七夕

碧雲收盡月華明  
笑問天邊牛女盟  
鳳駕早隨星渚渡  
蛛絲虛向綵樓迎  
柳州巧賦身謀拙  
水部陳詩興寄清  
不見洗車飛淚雨  
秋原野水正縱橫

袁吉菴有約來別墅  
阻水不果又聞宋金齋

自蜀中圓

楚越分襟四載過  
相逢梓里意如何  
玄文獨守風光薄  
絳帳新移雨化多  
野渡橫舟迷禹甸  
閑庭下榻想汪波  
中郎旋節臨邛道  
燈影幢幢起積痾

秋夜

三十八年似夢栖  
一心期不負昌黎濫  
塵青瑣慚無補  
从渴文園覺未迷  
風度柴扉秋浙瀝  
醉便角枕世高低  
醒來獨揭閑窓看  
露冷鷄啼月正西

靜坐

養拙江村晝漏遲  
渚林煙月號良醫  
金鄉今古同幽徑  
董學天人又敞帷  
詩調不求深解處  
琴音最愛解絃時  
機心銷盡渾無事  
獨抱先天問宓姬





國家圖書館, NATIONAL CENTRAL LIBRARY, TAIWAN, R.O.C.

徐陽先生集

徐陽先生集  
卷之二

一六



衛陽先生集卷之十一

甘陵周世選文賢父著

武林後學沈獅

較正

同邑後學沈嘉

孫男承芳編次付梓

記

新遷故城縣記

故城古滌縣膏池地唐貞元間始置今縣名歷宋而元爲縣爲鎮或置或廢嘗隸貝州今爲河間府



屬邑徵諸志舊無城郭惟官署列衛河之濱成化  
二年守府賈公忠奉 詔建城濬池于署北里許  
嗣是吏治因循憚于改作積有歲年 今上紀年  
之四月兵憲水峪曹公科知狀議曰縣有城池以  
資藩翰備不虞有治所以宅官徒聯衆庶城無民  
則邑虛治不遷則民渙興革重務莫是過也上之  
中丞中丞是之迺符縣亟督之理時沱南李公紹  
先始知縣事承劄顧而言曰先信後勞若古有訓  
吾未施于民而遽勞之衆其謂我何旣數月大張  
化瑟羣情效順迺卽城之中度地亢爽布位經營  
廳序屋宇門屏階垣廣狹延袤各有規制櫛櫨楮  
楔塼埴瓦甃墜茨丹堊諸材括舊以需用其所不  
備者斟酌增飾之城池之尺度樓櫓埤堦之規模  
達觀隱廣弗遺弗踈揣工量費計金七百有奇不  
使或糜總境內編氓而籍記之里有定夫夫有定  
日日有定役不使或濫出納有稽分董有官十人  
五十人百人各有伍長互相覺察不使或漁或逸  
李公又自閱朝暮較勤惰以總其凡不使或偏或



狗九月鳩工從事明年二月官廨以次就完城塹  
築鑿甫施工力李公被徵爲御史縣幕詹君相  
迺承專理之檄無何新尹徐川党侯田至協心殫  
慮畫塵定衢秋九月爰告成事內而堂宇宏邃門  
闥洞豁長貳尉屬視事燕憇翼翼委委咸適所宜  
神祠吏舍深靚嚴肅倉庾狴禁與固扁密達達橫  
術市環周廬偉麗博厥井如渙如外而高墉峩峩  
重郭言言女墻宿列鴟尾雲連襟抱峻流背繞沃  
壤歸然盤踞屹成鉅坊士而游息實而館穀旅于  
途商于市熙熙攘攘改觀易望物象風景蔚然其  
頓殊也自此通貿遷則以藏富銷姦究則以弭亂  
鍾竒孕秀地靈人傑澹董輩出龔魯肩立不日畿  
輔之一望三邑以元役也水滸公創謀省成沱南公  
慮事率作興舉曠典勩爲較著若若巡按少泉郝公  
杰省風采議首振綱維巡撫貞菴曹公亨函野温  
公如璋綏猷明法繼單經制穉伯平臯朱公裳宣  
度達情體要明察党尹則恪勵承事克底成績詹  
幕則督辦勤敏無稽無缺是皆有功斯邑民用永



裕沱南瀕行以記石見託既党與詹再爲之請選  
惟天下事或興與廢各以其時而應時興事實惟  
其人人非時曷因時非人曷成吾邑百餘年來縣  
治凡幾議遷置城池凡幾議修築移文頻仍苟且  
承應司監牧之寄者方逆旅視官望望然計資年  
以去顧此彈丸置而弗理際其時遇其人孰意有  
今日乎 聖明御極賢哲奮庸一時分符列采濟  
濟得人以謀以斷侯國封守務崇實政罔具粉飾  
一邑如此推之一路又推之天下舉可知也識者  
將深爲世道幸豈直曰一邑攸繫已哉雖然有善  
作貴有善繼善繼之者明也不善繼之者怠也繼  
之弗能又從而敗之者悖也善繼未幾旋惑異說  
而徒改不常者妄也後之人不足于明怠邪悖邪  
妄邪視此亦可省矣若夫興造之後繼以恬休平  
徭減賦息訟招流黜猾禁俠以息肩吾民填實邑  
井庶人和篤而地利彌固又在當事諸君子加之  
意焉爾謹記

重修儒學記



余邑爲漢儒董子故里是豈董子崛起秦火之後  
精核經術究斯道之大原其所論著直足以衍洙  
泗而開濂洛兩漢儒者無以過之蓋其盛也歷代  
而來斯地學脉寢以微矣我 明御宇二百餘禩  
廣置學宮編于九有士蓋家禮樂而戶詩書郁郁  
彬彬超越前代余鄉邇隸京師涵濡德化且久以  
洽然而士鮮問學天人之際究者寥寥何與豈古  
今人之不相及與抑鼓舞振作之無其人與故庠  
建自國初時圯時葺推宋太守岳獨著比歲則又  
圯矣邑侯楊至旋視憮然亟議修理捐俸爲倡邑  
士大夫及博士弟子員相與協贊工不逾時而訖  
敎者易剝者完缺者增由殿而廡而堂而舍而門  
而坊橋而泮池而奎樓而文昌閣如翬如棘如砥  
如拱煥然改觀于是學博吳君遇輩徵余文爲記  
余惟人才之盛衰視學校之興廢漢初立太學設  
博士詔罷國舉孝廉而增廣學官弟子諸儒經明  
行修者咸得立其間有大政事則賢良文學與公  
卿大夫雜議洋洋乎金口而木舌誠重之矣維時



廣川董子號稱醇儒可以徵漢初養士之效其在  
于今士習何如哉平居誦法孔氏明一經之旨非  
不以儒學自命乃一得志輒弁髦棄之名行之不  
修政事之不達甚至賊民而悞國則經術之謂何  
遠貽先賢之耻而近重有司之憂此余之所以競  
競爲吾黨懼者也夫學宮之荒蕪令爲政學術之  
荒蕪士爲政革故鼎新有感而作見賢思齊邁往  
千古吾黨能無意乎董子有言勉強學問則聞見  
博而知益明勉強行道則德日起而大有功尊其  
所聞則高明矣行其所知則光大矣又言正其誼  
不謀其利明其道不計其功由前之言可以誨學  
由後之言可以定志持此求之聖賢之域可得而  
優入也願與吾黨之士共勗焉由董子至于今千  
有五百餘年而其聲光不可磨滅如是方來英傑  
雍雍濟濟安知不有繼董子其學者而與董子並  
傳于不朽也哉余深望之矣凡興學育才有司美  
政况衰朽之夫得與士髦交勵此學敢不辭而記  
之楊侯名光明東省濮陽人也



重修董子祠碑記

大儒先生以德猷勲業節義文章炳耀今古卓乎無以議者代每難乎其人至於探本真翼聖道繼絕開來崇正黜謬粹然超然不惑異說不溺俗好俾統緒弗淆而後世得有所藉以發明斯其不尤難矣乎粵自姚姒授受精一執中萬世心學肇其源矣嗣是聖哲應運叠出斯道布濩如日中天蓋至思孟氏而降申韓荀列之徒心心喙喙馳騫爭衡而秦火繼之教隳人亡莫可收拾炎漢習成馬

上罔事詩書數百年間道之不絕于天下者如綫惟天牖民文不遽喪篤生董子能自得師于滅學之餘顛志發憤心乎大業足不及困者三年精思極詣淵粹真純燭大道之本原明禮樂教化之治具達天人流通往來相應之至理黜百家崇孔氏尊王道卑霸術發正誼明道之談揭尊聞行知之訓洞識邃養直步趨于距詖放淫羞管晏稱仁義以遠紹乎誠明博約惟精惟一之旨也漢庭諸彬彬文學士無能闖其藩籬而且爲忌者傾擠偃蹇



終身不事家人生業日與諸弟子講學明道宛然  
鄒魯家法柰何後學謗膚不加深攷泥漢史陰陽  
縱閉之說而訾之不知其求雨作用一事亦月令  
出土牛類耳班氏初無貶辭而何後世之嗷嗷也  
竊怪夫韓昌黎氏原道而云軻後無傳未始一語  
及董氏然至于荀揚以不精不詳致疵焉意可識  
矣魏晉以還士議舛駁承譌踵謬者紛紛退之豈  
不窺董生之與蓋亦不敢輕加軒輊以俟後之定  
論云爾不然何于荀揚而無少含蓄也迨有宋諸  
大儒或謂其度越諸子功不在孟子下或謂其本  
領純正最有益于學者然後知孔孟之道不遂漸  
滅濂洛諸君子藉以尋流而窮其原咸于若人乎  
攸賴則夫天生董子於漢也而豈徒哉董子之生  
實漢廣川今入景州版圖所謂廣川鎮者卽其故  
居也吾邑城西北三十里所有村曰董學去鎮僅  
數里相傳爲董子下帷地舊有祠在焉毀于兵燹  
故址茫不可識弘正間居氓得斷碑荒草中字畫  
漫滅不可讀隱隱辨董祠數字以是知名村之義



以董子下帷故無疑也村著姓蘇氏世衣冠舊家禮義望族諱岷者雅德君子也喜其居爲前哲游息之所謀于弟岢輩暨鄉耆儒縉釀金協力復建祠于邨之西歲時祭享以寓高山景行之思歷歲旣久漸就傾圯世廟時崑子貢士澹率族人某撤新之布置結構惟堅惟稱以永前人志事之存迄今廟貌言言過者生敬澹子鄉進士權余同年友且姻契也謂不可無言以紀顛末今年春復率族衆樹石麕牲因謁余文勒之以昭往示遠文未就緒有過者云董儒從祀廟廡載祀鄉賢是祠之建不幾瀆乎而文之也曰不然廟廡之祀 朝廷隆儒之典也鄉賢之祀邑侯尚德之公也是祠也鄉晚後進企慕先達恭敬桑梓之誼也禮有攸當事各協宜且孔孟不祀于海內乎闕里之廟鄒之廟又何爲也此豈不可竊比者耶矧蘇氏祖孫父子汲汲焉惟先賢之祠是圖其嚮往可知世德焯焯膾炙月旦夫固有所師承云是故余不容以不文辭也因綴之以銘曰 道在天下萬古如斯所以



不墜人焉是資人不世出道有絕續前者愔愔後  
將何矚惟世教隆倡之斯易榛塞荒蕪艱哉力闢  
虞夏殷周以君以師云何季世決裂支離執有崇  
玄立言各異漢接嬴秦愈昌愈熾爰有大儒奮起  
于茲力挽頽波障川東之天人三策攄悃彤墀道  
義兩言起痼當時六經表章伊誰之方孫馬卜兒  
走而且仆洙泗流派伊洛宗依承前啟後斯人庶  
幾後賢定論曰漢醇儒宇內欽仰矧茲故區有廟  
峩峩有像堂堂尸而祝之駿奔皇皇駿奔者誰蘇  
氏子姓來奠來獻偕彼同盟獻也葵軌奠也瑤觴  
神之格思霓蓋霞裳高風雅韻灑灑洋洋雲樹蒼  
蒼漳水茫茫

新建二賢祠記

聞山川靈秀之氣毓爲人才所謂人才者非必  
附鳳攀龍都津陟要而高風大節足以師表百世  
令後世稱先賢梓里者因以重其地焉至若褒揚  
往哲興起後人又爲民父母之責也吾邑西北三  
十五里有董學村西南二十五里爲鄭家口鎮鎮



西三里有澹村澹村爲子羽故里蓋舊屬武城地也董學村卽仲舒下帷地也二先生去今垂二千年然傳所稱鄉先生殿可祭于社者孰有加于二先生哉 明典建學育才式重鄉賢之典二先生之祀無論故城在景德冀三州棗強武城二縣皆然二百年來不廢也爲邑侯者循習故事謂二先生饗此足矣無有專設祠宇合二先生而表著之者蓋執節勞省費之議未鏡闡幽示則之要機也

穆廟時山西李侯紹先始書董子故里勒石通衢以光一邑而竟遺澹臺若有所嫉者 今上乙

酉貴州李侯承露甫下車卽按地圖語羣吏曰予生萬里外佩服孔門遺訓竊欲北游鄒魯間冀得高邁端醇之賢如澹董其人而與之游今茲作宰卽未遽臻絃歌以爲君子小人倡舉賢良方正以稱 上指使敢不率爾士民共師二先生于百世下乎時遂慨然爲專祀計屬歲不登急于民而緩于神然惓惓念之不置也丙戌九月歲成侯度民力可用于衛河之陽勸二賢祠設堂三楹肖二先



生像于其中前後各五楹爲歲時奉祀祝人棲息之處閱七月而畢工復豎豐碑道左書澹董故里以爲往來輶舸所瞻竚皆侯捐俸爲之士民樂而助之民不告勞財不告費而二千年來未有之盛舉實自侯始且令百世下之鄉人瞻其像而思齊焉不肖者亦藉以愧而爭自勵侯不特有功于二先生已也後有由捷徑非公事請謁者有發憤向學而未免窺園所事如膠西江都而不匡以正直者過二先生之祠亦可以奮志矣嗟夫澹臺一遇子游遂獲爲聖人徒董子稱述天人受知武帝見嫉公孫竟以病免則上之人由邑宰以至宰天下能蓄心人才者自古難之有子游而後知澹臺有李侯而後專祀澹臺與董子侯其善學子游而羞比曲學阿世者哉予不佞生二先生里中仰止者素矣值祠成李侯馳書滁陽問記予雖不文然誦李侯嘉惠之德勉鄉人景行之思因次第其語俾鐫之貞珉庶祠之下河之濱水浮陸走者咸知二先生能爲故城重而竊慶故城有賢令如李侯者



乃克褒揚往哲興起後人如此云

邑侯顏心葵去思碑記

侯諱思忠別號心葵東萊之濰縣人以進士初授  
內黃令治行卓異余在南都卽聞其賢聲藉甚居  
恒私念吾邑地小民貧兵荒交困之際顧安得此  
良令尹撫字之民其有瘳乎比余以病謝樞務歸  
田里去內黃咫尺耳其治行益詳私心愈嚮往之  
無何公丁外艱去黃之人不啻失慈父母也服闋  
果補吾邑令得如余願公未至而豪胥猾吏聞風

遁者數十人 曰此前在內黃以剛明著者謹避  
之耳及下車剔蠹釐奸綜理備至剛柔並用風采  
凜然諸所張弛皆可比于漢之循吏其興學校闢  
荒蕪懲左道謹錢穀皆以實不以文且也辨事以  
勤率屬以正御下以嚴約已裕民人奉法而無或  
敢于私旣鞅掌王事而將母以孝夫孝先王所  
爲至德要道通于神明者也公實有之故首召其  
雨于大旱蘇將稿之民生終泮河水于旣堅減噸  
貴之米價此二事者尤載人口碑其他種種善政



未易枚舉視向之治內黃者更爲最也殆駕輕就熟造父之御與余之所見溢于所聞矣政成部使者交章薦之 當宁報以恩綸封兩尊人公益不怠譽命益以上聞至是被召權主樞院實則以臺諫需之也公行矣邑民之遮道泣留者又不啻內黃也知寇公終不可借鄉民石德成陳興等相率詣余問言勒之貞珉以存其棠之感余謂通才如公真社稷之器他日宏勲榮名當有太史氏書之無庸此者衆固以爲請誼不得拒且以公之治行亦當有所論列以爲後人楷也遂書而付之

新建玉皇廟記

夫司化機者于烝人之情將挽其習之器而啓以嗜爲善也以理喻之不若懼以罪福之報爲足以惕其心以法驅之不若威以神明之鑒爲足以勵其行蓋古聖人神道設教妙用寓乎其間也今示于人曰福善降祥有不爽之神有難諶之天在焉要使人鑒于天而趨于善如是焉爾已輓近世禱祠繁興不知尊天而或以淫祀徼福其流至于信



妖邪而忘理道尊巫覡而詭賢聖風之不淳習之愈下又何惑哉吾邑界在燕趙之間古淳風具在乃成弘而後漸入于漓而理所未易喻法所未易驅則神明罪福之理未有以惕其心而勵其行也于是御史大夫東田馬公之子太學生師言捐地建玄武祠于城西南歲時禱賽俾鄉民儼神明之臨生罪福之恐而冀以復淳古之舊事在世廟初問鄉沙溪孫公記之詳矣厥後太學從侄省相又謂神明之至者莫踰于天而以罪以福天實司之也欲趨于善宜鑒于天而人所尊天之號則曰玉皇上帝復于城東南獨力創玉皇上帝廟規制甫就而省相不祿矣其從子太學生思材身承相業乃纘先志竟其緒殿廊門廡悉恢大以製丹堊金壁悉焜耀以飾而廟貌尊嚴宛然帝君金闕焉客歲余自省垣遷官南都過里門適當其成思材徵言于余余聞上帝位鈞天之上宅雲房之中其無取塵世之居也甚明而以園丘祀天自備有天子之禮尤非凡庶可得而干也然而詩則有云昊



天曰明及爾出王昊天曰旦及爾游衍是天無一日不與人俱而惡人齋戒可以事帝是致誠昭事亦人人可自竭者由是廟而貌之不獨居高羣而祠之不獨王制固義之未爲悖而建立所不容已也世之指天而誓凜凜猶不敢易辭今也儼然而望咫尺天之顏肅然而謁奉將天之威矣而猶或肆心于不善殆弗然哉上帝臨汝勿貳爾心乃馬氏叔侄立廟之志與古聖人設教之意合使吾邑之人與其叔侄之意合則淳風再觀亦何難也而一邑皆善士由馬氏善之矣余因爲記而併繫之以歌焉 擊鼓其鏗于殿之陽帝之來思縹緲雲房肅肅龍馭羣戒其傍湛茲清醑于以灌將居歆所祈降福穰穰今此下民無乃太康 右迎神 帝之降矣滋我天休帝之歸矣不可淹留九閭旣返六幕焉求雲旂杳杳霞路悠悠居歆可再歲事維修再拜而辭去矣鸞輶 右送神

新建玉真觀碑記

邑西南隅有觀曰玉真所祀玉皇上帝天帝者天



之宰而維皇降衷又天之命也上天之載無聲無臭且得有像貌乎哉迺世且皇之帝之又從而貌之者何噫以冲寞無朕者尸而祝焉則近于誕以空洞無宇者祠而居焉則近于贅以園丘大典天子燔柴者氓庶得而上祀焉則近于僭誕耶贅耶僭耶長此安窮解者曰凡事之作必有所由起夫人居常無事視天蒼蒼已耳茫茫已耳譬之泳者忘川栖者忘枝植者忘栽培動者忘徐于似漠然一無所關者及蓄來室隣蹉跎陽九無不籲泣呼號曰天實爲之又曰胡天不吊洋洋赫赫如其上如在其左右此祠祀之所由興也傳稱宮室不設不可以祭者薦其義也春祠夏禘秋嘗冬蒸皆因時制宜耳藉令無宮室則神之威靈將安所憑而依乎恐非所以聚精神而修明禋也矧尊莫尊于天順天則吉逆天則凶是故刑驅勢禁者束其形嚮福休禍者竦其衷形之束也明畏于法度而衷之竦也默奪于神明神明至天無對矣天肖之以上帝至赫矣閭左惡少輩終日嘻笑睥睨無所



顧忌逞逞過其下咸歛衽稽顙躡躡耳語曰此某尊神此某謁則報叩則靈而恣睢不肖之心或陰以折則禍福惕之也則廟貌爲之也潛移默化之機視王法所載止者功孰捷也是可重斥乎余應曰唯唯否否上古民淳俗愿禱祠不與邇來世風日偷左道煽惑鄉之愚夫愚婦營營逐逐驚于福田利益之場分門立戶守師說不變此何異途之草菅取道一夫相與拍肩而隨之稱平坦則高足濶步稱硤确稱坎壈則皆蹶躑躅次且不進而雖有步趨終不自施乎俗流至此亦可悲矣昔季路問事鬼神夫子返之以事人余亦以世之人第卽所爲日用人倫者領略一二躬行實踐則不作于人亦無媿于天而冥冥之中必有爲之陰騭者何必浸淫聚徒焚香羅拜奉所爲至尊無對者日事媚竈媚與之禱爲雖然王道本乎人情聖人治世不易其俗而教之如前所解果亦有激勸于民又何妨乎從俗因人情而利道之哉邑庠宋生吉祝克家好善嘗延羽流誦黃庭經十年與百金不受因



發虔誠構茲觀以爲焚修之所噫嘻亦盛事也觀成有年歲修祀事唯謹余按玉皇今道家常稱說又鼻祖黃帝以張大之黃帝龍髯世不盡以爲妄而河上漆園諸人似亦吹噓是者士紳取其虛淨恬智之說以竊附于吾儒存心養性之旨余不敢同軟牛耳要以廟貌森嚴顯蒙有所警惕而不敢爲惡故不深拒而爲之記云



國家圖書館, NATIONAL CENTRAL LIBRARY, TAIWAN, R.O.C.



衛陽先生集卷之十一

其陵周世選文賢父著

武林後學沈獅

較正

同邑後學沈嘉

孫男承芳編次付梓

祭文

祭中嶽神禱雨文

維神正直聰明靈通虛應鎮 中天而奠位橐籥

羣生首五嶽以稱尊綱維元化凡我幽隱罔弗鑒



臨茲者天禍中州歲罹暵野無青草誰憐懸磬  
之憂田起黃埃莫救枵呼之急當三農之甫作乃  
一滴之未霑誠十室而九空蓋一日而三嘆夫神  
爲民之主豈神有意于災民顧善乃祥之基或人  
不善以致譴某等欽奉 主命節鎮是邦素履多  
讐奉職無狀或撫綏失道致 皇澤屯而未施或  
軫念無方致民隱鬱而未達公私義利之介持之  
或淆賢否邪正之途辨之或爽訟獄舛則肺石鮮  
不寃之民刑罰苛則棘林多夜哭之鬼歷省前愆  
寔余不淑凡有殃咎宜加余身蠢茲小氓於彼何  
與伏望 大溥其霖弘敷汪濊舉涸轍而胥潤挽  
枯藁以回春油然行沛然施竚看商羊之舞佃之  
甲俾之拆行書大有之年仰荷 神庥敢忘祗報  
謹叩靈府神其格思尚 饗

祭大學士高公文

惟公嵩高挺秀河洛孕英胸羅武庫識貫元精雙  
經白虎論道承明歷事三朝致身自盟才猷燁燁  
莫與爲京剖決電迅議論風生獨持國是總攬權



衡順內外攘相業崢嶸旣歸田野堅守幽貞行誼  
昭昭著在鄉評誠一代之元老爲士紳之章程宜  
享百年胡爲其傾選也庸流下品曲荷陶成愧我  
愚戇碌碌硜硜不體至訓奮袂長行隱顯參商頓  
隔幽明夢寐周旋搖搖心旌茲撫兩河咫尺佳城  
感今追昔意緒縈縈遙奠清醑聊表衷情神如不  
昧鑒此微誠尚 饗

祭南少司空方新渠文

惟公中州間氣盛代人豪掉鞅文囿却顧無曹間  
出其餘試角時髦千夫辟易或墜而號 彤墀大

對萬言滔滔宰臣驚嗟故抑其驕禁林之選中者  
寥寥公實應格顧拂其曹雄雄廣陵邑衝人囂公  
往宰之劓發庖刀入參選部水鑑秋毫冢宰拱成  
百職靡微擢貳奉常周典虞韶惟寅惟諧宜廟宜  
郊兼賓遠人掌彼餼牢侏離爭獰輯若馴獮鵠行  
正遙鷗夢旋撩乞身五載詩酒遊遨東山跡遠  
北闕名高薦剡驟騰 天書是招樂彼 南都乞  
寄閒僚遂職象胥以序金貂繼遷銀臺喉舌是操



出納百司讒譌敢淆清卿再陟用前之勞赤車行  
陵 原廟於昭廷尉於法一傾卽搖公執其平  
以允見褒晉佐司空臚視民膏削浮損華繩彼木  
妖吁嗟公才杞梓璫瑤左右具宜翊我 聖朝  
宸眷方殷大拜非遙一朝解去自混漁樵疇咨未  
罄經綸遽韜人願公何蒲輪以邀孰期弗待鵬識  
無迹傷哉哲人殄瘁中霄某忝列朝簪所向神交  
矯首南望夙仰高標茲叨秉鉞來采風謠典刑則  
存伊人已遼宋臺寂寞徐墓蕭條擬騷難似挂劍  
無繇聊陳鄙悃敬奠杯醪何以薦之溪沼之毛宛  
山崇崇宛水迢迢公神曷之其在璇霄吁嗟達人  
身馬輪尻生者之淚何時可消尚 饗

祭少司寇楓潭萬公文

嗚呼惟公產忠孝鄉當 聖明世稟岐嶷資負經  
綸志文以六經先民歐曾鑽研殘篇是似是程五  
老白鹿晦翁遺躅藏焉修焉以頌以讀待詔金馬  
含香粉署年所之歷秋卿之貳 天子好生威則  
雷霆欽哉欽哉克允以明帝心簡在股肱是倚公



日休哉流行坎止遵海浮江尋幽問壑孺子古亭  
滕王高閣祿則未盡獄則有功定國于公後當有  
封獲友公子公子孔儀大夫羔羊退食委蛇會見  
公孫公孫孔碩頭角崢嶸鵬途奮翮燕子貽孫且  
貴且賢樂志怡顏以百斯年明庶之風豫章之木  
欲靜不休上聞于國當寧嗟咨惟念舊德俾光  
于穉寔逾于格小子聞訃山川阻修若翁吾翁我  
懷悠悠何以將之炙鷄酒絮臨風望奠有涕如雨  
尚嚮

祭少松滕公文

嗚呼惟黃華白鶴之建標而西璜交玉之毓精凡  
山川孰邁此東甌者而寧不篤孕于偉人則公之  
亢滕宗而驟闕彩者已信大丈夫之有真勳冠登  
壇黃年出宰蓋已霈西堂之雨而耀南海之雲奏  
最而典邦庶禮題國羣才固當其格于神而宜  
于民何搖搖雙憶出按滇盤者又快睹其風生馬  
而月在亭及譚經授簡于於越也人共羨門前之  
桃李與籠裏之參苓忽攬纒澄清以往來于吳會



粵圻之間者尤耀東南數千里之福星及乘麾而  
翺翔于江介何翕翕然鯨歛波而狼避塵則一時  
望龍門而窺虎帳者疇非願一御李而再識荆乃  
余方備畱垣之喉舌則因以締十餘年之友昆蓋  
惟馨脂之相遇而貧羗之協律故不覺其心結而  
眉伸胡風雲之合以頃刻散以恍惚則余方北渡  
于南滁而公已東撫乎錢臨然羨公之神王容粹  
企足埃者其登天府而乘人衡及余之膺 簡命  
而撫中原也則雖不能景芳躡彩而越千里如面

譚者方幸其羽未鍛而鱗未沉何彼蒼之不憇遺  
而羣黎之不徼澤竟未繇起黃霸而借寇恂豈造  
物真小兒無能祥于善而壽于仁抑孰榮弗瘁孰  
晝弗夜厭濁世之糠粃故騎箕尾而游化城嗚呼  
哀哉瞻二室之蒼翠慨天台與鴈宕之氤氳長河  
之澎湃悲胥江共巖瀨之湫淫則余之痛結于石  
泪湧于泉者固悲良朋之失彼著蔡而尤痛清朝  
之殲此鳳麟悵未能馳素車躍白馬爲公執紼而  
引衾聊載東棹于寸素甲尺牘之片言惟南向九



頓以與公之回馭而垂紳知公之不駐者形不昧者心尚其轍然而饗余之生平

### 祭少河沈公文

惟靈秀鍾緯曜勛閎象賢夙振天衢鳳舉蟬聯束髮爲郎著聲宗伯台衡是盱龍光華國作信作符維鎮維寶迺歷清卿是執是考惟簡用遷佐茲罔政爲塞爲淵駮牝是頌乃晉銀臺納言左右以達以宣芳烈日赫再擢奉常職司典禮寅直相休寔公是倚惟茲廷尉 帝曰克艱僉曰宜公天下無

寃旣平旣反治隆幾措曰允曰明皇眷攸固胡動尊思翻然省告朝野望殷詎容高蹈泉石怡情擬公泮渙胡天不吊遽隕良翰耶嗟嗟傷哉粹白之操旣豐令德出燹伊邇方著鴻業云胡不慙獨年之嗇耶選也昔幸於公騎尾叨聯敷歷中外幾三十年如公宏抱卒未大伸意者有待以貽后昆耶時予承乏有事兩河山川修阻執紼奈何聊遣一役往陳明薦不應是將公其不予鑒耶

### 祭孫僉憲文



嗚呼顥穹誕靈淮汝毓精冲和朴茂琳琅素瑛抑  
損若虛皜然粹白風雅忠貞恪哉諮諮探願採華  
斧藻允麗鉅儒宗工學爾魁世載尹上谷子易色  
愷安堵不驚號稱良宰曰至晉寧維民之隍恃兮  
怙兮愛及其棠 天子曰都爾成獨最俾監金臺  
境無弛吏爰巡東吳載鋤距豪行往驄馬山岳震  
搖齊俗黠悍絳赭匪寧攝威憚法重鎮博平嗟彼  
鼓角雄聲四齋神竒甫試訃音輒馳渺查悠悠乃  
瘁先儔靈瑩碧寶造化先收幸貽雛鳳飽然若玘  
翮翔待賈號稱不死維某與靈恩聯道一備乏中  
土厥情更戚靈輻踰梁且怖且傷憂心悄悄注淚  
盈眶有酒在瓶有饋在登餽饘辭聊寫我衷尚  
饗

祭柳沙葉公文

惟靈清和萃體濬發名賢材逾東箭質映南楸醞  
籍淵冲光儀蔚宣祥披玉斗雋顥文筌丰姿鶴立  
節槩羊懸 授簡佐羈明允聲延煌煌青瑣馥馥  
芸箋獻替允臧啟沃罔愆忠益 九重輝徹八埏



寄重河洛譽流澗瀝清風穆穆惠澤翩翩洵美且  
都日靜郊烟乃隆 眷注貳憲蜀川彼方引領此  
乃車牽柰何飛鳧未翔皓月空懸嗚呼箕疇未艾  
祿秩方遷幽幽旅魂遥遥山川天地爲愁草木悽  
焉某夙邁寅雅誼契情聯傾蓋相遭如調素絃及  
予撫豫公守三川匡我不逮翼我其旋方圖遠餞  
忽驚訃聞休戚相通我心惻然臨風展祭有淚如  
泉尚 饗

祭侍御朱文川文

維公伊洛親傳嵩河正氣經濟之抱澄清之志粉  
署翱翔繡衣直指臺端樹標貴陽攬轡還使八閩  
縉紳傾企時不相能稱病而去獨樂盤桓東山載  
起有 詔委公留都重地事竣歸 朝大拜伊邇  
胡天弗憖易貴而斃邦國咨嗟我涕如雨思昔與  
公盍簪京邸若水之交如蘭之契觸奸指佞協恭  
共濟今其逝矣善類疇倚孰與退瑕孰與進遽悠  
悠此心天日可著適我來斯值公梓里白馬素車  
炙鷄酒祭公靈如在庶我鑒只尚 饗



祭董母陳老夫人文

嗟扶輿之森礪兮鳩此淑嫿儵玄馭而遐舉兮邙  
樹之刑欽內則之懿鑠兮慕義無窮肅敝詞于總  
幄兮撫抔生平繫名閥之孕秀兮葆純粹而端烈  
秉嫿節而提躬兮凜寒潭之澄潔肩四德以于歸  
兮娃麗璋而輝澤協內外其咸宜兮績鉅細而靡  
忒誕麟嗣之卓犖兮闕岐嶷以亢宗繩斷機之芳  
軌兮儼畫荻而和熊競寸陰于昕修兮催午夜以  
藜光顯百氏之精英兮奏遑代之錡鏜躍萬玉之  
清班兮試叔問之烺烺擁繡斧而巡行兮肅三尺  
其風霜揚旌鉞於西秦兮屹邊塞之保障嚴北閉  
之鎖鑰兮爰冬卿以特進盼出鉉以攸托兮駿勛  
華而不振念報劉之日短兮謝鞅掌而溫清舞萊  
袖而稱觥兮苾菽水于鼎祠洵巨行之兩躋兮唯  
從王與將母也唯母氏之有子兮廼忠與孝之咸  
備也心旣泰兮體其豫度杖履兮數將逾忽導旌  
兮西崑爲駕風蕭蕭兮慘長夜蒿室帶烟迷秀色  
兮灑澗和月而東瀉采菑萋兮悲洛社哀杜鵑兮



痕成血某叨撫中原今夙歆豔其壺范望連蜷而  
佗祭兮寄悲傷于黯澹東生芻而醮薦兮碩瞻母  
氏之聖善噫嘻母有子孫兮業示不朽施令聞于  
千萬禩兮疇近而疇久尚 饗

祭潘老夫人文

維坤維之毓秀斯婺宿之握竒儼名門以覩妹簡  
世胃而結禱矧挺朗照于齟亂更成懿粹于蕤筭  
相夫子以爲邦彥里推姆訓而壺式女儀則司寇  
之貞石畫而贊巖猷咸曰惟內助其是資植蘭玉

于階扈今已森森而嶷嶷蓋芝有根而醴有源故  
祥長發而瑞永垂噫酬貞協吉天有顯道疇不卜  
其踰羣而倍耆乃姑射摧峯昭潭歛灑忽反精炁  
于上真且玩造化爲小兒嗚呼哀哉母厭濁世而  
如蛻人攀仙馭其莫追夫子方勵勦王事內顧則  
悲形昂景卽君亦拮据民社仰憶復引匣含珠則  
凡屬交游之末者疇不心折而渙願矧余辱聯案  
之雅更何能不九頓而陳詞牲在俎簋在豆而酒  
在卮望東南遙遙以招芟忽天日雲飛黯黯掩二



室之暝色而雪川泉響咽咽應長河之朝漸則靈  
之不昧而來格者誠越千里而歆之

祭黃太母王氏文

於鑠阿母寔鍾納言竒勛酬 主邁五登三起家  
花縣績茂 欽宣天曹數載冰鑑高懸行儉之知  
山濤之庶凜凜丰采表率百官英飛 天旨錄表  
洪猷銀臺經濟 皇鑒揆畱奉使 蜀府 天潢  
典誦遡厥基曜祝母春秋 鸞章怡愉闔閣優遊  
綿延七袞迺吉紹麻納言旋梓志養孔修萱幃茂

祉烟靄雲低旣閱象賢麟趾美躋諸孫鬱起氣凌  
虹霓身享子貴食報金泥凝禧永日歛爾猿啼寒  
城月落平楚霜悽珠沉北海婺宿雲迷大化旣促  
玄壤嘘唏某仰承 帝命叨撫仙鄉憶昔納言共  
我翱翔雷陳莫逆幾十餘霜幸附世講淑範相望  
寒燠忽盼母斷黃梁蜃樓氣結鵬鳥聲墮吊阻臨  
木平野蒼茫執紼無計薦乏刲羊勤使附誄用旌  
寸腸尚 饗

祭楊夫人李氏文



惟靈天畀其粹化篤其資柔嘉維則坤順咸宜桃  
夭式化淑資徽儀晨鷄燈火相夫名馳秋桂芬芳  
鯤化鵬飛出領花封黎庶雍熙明燭覆盆畏巖四  
知羔羨五純麥秀兩岐螽斯振振玉樹瓊芝九熊  
午夜慈訓諄孳學富辭瞻修翮待時蜚聲藝圃青  
紫可期夫貴子賢人日完禧胡遽一疾竟返瑤池  
德配不長石火難追造物善忌奪世女師月沉婺  
掩冥漠誰尸嗇此豐彼乘除罔移 鸞誥赫褒光  
賁幽遠庶慰萬一待之須斯某素景令聞亟慘靈  
輻執紼未能河山逶迤芳精在俎椒液盈卮何以  
寫哀表之素旗尚 饗

祭梁太夫人文

嗚呼維靈五陵佳氣大行麗景沁澤長源乃生良  
媛葆儀世閥釐范高門溫恭淑慎女德克赫婦節  
彌敦相厥夫子修而冠翟懋而索鞶維彼孺人簡  
其機杼薦其蘋蘩育維令子蔭茲蘭玉振茲鸞鵠  
花封佳躅青瑣芳聲母氏孤騫八閩良翰三湘令  
節母氏竒緣秦關簡牧燕臺推異母氏覃恩太微



律陽先生集  
三  
執法勾陳馭紀慶在金萱板輿日御綵衣時舞萊  
牖潘園正宜遐壽永綏 天寵維百斯年云胡二  
監呼虬引鶴遙駕雲軒於乎哀哉婦誰無夫夫也  
榮施順而益尊母誰無子子也賢貴愛而且傳虞  
淵薄日咸池墜露蒼野霏烟神人異境生歿殊感  
能不涓潛萃編在天蒿砧在地寶佛駿奔奄然者  
息驟然者笑母復誰言敢虔奠餞生芻一束清醑  
盈罇臨風九頓瞻雲丹越敬御玄魂精爽是格  
馨孔爾彷彿其存尚 饗

### 祭新宅落成文

美輪美奐堂構詒百年之圖曰經曰營修葺按五  
行之位繼茲舊址爰構新居棟宇軒昂氣象騰翥  
於東壁門楣偉麗禎祥霽應於中庭咸藉 神庥  
亦旣寧止第彌歲之工匠雜沓動輒喧囂而累月  
之土木煩興不無觸忌茲屬告成之際虔伸報謝  
之忱伏願 神力顯持 玄功默佑彌綏遐祉永  
奠洪基將詵詵螽斯衍一脉箕裘之業而振振麟  
趾裕百代昌熾之禧尚 饗





續陽先生集

一



衛陽先生集卷之十二

其陵周世選文賢父著

武林後學沈獅

較正

同邑後學沈嘉

孫男承芳編次付梓

行狀

誥贈資政大夫叅贊機務南京兵部尚書先

祖考義軒府君行狀

先祖諱珍字寶之義軒其別號也先太平府當塗



縣化洽鄉人世爲宦族永樂中有諱思誠者以事  
迎坐徙發河間之故城爲編氓因占籍勸農屯至  
今家焉思誠生福好善樂施尤耽內典居常坐臥  
一樓日夕禮佛誦經非親友大慶吊足未嘗履市  
廛也鄉里目爲善士生子源字德淵號懷石習博  
士業補邑庠廩膳生累試不偶遂從事長蘆運司  
滿考上銓曹授冠服守支太倉京都人延爲塾師  
多所成就雖未及出仕而拓基業振門宗實自懷  
石始有丈夫子三曰積曰稼曰穡稼卽先曾祖也

配先曾祖母胡氏生先祖纔四歲而先曾祖卽謝  
世母子伶仃往倚懷石公于京邸懷石公痛于天  
逝加意撫育其孫稍長教之就學卽機警絕人不  
類凡子歷十餘稔歸南受室而懷石公溢焉捐館  
煢煢苦塊哀毀逾禮旣襄事伯叔各欲異爨先祖  
不能強涕泣從之隻身應門諸務倥傯緣是迄棄  
去舉子業里中桀驁者弱其孤穉欲乘間侮之然  
竊覘其頽貌豐姿志氣軒舉又相戒勿犯先祖亦  
置不與校久之信義愈孚遐邇倚以爲重則益自



振勵凡持身治家罔敢一毫不執于道而魁岍豪邁尤耻爲尾瓊澳澗之行動輒稱引古人以郭元振范希文爲師法宗姍里黨有貧無以立婚無以舉喪無以葬積讎結怨罔克自解者輒倒囊助其不足而延款以調釋其不平往往若拯救焚溺惟恐不及無少厭倦里社神祠棟宇之修飭春秋之祈報以至道路橋梁之構結每先事以發其端而人亦無不欣然贊其成蓋其真誠遇物惻儻率人故人樂披衷露腹以相任也從弟全以邑掾被誣構獄家貲蕩然先祖領身營救至鬻產以從或有尼之者則正色拒曰凡我子姓皆祖宗一體而分者吾何吝無益之財而忍視一體之淪陷乎表兄胡允清僑居他邑舉家患疫垂斃來歸先祖處以耳室凡饋粥藥餌時出所有以佐其需久之家人有染其症者亦略無悔意士氏妹早沒遺一子惇然孤立則收養爲己子命名良臣令先考及先叔輩以親兄弟遇之旣長爲娶妻授業致得免于流落平居勤儉節約不欲一毫妄費而義氣激發雖



千金可斥鋤強扶弱卽刀鋸在前無所畏避故當日里中有癡老之號以其任性抗戇無文飾也性喜延客每遇知己過從笑謔移日復傾倒樽壘以盡其歡而町畦芥蒂未嘗少橫于胸臆然善善惡惡其介又最嚴遇可敬卽褫天豎子不難折節自下不然卽搢紳豪右無少貶以徇鄰黨有競田構訟者先祖立以一言判其曲直其人愧悔至竟棄田弗取里中無賴子有不務本業而謀盜竊者先祖開諭曉譬其人感悟遂終身改業說者謂有王

彥方陳太丘之遺風云事母胡山盡孝敬嘗云丁蘭刻木爲母吾有母而奉養未至尚可稱人天壤間哉滫髓其旨竭力以辨時或赴宴姻友家卽大醉後必懷異品竒果以進而晨昏定省歷祁寒盛暑無惰容年六十人以老萊子比之課諸孫讀書幼者口授句讀時復爲講解大義常舉溫公積書積金不如積陰德之訓以自見意又舉學究中牕前勤苦馬上錦衣等語以勗其勤渠之志其孜孜啓佑卽義方之訓奚啻焉于時縣庭長貳暨學宮




師友咸高其行誼欲延爲鄉飲耆賓辭疾不赴晚年頗耽于麴蘖每飲輒大嚼酣歌若狂狎態而其衷固炯炯其言亦未嘗不秩秩然出于道義也嘉靖辛亥不肖備員黌序先祖喜謂先考北原府君曰吾家自先世以來積德累行未有奮跡賢科者吾祖懷石公有志而未竟成其志者其在此子乎又謂不肖異日而得志者當爲國盡忠豎勲揚名毋徒竊升斗以自潤也越明年先考忽棄代先祖拊膺大慟曰天乎何奪我良器之速也居常忽忽不樂因復縱酒踰年竟以是罹疾蹇臥床竇者累月不肖問醫理藥日周旋其間惟拳拳以守禮法振家聲篤宗睦隣爲囑又歛歔謂不肖曰吾父葬時吾方在提抱中諸凡草具生平深以爲大恨幸吾母猶無恙不意吾身又先朝露也日後之事惟小子如禮圖之越數日病益增劇藥罔奏功於正寢終焉嗚呼痛哉旣歿之五載爲嘉靖戊午不肖領順天鄉薦至壬戌成進士由常州推擢入諫垣妄意可少遂顯揚之念以慰先祖于地下旣而忤



權見放幾二十稔復值 聖明賜環原職游歷卿  
貳暨今官始獲贈先祖爲通議大夫工部左侍郎  
加贈資政大夫叅贊機務南京兵部尚書 制詞  
褒美有含醇抱樸睦族敦倫信義禔躬詩書啓訓  
之語蓋亦實錄也 嗚呼 龍章鳳誥光彩陸離

而九原已不可作矣痛曷極哉痛曷極哉生弘治  
壬子八月二十五日卒嘉靖癸丑七月十五日得  
壽六十有二配劉氏邑處士劉傑女貞靜多智慧  
尤善持家相夫則必敬必戒逮下則克仁克寬至  
今子姓說說皆吾祖母一人之所貽乃天胡不假  
之以年僅三十歲而妖邪悲哉悲哉以不肖叨冒  
蒙 恩累贈夫人云繼配王氏邑人王某女再繼  
配胡氏邑人胡杲女二母皆秉淑德先後佐先祖  
拮据家政無一不當其心蓋並稱嘉儷焉子男三  
長卽先府君良佐贈禮科給事中累贈南京兵部  
尚書娶先妣李氏贈孺人累贈夫人繼娶夏氏次  
良佑娶張氏次良弼娶羅氏女二一適王第一適  
何得雲俱劉淑人出孫男八人世通鴻臚署丞娶



王氏不肖世選任南京兵部尚書娶黃氏封孺人  
累贈夫人世達義官娶張氏世安娶耿氏世道寇  
帶贊畫娶胡氏繼娶胡氏世寧寇帶贊畫娶栗氏  
世進廩生娶王氏世懋王府引禮生娶朱氏孫女  
二人一適高應祥一適劉應元曾孫男十二人  
廩生娶任氏繼娶王氏再繼娶王氏杲太學生娶  
李氏繼娶高氏鶴選貢生娶陳氏繼娶黃氏再繼  
娶孫氏棐太學生娶郭氏繼娶翟氏鶴庠生娶郭  
氏繼娶紀氏鶴王府引禮生娶崔氏冕太學生娶  
蘇氏繼娶趙氏昂庠生娶孫氏喬庠生娶任氏繼  
娶趙氏景娶楊氏罔庠生娶張氏景娶王氏曾孫  
女十一人一適太學生王化光一適劉延慶一適  
孫  一適太學生孟同芳一適王家柱一適庠生  
鄭養直一適趙夢鯨一適庠生趙時臨一適庠生  
楊巨鯨餘尚幼玄孫男六承祖娶李氏承陰娶盧  
氏餘尚幼玄孫女十俱幼六世玄孫男一幼嗟嗟  
物本乎天人本乎祖凡不肖幸有今日固賴先考  
顧復之恩而先祖慤殷教育之心亦勞且瘁矣每



憶昔歸窆不肖實重承之而百凡未備期有待焉  
厥後祔塋吾胡祖母雖及刻石誌于幽堂而炳烺  
行誼尚未表章此不肖之日夜疚心者也用是追  
述其生平梗略如此敢祈 名筆爲碑銘于墓道  
庶先祖之行有所托于不朽而子子孫孫亦受  
仁人君子之賜爲無涯矣撫拾無文固不敢一字  
增諛也惟採擇焉幸甚

誥贈資政大夫叅贊機務南京兵部尚書先

考北原府君行狀

先公諱良佐字上卿別號北原先世太平府當塗  
縣采石鎮人世爲宦族有諱思誠者永樂初以事  
連坐遷發河間府之故城爲編氓今爲故城勸農  
屯人思誠生福先公高祖也茹素樂施予持釋迦  
戒行州里稱爲善人生子源字德淵號懷石以廩  
生充運司從事滿考上銓部冠帶守支太倉京都  
人延爲塾師多所成就拓基業振門宗遂爲故城  
望族生子積稼穡生先大父珍字寶之人稱爲  
義軒居士魁岸豪邁不爲尾瑣澗澗之行義氣激



發揮斥千金不顧急人阽危卽刀鋸在前無所畏  
縮態人又稱爲癡老云以不肖承乏工部獲贈通  
議大夫工部右侍郎歲丙申不肖滿考畱樞加贈  
資政大夫叅贊機務南京兵部尚書配劉氏累贈  
夫人實生先公幼有異質甫齠齔日記數百言稍  
長遊鄉先達盤村夏公本春何公之門績學織文  
每見稱許聲譽燁燁儕輩中顧就試憲臺偶疾不  
利而母劉忽告逝義軒公隻身應門於外先公撫  
諸幼弟若妹哀毀骨立且家務倥傯時尚未娶日  
課諸家僮佃僕力作躬較其穀帛出入緣是遂廢  
舉子業性至孝義軒公廓略不屑細務又好客先  
公服勤左右每先意承志事事區畫整辦無一不  
得其懽心事繼母王孝勤備至無異於生已者初  
若少恩卒爲善母同母弟良佑良弼暨二妹氏方  
失恃時俱在冲齡先公每旦起爲着衣鞵視洗櫛  
畢含淚視炊最幼者手匕爲哺暮復視衾枕或哭  
同族諸母暨界直村媪以祈職縫紉事如此者數  
年迨今吾叔若姑話及猶絮泣也後王卒遺一子



良材再繼母胡氏良材幼弗克承志先公曲爲調護俾之蚤有室家以獲其所族有間言者先公呼曰子騫罔吾所師也毋多言年二十四不肖選始生有異兆甫能言先公試教之童蒙書頗應聲了先公喜撫之頂曰成吾志者其在此兒乎迨垂髫命出就外傳每暮歸必驗其所講貫與所屬文義或親爲指正解說師有未善不憚屢更曰擇師教子固宜爾爾不肖旣長又命之慎擇交遊嘗指曰故兗州太守宋金齋公諾謂不肖曰此貴人可法者小子宜切磋焉凡不肖幸成微名固資藉師友不乏而先公孜孜庭訓之力苦矣今從兄鴻臚署丞世通方在童時先公命與不肖同業自寢處服飾及几硯筆札無或異者每出入人不知其爲伯叔昆弟也族屬叔行若全輩弟行若良金輩姪行若世達輩待之恩禮有加闔宗徭役賦租先公往往獨爲賠贖不償亦置之不問蓋先公心地慈惠於人無所不厚而尤篤於藝秩且爛慧英爽有卓識恒出人意表而胸無他腸事多義舉信誼孚



人每爲人所倚任妹婿何得雲以族人爭產陷至  
大辟先公傾身倒索極力營解以脫其旣表弟王  
良臣稱孤無依幾至流落德懸義軒翁收入同居  
若親兄弟者二十年戚屬貧不能存若胡杰輩婚  
不能舉若李厚輩喪不能葬若胡允清輩每事燭  
給以濟其成閭里有關訟不解向先公訟其不平  
延之款飲和釋仍剖判曲直以服其心人皆感媿  
鄰有侵我地者佃僕持之急先公徐曰損我幾何  
而傷睦鄰大義其人聞之赧然荆謝後先公歿且  
數年鄰人劉俯見里中爭田構訟者對不肖歎曰  
尊大人若在安有此等事乎初先公娶先母李淑  
人有舉案齊眉之風不肖年十三有二妹先母背  
棄先公感昔撫今痛悼特甚繼吾母者夏孺人先  
公溫言曲諭時復戚然惟恐其有他故不肖罔知  
有無母之苦先公勞且瘁矣又家難頻仍食指且  
數百羣情多渙各求異突家廬遂至不振先公命  
良臣挾貲廢鬻以佐所需然非其志也嘉靖辛亥  
不肖補博士弟子員先公頗有懌志越明年疫家



人無免者先公檢方書備藥餌周旋療醫罔有避  
忌亦至不免無何愈家人俱愈獨良材公捐館先  
公撫之大痛曰舉家無恙而此弟獨斃且無後何  
以慰上氏母於地下哭數日不息而前疾復作遂  
至不起未屬纊前向義軒翁孺泣曰兒不能終養  
吾父然有孫在可無慮也呼不肯選前曰汝竭力  
事汝祖以成吾孝堅志問學務斬樹立異時儻得  
志爲國志臣語云寧爲壁碎無爲瓦全小子其念  
之哉又指七歲子世懋與猶子今廩生世進曰是

二子同庚俱有奇造可令學毋廢言訖而終嗚呼  
言猶在耳不肯選涼德寡植何以慰先志于萬一  
嗚呼痛哉先公生正德四年九月二十五日卒嘉  
靖三十一年六月十九日得壽僅四十有四先是  
蓀郡人張海僑寓邨庄受先公恩者二十餘禩家  
頗能贍携妻子還故里去相隔百里數年不相聞  
先公旣沒海病且死氣不絕者三日甦而大言曰  
周大公爲冥府庫官活我家人駭之越數日病稍  
愈偕其子來探則先公塋矣因厚葬鏹楮哭倒墓



下對吾族人道其祥曰海病時被一人扭至一公所見主者冠服坐左右擁衛多人因跪前哀懇視之大公也大公目從人若往覈狀已而令海前示曰冥司以我公慎署爲庫官因知汝陽壽未盡者三年又目從者引海趨還得有今日云云次早抵城中覓見不肖拜哭如前所云時固未之信也越二年海果病卒遠近人傳之以爲異事嗣不肖領嘉靖戊午鄉薦登壬戌進士第由常州府推官備員諫垣值隆慶改元蒙 恩例贈先公爲禮科給事中已而不肖忤權見放復位 聖明起之田間游陟鄉貳暨今官累贈先公資政大夫祭贊機務南京兵部尚書嗚呼 如天之恩寵光載服海言有徵庶幾適然于地下惟是不肖孤從先公茹荼食貧以有今日而九原已不可作矣痛忍言哉痛忍言哉配先妣李氏初贈孺人累贈夫人父德州左衛舍餘李強母董氏陽信縣叅議董琦妹氏繼配姜氏邑人思獻女二母皆有懿德別具狀誌中子男二長卽不肖世選先妣李夫人出今任南京



兵部尚書娶黃氏封孺人累贈夫人德州衛冠帶  
總旗鸞女次世懋繼妣夏氏出德府引禮生娶朱  
氏德州衛處士子文女女二俱李出一適同邑高  
應祥一先卒孫男八人女四人選出者男六四廩  
生娶兵部侍郎任士憑女繼娶處士王賀女再繼  
娶縣簿王贊女鸞選貢生娶饒州知府陳桂女繼  
娶縣簿黃錫女再繼娶庠生孫起嗣女鸞庠生娶  
歲貢生郭鄰女繼娶光祿監事紀公迪女鸞庠生  
娶太僕卿孫緒之孫歲貢生起宗女喬庠生娶庠  
生任士志女繼娶知縣趙燃女同庠生娶鴻臚序  
班張衡女女三一適兵馬鄭祚子庠生養直一適  
庠生楊巨鯨一七歲殤世懋出者男二晁太學生  
娶知縣蘇權弟庠生樞女繼娶按察使趙焯弟某  
女最娶縣簿王贊女女一適庠生趙時臨曾孫男  
四承祖娶戶部郎中李再命女承廢娶光祿卿盧  
宗哲之孫太學生永錫女承業娶太學生陳寰女  
承恩聘舉人張道一女曾孫女九一許聘庠生楊  
之奎子 一許聘庠生張學成子 一許聘



兵馬李遂子

一許聘知府曾

之孫庠生

弘子

一許聘舉人張道一子經緯一許聘知

府祁鯨之子太學生繼文子

餘尚幼玄孫男

一幼鳴呼憶昔先公奄逝屬家殖寥落諸凡塋具且受成命于先祖所不慚人子意者何限厥後獲大司馬石東泉公賜之誌銘足光泉壤乃今不肖誠不自意游歷華要叨被 恩數而誌石瘞諸幽宅尚未表厥墓道寧不爲闕典乎哉斯是用痛心疾首追遠懿行擬集如右尚祈 鴻筆冠我豐碑

昭示方來不肖顯揚之衷藉以永慰歿存不勝感戴

誥贈夫人先妣李氏行狀

先妣姓李氏先考北原府君之元配也按世系吾周原籍南直太平府之當塗縣永樂中有諱思誠者遷河間之故城五傳而爲王父累贈南京兵部尚書義軒公諱珍配王母劉累贈夫人生先考累贈南京兵部尚書北原公諱良佐先公幼有異質績學有聲義軒公慎爲擇配求克相者爰得先母



於李宗聘焉先母父名強德州左衛人潛德弗耀  
有長者風母董氏陽信縣叅議董琦女弟持善行  
修婦道可爲世女師以正德四年十二月初五日  
生先妣稟異恣慈惠有至性閑於姆訓工組繡識  
字通書史大義古今孝順烈女等典故宗戚稱爲  
賢女及笄歸北原府君明達諳於家政中饋衣紉  
以至蠶繅等務咸以身任之不厭也時姑劉夫人  
已謝世繼姑王在堂而祖姑胡猶總家政先祖義  
軒公喜筵客不欲致煩其母重觴累俎一取辦於  
王少不給隨以譙讓先妣每出力以息其姑身先  
以率其下一一當翁心翁每對客稱爲賢婦云祖  
母胡病且急先妣食不茹葷冬不挾纊自罰以冀  
陰庇既愈人咸以爲孝誠所感痛始劉淑人早逝  
不逮躬養嘗曰吾爲劉子婦未及執婦道今事王  
其尚猶劉乎凡慈夕慈朝問衣佐餽靡不竭力修  
之而又曲意將承惟恐少拂其志王卒事再繼姑  
胡如王王遺子良材幼弗悅于胡爲極力調護俾  
有室家克佐夫子有鷄鳴儆戒之風先公素曠達



而廓畧于細事先妣綜核慎愆凡先公所欲爲或遺忘忽略者輒先事處辦井井有條爲諸叔氏娶婦躬備聘幣務勝于已嫁二妹氏奩具又特豐腆至脫簪珥出已衣物資之無所吝惜妯娌姑嫂間恩禮有加雍雍藹藹不啻若姊妹然蓋其天性孝愛毫無矯飾且慈惠利物有丈夫識每見先公有義舉卽欣然贊成之姑婚何得雲爲族人所構陷則從史先公傾橐營救以脫其獄姑子王良臣筑災孤弱則偕先公捐貲授館俾不致流落賊黨聖

閉中有貧不能立者有婚不能舉者有喪不能塋者有疲癯殘疾無依無告者每因事周恤之蓋惠雖出於先公而意實成於先妣也內外族姪時節餽問慶賻往來不豐不嗇期于成禮下逮臧獲備佃御之各中乎節恩不至縱威不過嚴摑以內外斬斬如也于是賢明和惠之稱益燁燁于表裡親族云旣舉不肖有異兆鍾愛之又特不爲姑息稍見違儒者程度輒誥誥不已嘗課不肖業至事父母能竭其力事君能致其身輒曰汝父事汝王父



母能竭力每以不得致身事君爲恨吾視汝有奇表勿惰志廢學務斬進取以成爾父未成之志不肖頗應聲唯唯先母撫之有喜色時不肖長妹方十餘歲深幃邃閣教習女紅兼姆訓比之教子更嚴嘉靖癸卯歲又產一妹遂遭疾調治繇延至甲辰九月二十七日竟卒卒時選偕妹氏環泣于側母曰勿泣用心做人讀書勿負吾言吾瞑目地下矣言訖而逝享年僅二十六歲嗚呼痛哉子男二長卽不肖世選見任南京兵部尚書娶黃氏封孺人累贈夫人德州衛冠帶總旗鸞女次世懋德府引禮生繼妣夏氏出娶朱氏德州衛處士子文女女二一適高應祥一先卒孫男八人女四人選出者男六鼎廩生娶兵部侍郎任士憑女繼娶處士王賀女再繼娶縣簿王贊女鶴選貢生娶饒州知府陳桂女繼娶縣簿黃錫女再繼娶庠生孫起嗣女鶴庠生娶歲貢郭鄰女繼娶光祿監事紀公廸女葛庠生娶太僕卿孫緒之孫歲貢生起宗女喬庠生娶庠生任士志女繼娶知縣趙燃女岡庠生



娶鴻臚序班張衡女女三一適兵馬鄭祚子庠生  
養直一適庠生楊巨鯨一七歲殤世懋出者男二  
冕太學生娶知縣蘇權弟庠生樞女繼娶按察使  
趙焯弟某女最娶縣簿王贄女女一適庠生趙時  
臨曾孫男四承祖娶戶部郎中李再命女承廕娶  
光祿卿盧宗哲之孫太學生永錫女承業聘太學  
生陳寰女承恩聘舉人張道一女曾孫女九一許  
聘庠生楊之奎子 一許聘庠生張學成子

一許聘兵馬李遂子

一許聘知府曾其之

孫庠生弘子

一許聘舉人張道一子經緯一

許聘知府祁鯨之子太學生繼文子

餘尚幼

玄孫男一幼嗚呼自先妣歿迄今餘五十年所每  
見叔姑輩道及往昔輒泫然流涕族戚翁媪指其  
遺行歎息稱道喟喟若不容口且云固宜所息昌  
隆若此噫嘻爲是言者雖以不肖故而懿德昭昭  
奚容泯耶獨念生子劬勞在母尤甚而先妣教育  
又越常倫所望報罔極于萬一者何限追維先妣  
棄代不肖纔十有三歲至冠不及見婚不及見嗣



不肖以嘉靖戊午領鄉書壬戌成進士擯而復錄以逮今官均不及見悲哉悲哉吾母能盡道于舅姑而不得受子婦一日之奉吾母能克相乎夫子而不能偕老于百年吾母能教子以掇青紫而不得享杯勺之祿養無論肥甘綺麗足供娛親卽羹藜茹藿而欲躬親視膳以追一日之懽詎可得哉詎可得哉抱恨終天欲死無地唯是斤斤遺訓罔敢軼越以貽感于地下爲可自勉耳曩不肖以給舍值 穆廟覃恩贈先妣爲孺人迨承乏少司空加贈淑人以今官又加贈夫人 制詞焜燿永賁九原不知吾母果瞑目焉否也嗚呼痛哉吾母不能復作矣而閨闈潛德未表諸墓將何以昭示子姓使我周氏之福蔭固自淑人種之而益弘也用是輯所記聞掇拾如右丐諸名筆以圖不朽不肖孤亦藉是少慰顯揚之念惟立言君子特賜採擇焉不勝哀感懇祈之至

墓表

先高祖懷石府君墓表



吾周家世之詳具載譜牒可考始祖諱貴生二世祖思誠始携重貲奉例自當塗徙故城父子皆以善著稱生三世祖福持齋樂施不事俗營中年後尚未舉子嫡室辜氏復娶項氏于氏于爲山東商河人體厚氣清實生吾先高祖諱源字德淵別號懷石配馮生子積稼穡初高祖之生也魁梧之貌岐嶷之資垂髫出就外傳輒了了字義日誦數千言稍長能文弱冠補邑庠弟子員輒試高等廩于學宮屢入京闈衆以大物期之乃連遭內外艱以一身應門戶百務倥偬惟恐隕墜其家殖苦心勞力經營物業周旋公私遠近交識酬酢之際克艱克儉不忘不愆舊宅嚙于水患改卜城北購得傳氏田地築垣造室移而家焉前爲塲圃又前植桑棗子孫世享其遺先塋原在縣西偏鄰于城因改遷城北鳴鳳之原載封載樹迨今觀者人人以爲旺地性喜賓客好宴會與村中兒女姻家胡大公甚相友善彼此往來招飲薄暮相送以中途棘狗爲限緣是不免踈于本業就試憲臺遂入劣等改



充長蘆運司掾吏滿考上銓部完事冠帶守支太倉都人延爲塾師因材訓誨多所成就時吾祖大司馬義軒公以少孤隨侍京邸受過庭之訓者數年比有義兄諱海者代高祖家鄉應門因遵父訓以產業三分之一讓海海以病棄世其子松不肖父遺田宅盡爲鄰家顯宦京師者家人謀去高祖往贖不允遂具疏欲奏聞于朝致辯時有鄉親同宦京中者和解竟以原業歸之其磊落激昂不屈于勢大率類此至于憐寡恤孤賑乏濟急于一已財力無少恡惜蓋其剛直仁厚出于天性然也正德改元回家見食指繁衆家務參差急與先祖娶先祖母劉夫人又以村無井泉因擇地穿井于家南百步許迄今子孫汲而賴之隨令先祖與先伯曾祖積先叔曾祖積三分其產各立門戶無何感疾告殂時正德二年四月二十一日也詎其生景泰元年九月二十一日享年五十有八未屬纊前呼子若孫囑曰吾昔遷塋先人術士劉某謂吾新塋後面來龍聳伏繇且前面大河環抱朝拱中



間四神八將俱全真佳城也後當出數世公卿云  
云此售術之言固未可憑第以天道人事度之吾  
家累世以來多行陰德未有顯者吾初妄意進取  
乃值數竒竟止于此汝輩務以積善爲心以教子  
讀書爲事後世必有宦達以徵其言者汝等識之  
嗚呼萬物本乎天人生本乎祖報本返始人心同  
然而祖有功宗有德古先聖哲所崇重于百代不  
磨者乃孝子慈孫所宜倣爲楷式者也吾家祖先  
締造于甘陵越八九代始發於世選之身而族衆  
森然衣冠林立事業方蒸蒸日上艾邈本窮源實吾  
高祖垂割宏遠之所貽也選故述祖父平日傳頌  
高祖一二遺言遺行筆之于石以詔後世子孫使  
知慶流有自且欲世遵懿範以隆光裕之休于無  
疆也若其履歷之詳未得于傳聞者不敢妄爲之  
說以取失實之誚云





國家圖書館, NATIONAL CENTRAL LIBRARY, TAIWAN, R.O.C.

行政院  
國家圖書館



衛陽先生集卷之十四

其陵周世選文賢父著

武林後學沈獅

較正

同邑後學沈嘉

孫男承芳編次付梓

誌銘

朝議大夫娛恬段公墓誌銘

按狀段氏世爲山以東恩縣人人卽其居號段橋  
庄蓋段寔望族也著姓自高祖志剛剛生榮榮生



文林郎文高配栗孺人寔生公公諱錦字美中別號二泉晚更娛恬今率稱娛恬先生矣夙慧嗜讀書日上口數十百言三冬足用補博士弟子員稱茂才以嘉靖丙午舉于鄉丁未舉于朝出宰壺關壺關爲晉巖邑逼西鄙虜虜且大舉獵纓角窺上黨公爲飭胥睨增旂閱以書生擲筆褫當旗鼓如老將虜畏不敢伺壺關去公且以暇完積逋而理冤獄聲聞藉甚其所脫囚有行暮夜金報者公毅然謝絕之壺人以此揚關西千子報最拜侍御史以柱後惠文彈諸權貴聲震朝野頃以督儲理河有成蹟稱上意使按西川威惠咸若于紀得校乙卯士所發解得陰大司馬時號蜀賢書得人焉事竣報命以薦剡黜時宰甥時宰竟嗾當事者據拾謫倅深公不以垂翅懈從事悉志以相厥守旋即擢宰大名治大名如治壺關旋復擢貳保定佐保定如佐深所至有去後思庚申念兩尊人春秋高請便歸省而文林公亦病且不起因得侍嘗唘塋及情如禮改歲而栗孺人以念文林公故亦



病不起亦因復得侍嘗唵堊及情如禮如文林公  
向使公鞅掌一方則亦何克襄大事寧不抱終天  
恨也者則所稱孝感非耶起復同守蘇州旋擢備  
兵穎上穎爲南北要害多劫人風公至屏諸赭衣  
白 鄭藩寃事却解贖罪鎚且捐俸置校里田穎  
人復比黃穎川及隆慶改元擢叅藩關中而公倦  
游矣乞休養痾林泉卽梁大中丞張侍御薦公方  
偃臥手一編弗爲起也因更號娛恬以示無用世  
意然而濟人范俗心不以出處易歲侵則出粟綬  
諸流徙歲疫則贍餌生諸僵仆且出橐中俸餘金  
佐修黌宮建關梁鑿井泉救凡民喪而尤加心于  
族屬知舊聞若訓傅氏子存任氏孤拯崔氏艱尤  
嘖嘖人口者其他惠施殆無算云大都公嚴方簡  
延接士大夫對客終日無惰容言動輒準于禮遇  
烈風雷雨無敢戲渝若吉月若大典禮輒衣冠北  
向頓叩如大常儀歲時伏獵輒薦麋藻修大夫家  
禮羣子姓勞勸之且也業敦儒素不喜藻繪紛華  
曰吾輩自當惜福耳尤不喜殺生公宴高會僅足



掩豆卽折柳踐豸亦有戒心蓋忠孝仁愛其天性  
然也老惟一女贅嘉善簿于士鯉子愉因謀諸族  
及邑薦紳先生告于廟而字以段俾承先祀乃段  
愉亦恂恂雅飭事舅如所生人更謂娛恬先生爲  
有子矣公素病脾後更劇卽齋榻疆起以所遺產  
均之諸同姓井井有差別室中有遺腹亦手記以  
示券蓋聰明不惰如弱冠時云公以正德壬申十  
一月廿四生以萬曆九月四日卒年七十四先後  
皆配于鄭皆得封孺人二子俱殤女一歸王格心  
亦先公卒如孺人爲故城康氏所生女卽所贅段  
愉爲公後者也今卜以其年月日啓二鄭孺人之  
窆而合塋焉段愉率諸同姓者以謝大夫狀謁余  
而乞余銘余雅重公舊矣敢以不文辭遂斧狀而  
誌之復稽而銘之 銘曰天不可必乎胡公之仁  
而壽天可必乎胡公之豐其身而斬其後後不必  
子壽不必年惟有所以不死者是之謂愛而傳

承德郎陞五品服俸河南南歸德府通判盧公

墓誌銘



歲戊戌十月二十五日歸德通判盧公卒于家越  
明年己亥其孤永錫文錫用形家言卜十一月二  
十七日將奉柩窆于城南先隴之次廼手次第其  
行實涕泣以銘請余于公有姻媾之雅又深知公  
義不可辭按狀公諱茂字如松紹涑其別號也先  
世有名子興者永樂中自涑水遷來遂爲德州左  
衛人子興生斌斌生得得生信信中子經封翰林  
院檢討生三子季子宗哲爲嘉靖間名臣仕至光  
祿卿配譚氏贈淑人實生公公有異徵數月能言  
甫兩歲授之古詩輒成誦若夙記者七歲就外傳  
誦讀朗朗無羨音閨語聯對獨確悉中音律十二  
能屬文稍長游鄉校一時髦俊盡讓敏給諫葉公  
一見深器重之曰此盧氏千里駒也光祿公宦游  
南北率以公從代理內外家政靡弗當父意指戊  
午當比士會光祿公與中闈齟齬慮患叵測父子  
相依于京二三知厚者曰郎君偉負可芥拾科第  
柰何令其坐守青衿吾輩當貸貲令入成均卽可  
魁京闈矣然竟弗第也自是屢舉屢弗第丁卯試



期僅餘三日聞母魏病劇或勸勿歸以魏卽不諱繼也公謝之曰吾父耄而病忍以緩急爲累吾方寸亂矣乃日夜馳還及入門而魏病良已因自嘆曰吾生不辰卽區區一第固我靳乎且親老在堂定省裕大嗣是遂罷舉子業矣光祿公天性廉介不問家人生業歸來無以供朝夕公量入較出居積日爲以故菽水之奉不至匱之而承顏順志日兢兢罔懈及光祿公歿哀毀骨立終三年茹素衣布未嘗解顏也乙酉謁選天曹授宛平簿簿職筦官府賦租辦納往往病小民爲之均莊頭革解戶積困頓蘇戊子遷大興丞大興近有輦轂下所司多傳奉事中官貪婪險愎意不當動以大內軋之卽京兆尹未見執法相裁公不激不隨事集而民弗擾潞藩之邸行李襍遯移致責在兩縣京兆公疏請屬公任其責仍發帑金三萬爲費公訝其多京兆公曰以主上貴介第而吾輩較省費是清痴矣公曰廢事固不可靡費尤不可得什之一允克有濟事畢上下晏如而三千金猶有餘羨胥徒



向公耳語云曩奏中有不敷准聽續請矧三萬乎  
景藩前例可據曷取之以充資斧公正色曰金以  
萬計固可潤囊如法紀良心何竟冊報而還諸帑  
京兆公大竒重而薦之奉 旨紀錄太宗伯委查  
披剝牒檄行有劣者飭逐之稍從刻嚴立招重賄  
乃寢而不行大都事有利竇者人多百計營之公  
則若將浼焉一時聲稱籍籍縉紳間壬辰陞衛輝  
府通判職在捕奸甫任會川兵應調道出衛源地  
方大虞驛騷公逆之境上委曲諭其將卒令其鴈  
行而前迺到迺發問圖竟獲安堵旋攝淇符淇京  
省要衝凋弊特甚公至甫三月諸政槩新督撫公  
按部見其今昔頓異嘉與不置卽欲爲淇請畱緣  
除墨尚鮮擬銜弗便不果淇父老已勒碑頌遺愛  
將劬祠而尸祝之公力止方寢甲午河以南大歉  
守令時多罷去攝之者難其材公以推擇往署襄  
城乃禁訟停徵昕夕理賑事務求實惠在嗷嗷猾  
奸慣舞無所售巧襄民賴以全活者數萬諸財賦  
毫無染指是秋河伯不仁潰淤爲漕病總理大司



空廉其才名疏請更調歸德河署公暴餽糧以行  
河不煩供應丙申春董分黃大役工無定所食息  
弗寧關散工料可喻十萬金曾不移銖兩充餽餼  
直指使者上其功陞服俸一階明年督視宿遷挑  
濬運艘藉以無阻秋杪河決虞城勢將南徙增隄  
塞口不輟晝夜公以積勞之軀暴露于風霜間左  
體遽成痿痺遂決歸計先是有妬公者布飛語于  
私揭公夷然弗辯會有廉訪其人者公雅不欲爲  
報復惟仰天嘆曰吾當官不愧俯仰卽有厚誣人  
胸有心誰口無舌清平昭在水濱矧老冉冉其將  
至獲歸猶晚大計其諧果行列以不及調改公聞  
尚色喜曰才不才亦各言其子也惟不以墨行而  
辱先死且含笑吾今得全歸矣抵家病少間樂與  
親友宴會居恒則手不釋卷弗問川舍卒之日猶  
櫛沐若平昔偶手麻還榻而終距其生嘉靖十三  
年十月十九日享年六十有五公狀貌魁岸賦資  
英敏前身事記之了了詩文清勁古卓成一家言  
滁陽所作載會景編中他稿藏于家禔身簡嚴食



無重味衣無重綺媠褻之語未嘗出諸口性至孝侍父宦邸依依膝下不忍離卽遣畢婚外家弗往也方母譚之背棄時在童齡躡踊毀瘠若成人然素未習畫而貌其母之遺像若生事母劉魏亦不以繼而廢夔夔非孝思純篤者能然哉葛孺人早亡有侈富者願締伉儷盟可藉以潤筆研弗屑也伯父病且革遺孤尚幼持千金爲贈乃婉言固却之而于其家擁護周至迄今門祚如初與人交不取苟容然獨以然諾取重當官務恤百姓不避豪強嘗自信曰臣職不難盡惟公與任則得之此其清操勁節蓋無負庭訓云於戲以公之志若才使究厥用當有偉樹而僅僅以別駕終位不勝德有餘恫焉然晚近世泥于資格以例貢起家至佐罷者海內指不一二屈矧以郎官能以三品贈其親徼先人未竟之恩命顯揚之志藉以稍伸蓋未爲遇而亦未爲不遇也公目可以瞑哉配葛氏贈孺人娶數月卒有賢行載在父端肅公所書誌中繼高氏封孺人都指揮洪女子二永錫監生娶



按察使巡女文錫監生娶

按察司經歷堵

銓女繼蓋澡女女一適憲副張子順男監生鳳翼  
孫男四世滋聘吏科左給事中程紹女世淮聘浙  
江道御史謝廷策女世治聘庠生李熿女世泓尚  
幼孫女三一字庠生謝應擢一字余孫承廕一字  
辛生曾弘子士奇法得并書銘曰 嗟嗟盧君之  
生兮毓秀鍾靈志操迥不羣兮如壁如璜懷珍以  
待用兮藝苑推英胡遽回于雲路兮彼蒼冥冥寄  
一職以紆抱兮廉隅是矜樹甘棠于燕豫兮口碑  
刊訶位誠卑而道弗枉兮允克振其家聲畱不盡  
以遺來裔兮將蘭桂乎崢嶸覬泉臺其几固兮百  
千萬禩徵余銘

誥封戶部郎中龍溪宋公墓誌銘

明興二百年來吾故城以子貴封如其官者才四  
人固皆碩德惇行取羨鄉閭至以明經適用之學  
躬堪進取而能恬退是其雅雅于于以就封君之  
列唯吾龍溪宋公有足多者公之冢嗣河南太守  
諾方在郎署時兩值 穆廟覃恩賜封公爲戶部



待以先生集  
主事晉封爲戶部郎中於時公實爲庠校廩生褒  
然有掄魁之望而乃偃然就封人皆賢之中丞孟  
公下之檄云才藻久振于儒林義方先膺乎天寵  
爲之監坊以旌異之扁曰勅誥重封吁是可以徵  
公矣公諱良壽字文謨龍溪其別號也先世潞安  
府屯留縣人永樂中諱德成者偕配王氏携三子  
一公二公友奉例來實畿內占籍故城遂爲故城  
人一公生雲好施予有善行配張氏薛氏生子三  
熊鳳鸞鸞字天瑞號誠軒體貌修偉志行醇慤以  
邑掾滿二考將上部矣曰吾不任律牒事輒棄去  
歸田教子期以儒顯其家配秘氏張氏實生公焉  
公生而穎異七歲從學塾師卽能領受講解詩書  
大義十歲善屬文十六遊泮庠益矢心問學閉門  
羅書史丹鉛典勘無間昕夕從遊於岡鄉沙溪孫  
公之門公閱其文擊節嘆賞謂掇青紫若拾芥也  
每臺試輒高等顧屢戰藝文場不利迨太守公旣  
貴曰困于身而享于子猶弗困也吾志其有托乎  
遂就今封人固惜其抱而尤重其達云公天性孝



友惇信明誼與人樂易而不爲媿媿之行居已朴  
儉而不恡急難之恤平居端雅緘默至義激情感  
輒見事風生議論慷慨而匪爲身家之圖事誠軒  
公與其母氏竭力承志務曲得其懽心仲弟良策  
早世爲婚嫁其遺孤季弟良簡至不能家畀產以  
裕其生族之貧無告者調之教太守兄弟愛而能  
勞遠近生徒來受業者隨材造就多底于成庠有  
被譖獲罪於師長者將就羅織公侃言曲喻以直  
其無他隣婦孀貧苦地畝不均爲累公代訴于官  
得減稅以安其業途遇凶服者勸甚詢之知貧無  
以葬也爲之助槨以襄其事河水泛溢田將爲沼  
矣公率里人沐浴致禱旋復故流其年有秋人咸  
誦之公之篤行義舉感格神人率多此類不可殫  
述晚年恂恂鄉居與人讌集言笑溫款不異爲諸  
生時邑大夫延爲鄉飲正賓一往輒固辭杜門閱  
書史自娛不爲豐殖生業計視世之盱睢張耀垂  
白規營者大相逕庭允哉完德君子也先是太守  
公入官屢謀迎養不就暨守東昌補鄖陽再調河



南始一至官邸數月輒告歸歸卽病瘍甚劇太守公聞之急乞休以歸侍湯藥延今數禩疾頻作頻愈一日太守公乘問問及後事公但曰我所欲行未忍言者體悉措置當我心夫復何言蓋太守兄弟析產後公復舉一庶子太守卽以已分田宅造舍書券推予之公驩甚不復有他慮也今年三月初二日復感風痰遂不起距共生正德五年六月十七日得壽七十有二配王氏封太安人加封太宜人先卒婦德毋儀備載古川程侍郎所爲墓誌中側室方氏李氏子男五諾河南府知府娶庠生李性女封宜人語庠生娶張氏詔王府典儀正娶庠生師慮女詔庠生娶韓氏俱太宜人出訓卽所謂庶子者李氏出女一亦太宜人出先卒孫男五太守出者吉祝廩生娶歲貢生郭鄰女語出者吉徵聘庠生王益謙女吉士吉祥詔出者吉祉聘庠生韓益修女孫女七一適省祭官于北子儒士躍澤先卒一適序班劉惟敬子監生源潔一適饒州府知府陳桂子監生家俱太守出一許字監生李



制心孫一經詔出一許字聽選官崔與立孫繼光  
一未許字俱詔出一尚幼語出曾孫男二聲著聘  
通判鄭粹子庠生養浩女聲聞聘監生陳家女曾  
孫女五一許聘庠生胡素孫封周一許聘余男廩  
生鼎子承祖一許聘監生萬化行子鍾一許聘鄉  
進士張道一子九德一幼俱吉祝出太守兄弟將  
以萬曆九年十月初四日啟太宜人之歲厝公柩  
谷窆焉以秘薨丞心傳所爲狀來徵余銘余憶總  
角時與大守公學同燈火過從甚密領公指誨迨  
今耿耿膏懷邇締姻好侍公杖履承愛渥甚故余  
知公爲詳廼不辭叙而銘之 銘曰抱瑜握瑾著  
庠鬢聳壑昂霄擬崢嶸理有乘除數虧盈騰踏英  
英繼體榮經綸志業允有馮洵承恩寵列簪纓爍  
爍懿德重鄉評叢叢桂葉布芳聲繩繩優典來九  
京抱邨封斧開佳城萬年葱鬱芘雲仍

中憲大夫江西饒州府知府陳公墓誌銘

隆慶改元四月公自饒抵余書曰饒號難治竭吾  
慮耗吾精神數月頗克就緒然吾則勞且病矣迨



余奉使 潘潘道病疏歸又得公書云冬杪入  
覲可晤也居無何聞有廬州之訃亟遣人迎護其  
喪至則往哭之闔邑人士觀者弔者罔不泣下盖  
追慕公行而惜公享不滿報也越明年秋將塋公  
翁鎮撫旗持厥親沙溪孫太僕公冢子上舍君若  
谷所爲狀以其孤寡來請銘初公與余爲同學友  
甚善余登第與公同朝已又約爲婚姻知公厚公  
莫余若者銘奚可辭公諱旌字儀甫陳姓別號瀛  
南其先世州西華縣人遠祖有爲刑部主事者諱  
士亨占籍淮安清河縣永樂中徙閭右填實畿甸  
刑部子宗敏奉例家河間之故城宗敏生太學生  
晟公之高祖也曾祖諱儉仕韓城麟遊二縣尹遵  
道履繩不少徇貶以事忤逆瑾棄官歸瑾敗部檄  
徵之者再卒不應士論以爲高纒踰古稀輒自卜  
塋地暨爲諸送終具以生誌托太僕公爲之曰所  
貴吾能親見不浮不誣他日庶可瞑目重泉也士  
論又以爲達祖諱汝爲庠生考諱治已以貢知范  
縣事甫數月丁外艱歸服闋或勸之復仕時公方



爲御史聲稱籍甚范縣公曰業已我繼矣可復資其力以便私圖乎竟謝不出未幾以公考最得貤封如公官母斬贈孺人識者爲范縣公知約取薄享之義而豐畀厚償者隨之不可以觀權輿精妙之機與公生于嘉靖壬午十二月二十八日與弟麟學生旂實一乳焉時韓城府君尚在養聞而喜曰善積自先慶流于裔傳稱八士四維姬室今屬吾門樂莫大矣府君精數學因推衍久之又曰時值佳勝氣萃中和文明啟祥用肇賢科家聲文脉永昌靡他公資性溫醇明秀成童卽刻厲問學父子兄弟自相師友士習方猥陋儼捷時製套語家傳巷誦他書邈乎未聞公獨于經箋外博取丘文莊公大學衍義補淡泉鄭先生策輿等書晝夜披讀靡不淹貫凡天下事有關理道科場所爲者歷歷有槩于中弱冠補學官弟子員有聲嘉靖壬子領鄉薦登丙辰進士司理平陽潔已奉法毅不可撓獄牽滯弗成者憲臣咸以付公理公伸枉哲寃不使有毫髮遺憾旁羈鄰邑持訟牒赴臺臬愬



者往往所得公質成焉由是譽望裒然起山右戊午以選預科場外簾事分閱試卷所薦三人皆名士余同年張侍御問明其一也人以是服其精識三載部使者交章上良狀 詔拜監察御史故事御史試職歷巡城等差然後出按值 世廟加意邊方屯政欲得才實者往大中丞崦山周公擢公上考遂實授捧 璽書釐全陝屯田屯弊滋甚公勾稽誘致有方略豪宗悍卒宿擅疆畛者悉裁以法不少貸窮塞荒徼必躬必親拓營田以畝計者萬餘并覈三司而下諸文武吏裨屯政與否者疏諸 朝迄今廩餉充溢士馬飽騰西隲晏然壬戌秋啣 命按蜀三閱月積勞案牘間以疾告三上章始得 請歸裝惟圖書數卷而已乙丑夏四月奉檄取入京陛見值晉鄙多事往按其地者恒難其人當事者以公名上 先皇帝可之御筆更其名曰桂仍諭往慎乃事無忽無稽公至褒良黜衰搜弊抉奸事涉艱重前使者跼蹐不敢膺公奮然爲之大張憲度士風吏治年來多詭于道者公頒



文昌諭士文二通令有司刻置學宮以崇道術端士行襄陵舊有同邑侍御李漳南先生祠年久圯壞公爲葺垣飭像作文勒石以昭循良不獨重桑梓之誼而已也其所爲匡俗敦化率多此類視世之計送迎度供億者所存不啻倍蓰矣尋例遷饒州府知府饒務冗瑣俗且梗黠多囂訟公以滿考御史任之無幾微見于顏面益思勵精以圖報稱有疑獄蔓引數十百人公甫至平反無慮數十人鋤強植弱任怨任勞嚴扁鎖謹出入明條約汰冗濫平賦役郡治奕然改觀今 上卽位之明年

辰將述職渡江抵廬州府公署夜疾作遂不起則丁卯十月十八日也公素稟厚前寓書以病云余不爲意至是聞卒不勝悼痛蓋公苦心極慮克艱職守一病蜀再病饒壽四十六而逝矣古稱皇天輔善竟何如也惜哉公天性篤孝處兄弟以友睦聞方養疴時聞出訪友尋僧率從徒步姻戚交接不異爲諸生時略不作達官貴人態人以是尤賢之所著瀛南稿藏于家配蘇氏封孺人故庠生諱



潼之女鄉進士權之從姊也子男三人長卽寔聘  
王氏前河南太守東塢公子榆杜訓導度同之女  
次寬聘郭氏壬子舉人鄉之女次寔聘宋氏戶部  
郎中諾之女女三人一許聘余第二子鶴一許聘  
前左都御史東田馬公曾孫邦林之子炳然餘尚  
幼塋期今年十一月十五日塋所城東新阡之其  
因爲之銘曰 陳有世積其來淵淵連枝秀茁惟  
公翩翩爲賢節推爲名柱史秦晉隴蜀聲燁績懋  
專符鄱江澤流益長胡奪之速彼蒼茫茫壽邪位  
邪于德莫偶奠此幽居以昌厥後

勅封孺人蘇氏墓誌銘

孺人姓蘇氏同邑庠生潼之女爲侍御陳公之配  
陳公初名旌字儀甫別號瀛南我河間故城人登  
嘉靖丙辰進士出山西平陽司理拜監察御史時  
肅皇帝銳精圖治尤加意邊防每遣繡衣行部  
必面授旨諭侍御曰陝西屯政廢弛多爲豪右武  
弁侵沒軍不沾實惠汝其往釐正之侍御陛辭慷  
慨入關彈劾其不法者清屯地萬餘頃事竣奏稱



旨太翁並孺人俱受 勅封復命按四川如前甫  
三月以疾在告歲餘奏檄取入京陛見 帝曰山  
西爲畿輔右臂密邇三邊黠虜數窺伺久患不得  
人汝其往蒞事惟勤惟恪 御筆更其名爲桂一  
時在廷諸臣驚愕動色侍御抵山西諸務振作山  
右懾服聞于朝 帝曰嘉乃績其晉秩三級示卓  
異隨陞授中憲大夫江西饒州府知府公諫忤樞  
要事拂闕宦威名素著未至而饒人已惴惴及至  
恩威並而德政流士民胥悅隆慶改元之明年循  
例將入覲至廬州疾作遂卒于公署蓋公盡瘁爲  
國孺人在行諸子皆幼孺人哀慟逾常治喪具挾  
幼扶襯以歸鄉論偉之至今萬曆五年十一月十  
九日孺人亦卒蓋去侍御之喪十餘年矣綜理家  
務苦心可知厥子偕二弟持河南南太守同邑金齋  
宋公所撰狀匍匐請銘余與侍御素共筆硯更關  
姻親公學行政事其得耳而目之者最悉今又因  
狀益更知孺人是不可無述也按孺人幼生聰慧  
素承家訓通書義閑內則及歸侍御事舅姑卽能



得懽心付之管鑰淑慎無違內外咸稱之侍御未第時夜供燈火自理女工佐讀至夜分乃寐及侍御筮仕理官則勸之詳慎果斷勿淹禁以叢怨及聞折大獄有平反輒相慰悅侍御入內臺孺人至京邸每日官居清要須思稱職報主勿激勿隨勿負名節有封事必請講解可行必祝之曰願 聖天子嘉納及守饒則曰吾家世遊宦以清慎聞願自刻勵勿忝祖公惟寬明仁恕庶幾爲民父母侍御深然之侍御溢先朝露時太封翁尚在太翁曾

范縣令丁外艱回籍服闋以侍御在朝遂不復仕及侍御捐館居常鬱鬱孺人乃自修其旨令三子舞綵奉娛或侍遊園亭登高阜處野嘯目送飛檣盡醉而後返如是越歲乃殂孺人盡心喪事棺衾不以煩諸昆季田業皆取其下者人謂有古男子薛包之風又建義塾擇嚴師課三子章句外且令博極羣書讀古喪塋禮故三子沉深蘊藉循循守禮法無世俗奢靡之好一日誨三子曰吾邑雖多科目賢哲接踵然不若京師四方賢士雲集爾其



遊太學考德問業庶多開益因畱一人侍養更迭  
入成均日與諸賢士遊以廣聞見通經義練世故  
孺人之教也夫善事舅姑孝也相夫蒞政賢也敦  
睦友于輕財克讓義也教于親善慈且貞也婦德  
備矣是皆于法宜書恨余不能鋪揚盛美置之蘭  
臺姑著此以俟觀風者採焉子三人一曰寔娶河  
南太守東塢子司訓度同之女王氏次曰寬娶壬  
子舉人鄉之女郭氏三曰寔娶河南太守前撰狀  
金齋公之女宋氏女二一適余第二子庠生鶴一  
適左都憲馬公東田孫邦材之子炳然孫男二一  
命新聘庠生夏鳳岐之女一維新聘太學生張斗  
山之女孫女二一許聘舉人張道一之子一許聘  
太學生劉源潔之子孺人距生於嘉靖癸未正月  
初五日得壽五十有六今將以萬曆六年十一月  
十三日啓侍御公之窆合塋先壠禮也載系之銘  
銘曰賢哉孺人貞純柔婉婦道毋儀宜書彤管  
相夫履道教子義方蘭茁其秀此德瀧岡盤河之  
澣風氣攸鍾佳城埋玉馬鬣之封惟天眷德錫之



祚胤於萬斯年厥宗永振

京闈進士浚溪孫公墓誌銘

吾邑土風淳固人物斌斌薦紳之家率多後先輝映濟濟繩繩以克振乎門祚今古可縷指屈也弘治正德間太僕寺卿孫沙溪先生掇巍科躋顯仕以勁節雄文名當代而鄉進士浚溪公爲之子才華行詎焯然卓然允足趾前美而弘聲業表表爲吾鄉世胃之望迺天不憖遺一疾竟殞嗚呼痛矣公于庠生起三元率諸弟杖哀叩門以誌墓之文請

余自束髮慕公旣辱公知愛旣又盟婚於公之仲子庠生起宗是烏可以不文辭按公表兄李庠生燮所爲狀云公姓孫氏諱若緘字思節浚溪其別號也先世東海人高祖諱太公會祖諱五始占故城籍祖振有計然術崛起爲一方閭右赴急賑窮人稱義士以沙溪公貴封吏部主事贈員外郎父卽沙溪先生諱緒行業之詳具載大司徒海樵王公所爲碑記中公幼敏慧不凡七歲日誦萬餘言甫十齡能屬文多驚人語時與沙溪門下士較藝



卽素盛挾負者罔不輸意推服年十五補邑庠博士弟子員每觀章縫貴遊及過庭所聞諸名公鉅卿輒奮臂曰士生不與此等齊驅並駕非夫也折節力學至廢寢食不厭嘗與兄太學生若谷第太學生若樛就從兄掖縣少尹若金別墅茹苦辛忘寒燠一意佔畢非省覲展親彌月未始抵家久之學益富文益大進沙溪公每觀所作私喜曰吾抱赤忠期有弘樹竟以弗徇時好而甘退焉畢吾事究吾所欲施其在斯乎嘉靖癸卯秋果以尚書領順天鄉薦高等先是婺源方博士分閣公卷誤寘落卷中夜分假寢夢鷹日者再四驚檢得之蓋未嘗寓目也旣中式登榜彌封之號則日字耳吁豈不異乎哉甲辰下第歸益肆力於問學居無何沙溪公卽世煢煢在疚哀毀逾禮嗣是頻上春官不第翻然曰丈夫當友千古奚涇涇一第爲於是旁搜百家諸子博綜漢魏晉唐諸名人篇什尤喜韓昌黎文每愛讀其長篇古詩病宋人詩晦嘗曰有澁不能入者故其作爲古文冲淡渾成稱一家



言其近體若長篇諸詩暨諸詞賦洞達敷腴不滯不踈至其得意句雜入中唐諸名家集中卽具眼者亦尠辨其非當時作也人以公爲沙溪之子擬之眉山蘇過真知言哉今其家有兄弟聯芳集膾炙人口盖並錄其兄若谷者云兄母張蚤逝公母韓在堂凡事必白母先逮之兄不使其有無母之戚也若孺弟未舉子其母劉命以公幼子爲之嗣公奉命惟謹不使其有無後之憂也女弟適楊氏者母楊繼沙溪歿曰是妹吾父所鍾愛者歸寧餽給一視楊母在日不使其重思親之悲也族鄰患難悉力携持姻戚問遺允適情禮開塾延師以義方訓諸子家舊有一經樓聽讀樓時一登臨輒悵然者久之曰吾不克副先人教育之志寧無望後人顯揚之助乎或勸之仕曰仕則妨吾教子也比公厚善同年友邗臺王公任天官少宰人益慙息之俾就選計可仗庇獲美秩也公但笑而不應人以是知公所存之遠矣乃萬曆三年八月初十日忽以疾告終距其生正德十五年二月二十日壽



僅五十有六嗚呼公之生也將有所爲而竟止是耶使公出其素抱以爲世用其所施樹固有莫可涯涘者而才不顯于時年不稱其德彼蒼茫茫胡可問也惜哉惜哉夫人顏氏子五人長卽起元娶盧氏次卽起宗娶吳氏次起鳳庠生娶王氏次起潛太學生娶韓氏次起嗣庠生卽出繼公弟若樗者娶王氏女三人一適太學生馮一鶚一適太學生馮毓材一適太學生馮嘉胤孫男七光祖庠生餘俱幼孫女十適聘俱名門其一爲余第四子昂之室葬期在今年十月十一日墓在樸莊北先塋之次從父兆也噫嘻士君子成名德行文章其大者公之孝友著于家詩文貽于世足以有聞于後矣矧諸郎頴見林立于泮官方丞丞未艾孫氏未食之報天其終厚償之也公日瞑哉 銘曰奕奕先德美彰盛傳克紹罔忒卓卓躬行篤倫摘藻曷忝爾生翩翩者子貽謀孔臧奮翮伊始隆隆者丘珉刻不朽萬古千秋

貢士蘇公墓誌銘



隆慶壬申十月六日董渠蘇公寢疾卒于家越明年萬曆初元公子鄉進士權將以十一月初八日塋公於宅東新阡之兆以狀公之行者屬公契友司理馮公天秩而以銘公之隧道屬余余與權同領鄉薦復締姻盟侍公杖履有年知公之詳莫余若公生平懿行不可殫紀姑按狀撮其大者而叙之公姓蘇氏諱澹字必東董渠其別號也蘇之先河間獻縣人洪武初以花子軍亂子姓各竄他方獨諱成者時以髫年隨其母李氏僑寓故城之董學村蓋漢儒董子下帷地也李聞其說竊比孟母擇鄰教子之意遂家焉由成至公凡六世慶澤綿延代有顯者鎮江府通判拯公伯曾祖也泰安州判恕公伯祖也銅陵知縣鄉進士廷憲公叔祖也迄今科貢彬然青衿林立邑稱望族必先蘇氏高祖人義曾祖子敬祖聰父氓器度軒豁與人恒共憂樂愛觀書尤喜讀選史至仲舒天人三策首揭正誼明道之論示範家學母楊氏以弘治癸亥四月朔五日生公資性明秀醇謹不妄言笑幼服庭



訓孳孳向學既長師事母舅楊北渚公暨北村公  
盡得二先生之學愈自奮勵寒不爐暑不扇默坐  
一室手不釋卷其嗜學之篤類如此未冠遊黌序  
卽褻然首稱嘉靖戊子辛卯應順天鄉試既出鎖  
院督學侍御周公陳公亟索其文以示當道一時  
都人驚異期當魁選竟鍛羽歸益虛心力學不厭  
丁巳以歲貢抵京將入國學喟然曰吾媿不能占  
一第以顯揚二親積分末業升斗餘粟于我何有  
且今之俗綺譚曲說乃以容悅回面抑首乃以浮  
湛此豈吾性行所能辦耶遂浩然徑歸杜門却掃  
將終身焉戊午仲子權卽登賢書人以爲公畱不  
盡以取償于天也其恬退之節類如此平居澹泊  
自將服食器用率以儉朴惟奉養二人潔滌澹備  
旨甘畢力從事務求豐腆比執喪悲慟三年不爲  
衰止緣是致疾遂廢舉子業村西董子祠厥考勸  
建以閎儒教也歲久傾圮公捐貲重新之每歲時  
祀祠下覩物思先歔歔不能禁其事親之孝類如  
此兄溥潛潼俱庠彥相繼凋謝公痛念無已撫諸



孤不啻已出生事不足力爲置產婚嫁不克舉厚  
佐其費資材可教者收與已子同業庠生機等卒  
玉于成其友愛之仁類如此家無厚產諸子薪水  
膏火費常若不贍然閭人窘迫蹙頞力賑不少惜  
其周急之誼類如此沉潜理道凝然靜修城以防  
意甌以守口壁以操行日惟課諸子孫誦讀足跡  
不蒞市廛矧於公府內無妾媵與盧夫人相待如  
賓終身無少反目有鹿門冀野之遺風其持身之  
正類如此夫惟學也可以晰性節也可以標俗孝

也可以植經仁也可以我紀誼也可以振薄正也  
可以昭軌他如不校狂子不乖鄉鄰不勵僕佃特  
其緒餘焉耳古稱純德君子公真其人哉享年七  
十所著四書講義易經說旨子史嘉言諸史會要  
諸書藏于家生子六長枕庠生娶王府官魏錦女  
俱今春卒次卽權娶棗強李運使賜之孫女繼娶  
省祭官裴讓女次檢庠生娶韓縣丞拱室女次構  
庠生娶棗強庠生袁微女次榭娶庠生李燮女次  
樞庠生娶景州馮璠女繼娶棗強田廷鑰女女二



長適故庠生李培齡次適監生孫徹先卒孫男十  
四鉉娶李體順女銓娶鄉進士賈三友女鈇娶景  
州監生馮玠女鏗娶省祭官楊大禮女鉅聘知縣  
楊部男監生維範女鍊聘李體健女鍾聘庠生陳  
旂女鐸聘景州馮玠女鏘鈍聘棗強李朝女鈺綜  
俱聘庠生張顯居女餘幼孫女五一許聘余弟世  
懋男冕餘幼曾孫男二士彥士元聘刁可大女曾  
孫女三俱幼嗚呼麟趾振振桂茁蘭叢一何盛哉  
大都培植厚者發榮必茂濬源深者流派斯長以  
公淵塞篤行厚厥積累宜乎其子若孫鸞翔鵠峙  
聳壑昂霄以食報承麻益炳燿於無疆也因系以  
銘曰 蘇望眉山名世班班鍾祥孕秀載啓董園  
三遷擬教偉哉淑媛碩士代作有閒必先惟公趾  
夫展也稱賢行誼卓卓問學淵源宜騫而騁廼伏  
而跽有屈有伸孰尸者天寵靈煥赫嗣胤聯翩葱  
鬱佳氣隆隆新阡後之考德視我銘篇

勅封孺人亡妻黃氏墓誌銘

余妻黃氏吾故城隣壤德州衛冠帶總旗南泉公



長女公諱鸞字鳴治佃僮尚義人也與先諫議北  
原府君幼同筆硯長契金蘭遂締婚焉黃氏婚余  
十有六年爲隆慶初元余時爲禮科給事中蒙  
恩例封黃氏爲孺人初孺人母劉氏嘉靖丙申歲  
生孺人於第八屯里第有貴相甫能言端莊若成  
人稍長沉靜警頴關於姆訓通孝經女誠列女傳  
大義孝于二親黃之內外親戚罔不喑喑稱賢淑  
歲壬子年十七來歸余謁見舅姑先諫議喜曰吾  
家得婦矣時余爲學官弟子員家衆聚居食指且

數百孺人偕同堂娣姒執帚操臼勤渠事事夜則  
親女紅伴余燈下誦讀相視若賓無一媠語自先  
曾祖母以下暨母若媵輩人人喜悅無異詞未幾  
先諫議捐館又遭先祖先曾祖母先叔四公之喪  
家殖中落析爨以居孺人啣哀履苦益服勤助余  
克襄大事事吾繼母夏承顏順意左右昕夕懇懇  
翼翼惟恐一毫不當其心以至終身爲然每歲節  
獻歆先妣李孺人墓下誠哀備至如事生者戊午  
余領鄉薦壬戌登進士第觀刑部政隨余京邸始



色喜謂余曰君嘗爲我道忠臣孝子事今其將爲忠臣乎癸亥隨余理刑常州余性執泥巖于交際時或公出踰數月孺人飭僕扃鑰水蔬出入恒加謹嚴卽僚友以果餅餽兒輩竟不得入迨余歸有舉似責余過者余遜謝之乙丑從余應召入京承乏諫垣孺人服用悃悞無異未貴時稽防僕從出入比之在常更謹有母黨瓜葛一老嫗常往來邸舍問寒暄一日携數百金投入爲人求脫重罪于姻戚按山右者孺人喝斥急遣携去戒門者毋容

再入久之余訝此嫗不來孺人竟亦不言也余時妄昧奉職彈劾不避內而貂璫外而權要多側目媒孽之竟無以加賴有此耳 穆朝踐祚初中人備名馬候之 殿庭屬余導 駕隨以疏入陳其不可時諫官久無指斥 乘輿者余章畱中越四日不下羣議洶洶懼叵測有姻家同宦內子責孺人以不爲勸沮孺人曰彼盡職言責我婦曷敢置喙其間比得溫旨始解顏然自是驚悸頗疾亦稍稍勸余歸矣居無何余奉使瀋瀋道病疏歸杜門



習靜庭以內事一不以問孺人事姑御下拮据家務內外斬斬有條先是余宦常時勸余積俸厚置服飾賫奉之姑畢第世懋姻事至是孺人顧布素如常囊空若洗人有言者亦無一毫芥蒂意妯娌間藹若姊妹然隆慶壬申第祈析產順承指取罔一間言嗣是娶三兒婦家口漸夥事亦漸冗孺人以身綜理不遺餘力年少余多病痰病目孺人親調藥餌食飲恒私切隱憂繼之以泣坐是勞瘁間亦成疾然旋復獲愈也予所生子女俱眊爲乳哺顧復恩勤不以長少異慮然見吾督課諸子之嚴又未嘗姑息勸護視諸子婦不異已出厚遺吾高氏妹終始如一痛父南泉公蚤世于母若弟恩禮加焉踈邇族姍下逮臧獲處之各適其宜平居尺布一錢不肯妄費至于卹患濟貧又無少恡惜人咸曰享之薄植之厚將侈遐祐于晚齡也迺今年正月十有二日舉第三女胎衣下遲俄而血暈藥罔奏功逝矣年僅四十有五嗚呼痛哉未卒前五日聞先叔二翁之喪率諸子婦冒風雪往臨之與



孀母哭之過痛歸而病未愈而產遂至不起戚屬痛悼者以爲秉禮之過也大都孺人貞慎淳懿惟恐毫髮失禮於人嘗聞余談綱常倫理節孝陰德事輒體貼檢點有過慎者又時時舉以誨諸婦女而安貧甘淡克儉克勤若出于天性然故余得植其平生罔知有家之累實賴孺人贊助之功也

勅命有淑慎壺儀克襄家政爾夫義弗內顧爾賢足徵之語見者以爲實紀云今孺人不可作矣百務叢委嬰情刺裏淚不覺簌簌下矣益痛思孺人

內助之有裨於我也嗚呼天乎何奪我良助之速乎殮之日遠近婦女來哭者填塞院宇迨今有不悉其誰氏者人情若此豈盡以余之故哉可以徵其行矣子男六長昂也廩生娶任氏兵部侍郎思亭公女繼娶王氏次礪廩生娶陳氏饒州知府瀛南公女次商附學生娶郭氏歲貢生鄰女次昂聘太僕卿沙溪孫公之孫生員起宗女次喬聘平陽府通判鄭君粹女次罔聘鴻臚寺序班張君衡女女三長許聘太學生鄭君祚之子養直餘俱幼孫



男二長承祖聘河南府知府金齋宋公子生員吉  
祝女次承廕與二孫女俱幼擬以是年十月二十  
四日厝柩於祖塋東南新阡鳴鳳之原憶孺人伴  
我三十年所含辛茹苦罔克一日暇逸中間有人  
所不堪不信而吾兩人相爲慰藉以延有今日者  
故知孺人莫余若也因抑痛自書行履大槩納諸  
曠中以取信于永世云因系之銘曰 子爲女兮  
德馨若貯子爲婦兮道修罔負子爲妻兮勞勩可  
稽子爲母兮儀範可守芳藂而陸離兮彼蒼何知  
或禔后以威蕤兮豐齋有期城陰逶迤兮維子奠  
居萬祀無涯兮余將偕子以共適于斯



跋

昔者吾姊蓋適

甘陵司馬周公之仲孫肖甫氏  
云吾歲時省姊恒一再至甘陵  
輒樂與絜甫語絜甫在羣從中  
年寂少而深密肅括已若大人

國家圖書館, TAIWAN, R.O.C.



先生吾性多流宕每對絜甫未嘗不爽然自失繇是心嚴絜甫絜甫顧兄事不佞益相暱就稱石交焉會肖甫氏告逝吾姊烝烝一寡婦人白首無兒塌焉楚絕絜甫扶持而安全之未亡人

獲有寧宇無祿先姊即世後事愈凌替不堪着眼絜甫仁以為已任調度經營襄事如禮先姊地上地下無告而多賴者絜甫力也吾於是痛哭而拜絜甫曰君少年而具大人之相居今而



抱古人之心君自此遠矣  
絜甫亦厭城囂耽寂寞讀書於澹臺  
之古邨空山無人水流花開每  
就一義剗然自舞間以眎吾吾  
不禁節之屢擊歲庚午果舉孝  
廉年尚未壯辛未暫蹶霜蹄絜

甫愈益淬勵不問戶外事日取  
先司馬遺集勘訂編摩舉而壽  
諸千秋之木余讀而愛之敬之  
喟然曰此慈孫念祖之極思而  
繼志述事之大端也絜甫用意  
之厚存神之遠多此類豈可以



聲音笑貌為我若

周公立

朝大業炳炳如丹有德之言行而  
必遠自有賢者識其大者小子  
不容贊一辭矣

壬申冬日涑水潛夫

盧世澐具草



蔣民王瑞符書







國家圖書館, NATIONAL CENTRAL LIBRARY, TAIWAN, R.O.C.

